

**SIXTH LEGISLATIVE ASSEMBLY OF MIZORAM
(THIRTEENTH SESSION)**

LIST OF BUSINESS

FOR FIFTH SITTING ON MONDAY, THE 18th MARCH, 2013
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

LAYING OF PAPER

2. **Pu H. LIANSILOVA**, Minister to lay on the Table of the House a copy of the Correction of Schedule of Demands and Appropriation for the year 2013-2014 appearing at page i & ii in the Demand for Grants 2013-2014.

FINANCIAL BUSINESS

**DISCUSSION AND VOTING ON SUPPLEMENTARY DEMAND
FOR GRANTS FOR THE YEAR 2012-2013**

3. Discussion and Voting on Supplementary Demand for Grants for the year 2012-2013.

**DISCUSSION AND VOTING ON SUPPLEMENTARY DEMAND
FOR REGULARIZATION OF EXCESS EXPENDITURE DURING
2008-2009 AND 2009-2010.**

4. Discussion and Voting on Supplementary Demand for Regularization of Excess Expenditure during 2008-2009 and 2009-2010.

LEGISLATIVE BUSINESS

Bills for introduction, consideration and passing.

5. **Pu H.LIANSAILOVA**, Minister to beg leave of the House to introduce “The Mizoram Appropriation (No.1) Bill, 2013”

ALSO
to introduce the Bill
to move that the Bill be taken into consideration
AND
to move that the Bill be passed.

6. **Pu H.LIANSAILOVA**, Minister to beg leave of the House to introduce “The Mizoram Appropriation (No.2) Bill, 2013”

ALSO
to introduce the Bill
to move that the Bill be taken into consideration
AND
to move that the Bill be passed.

**GENERAL DISCUSSION ON THE ANNUAL BUDGET FOR
THE YEAR 2013-2014**

7. General Discussion on the Annual Budget for the year 2013-2014 (to commence).

NGURTHANZUALA
Secretary

....

SPEAKER : Engmah lo mai maia sum deh chhuah chu tihrial a ni ang a; Thawhrimna khawlerawh chu a pung ang.

Thufingte 13 : 11

Zawhna leh chhanna hunah kan kal ang a, Starred Question No. 41-na zawt turin Pu Lalrobiaka Member zahawm tak i lo sawm ang.

Pu LALROBIAKA : Pu Speaker, ka lawm e. Ka starred question No. 41 – na Home Department chhan turin - Kanhmun tlangdungah Police Outpost dah a ni tawh em ? tih ka zawt e.

SPEAKER : A chhang turin a changtu Minister zahawm tak Pu R. Lalzirliana ilo ko ang.

Pu R. LALZIRLIANA, MINISTER : Pu Speaker, Kanhmun tlangdungah hian Police Outpost dah a la ni lo.

SPEAKER : Zawhbelhna Pu Lalrobiaka a ni ang a, chutah Pu Lalthansanga, a dawtah Pu K. Lalrinthanga

Pu LALROBIAKA : Pu Speaker, ka lawm e. Kanhmun tlangdungah hianin tun thlengin Outpost emaw insawhnghehna tur kan la nei lova. A buaithlak khawp mai a, kan Minister zahawmtak hnenah hian ka sawi thin a, tin, House-ah pawh hian vawihnih hetiang hian zawhna ka siam tawh a, vawiin thlengin tihhlawhtlin a ni lova, engnge a chhan? tih ka zawt duh a. Tin, kan mamawhna dan hi Pu Speaker, tlem min lo ngaithiam la. W.Pheileng SDPO hnuai a ni a engemaw incident pawh awm sela buaithlak tak a ni, chuvang chuan a mamawhnate thlirin leh mipuite kan lo him zawk nan leh kan chhawr tangkai theih turin kan Minister hian rang zawkin min dah sak thei hram se tih kha kan ngen duh a ni, zawh pah in.

SPEAKER : Pu Lalthansanga

Pu LALTHANSANGA : Pu Speaker, ka lawm e. Police Outpost chungchangah khanin a bikin kan bial N. Vanlaiphai-ah khianin Police Quarters te leh Office-te kha tihthat tur tih a ni a, engtika tih tur nge tih kha kan hre duh a. Tin, staff..... tur khanin hmanah ka sawi a, case a tam loh avangin ti khan min chhang a. Case register tam tur hianin police outpost ah te police station hi kan Home Minister hian ngen se ka duh khawp mai a. Hmanni lawkah pawh naupang pawngsuala thahna khitalai N. Vanlai-phaiah a awm a, tin, chumi hnu deuh lawkah pawh E. Lungdar-ah khianin MZP General Assembly-ah khanin zanah buaina lian tak a chhuak tep mai a, chutah pawh chuanin venghimtu kha kan nei mang lova, khitalai khawtlanga JAC ang chite khan eng tin tin emaw ni khan an hmet mit thei a. Khitalai keimahni bial bik khi Pu Speaker, kan hriat angin khaw inepna boruak te a na em em mai a, engemaw han tikhawm reng rengin khawdang atanga lokal an awm hi

chuan buaina hi a chhuak deuh reng a ni mai a, chutiang ang chu kan tawng fo mai a. Hmanni lawk YMA Conference-ah pawh kan Parliamentary Secretary zahawm tak Pu Pate-a lokal tum pawh khan buaina deuh a chhuak a, khaw ineplate a nat em avangin khitalai Vanlaiphai Outpost bikah khianin staff-te min dah belhin a tul ang motor vehicle-te leh two wheeler-te pawh hi tun aia tam zawk min dah belh sak thei ang em? tih kha ka'n zawtin ka'n ngen bawk a ni.

SPEAKER : Kristian vek kan nia, Mizo vek kan nia, tunlai electronic age a khatiing hriat kha a hrehawm khawp mai. Pu K. Lalrinthanga.

Pu K. LALRINTHANGA : Pu Speaker, ka lawm e. Kolasib District chhung Phaisen khua tlawh khuan PWD-in motor kawng an lai a, a lun viau thin a, Cachar lampang area boundary thleng khuan a pawh a ni a. Tun hunah khuan Cachar lampangin a aia tha zawkin kawng an rawn lai a Meghalaya atanga rawn kal tur tan leh Mizoram atanga Meghalaya, Guwahati kal tur tan kalkawng khu a hnai ta hle a, report ka dawn danin 45km zetin a hnai a. Chuvang chuan Sumo te pawh an kal tam ta zawk e tih report kan dawng a. Chutih rual chuan khumi kalkawng kaltlang khuan smuggling te, zu leh ruihtheih thildang chi hrang hrang a kaltlang nasa hle a ni tih report kan dawng a. Khulaia a rawn kal khuan Bilkhawthlir-ah a rawn kalchhuak thei a, Rengtekawn-ah motor a rawn kalchhuak thei a, Kawrthah lampangah a kaltlang thei bawk a. Chutiang anih avang chuan Mizoram Sorkar tan hian thilthalo rawn thleng thei a kha a kal darh tawh hnuah chuan hmuh a har viau dawnin a lang a. Phaisen-ah khuan Police checkgate emaw, engemaw siam ni ta se, a tangkai viauin a rinawm a chumi chu kan Minister zahawm tak hianin Police lam atangin gate te a siam theih ang em? tiin zawhna ka zawt ve leh a ni e.

SPEAKER : I zawhna a sei khawp mai. A chhang turin Minister zahawm tak ilo ko ang.

Pu R. LALZIRLIANA, MINISTER : Pu Speaker, kan MLA zahawm takte zawhna leh an ngen kha Sorkar pawhin kan duhdan chiah a ni a. Amaherawhchu, sum indaih lohna avangin heng hi kan tipuitling zung zung theilo a ni tih kha min lo hriatpui thin a, a lawmawm khawp mai a. Pu Lalrobiaka, MLA zahawm takin Kanghmun tlangdung-a Police Outpost dah an tih kha Sorkar-ina a beisei danah phei chuan Police Outpost ni lovin Police Station zawk dah nise tiin rawtna kan siam a. Sum lam hi kan Finance-ah te leh DP & AR ah te min pekbelh hi a ngai a, kum sawm kalta ang khan battalion thum kan neih belh hnuah pawh hian kan sum min pek hi a ngai reng mai a, chuvangin heng hi kan duhna leh a tulna hmunah pawh hian kan dah zung zung theilo hi pawh kan ti khawp mai a, chutiang a ni chung chuan helai Kanghmun tlangdungah hian an han khaikhin deuh a chu Kanghmun leh Reiek te pawh a ni a, a pawimawh viau ve ve a, chungangah te chuan tih theih hunah chuan heng hmun te hi kan la earmark deuh te chu an ni a.

Tin, Pu Lalthansanga zawhna N. Vanlaiphai Police Station hi a building te kha sak theih turin buatsaih a ni ta em tih te kha a ni a. Hei hi kuminah sak theih tura kan beisei tawh a ni a, amaherawhchu, Central lam atangin MPF an rawn tidanglam leh deuh avang khan khata proposal kan tih keipawh ka han kal a, a bialtu hian a sawi ngun bawh a sak that ngai niin ka hmu a chungah te chuan hengte hi telh nise kan ti a, kan han telh vek tawh kha engemaw zat paihthlak leh a ngaih avangin kumin financial year chung hian kan tithei ta lo a ni tih kha kan sawi duh a, khilai khi kan ngaihkan kha chu a la ngai reng tho a. Mihring khua lian pui pui a awm a khua chu an inngeih vak lo tih chu kan hria a, amaherawhchu, a mihring an changkang tawh a, khatiang ang a khua leh khua han inbeih leh khatiang ang kha a awm chuang lem lova, kan NGO-ten kan Police-te tha takin an tawiawm a, chutiang anih avang chuan khilamah ramri depa awm ni mahselangin an la tha khawp mai a case tam lohna berte zinga mi a ni a, theih ang tawkin kan lo enzui zel ang a, mihringte pawh dahbelh theih an nih chuan tih kha a la ni rih a, ka chhanna chu. (PU LALTHANSANGA : Pu Speaker, sanction vek kha a ni a, work schedule-ah te pawh work programme-ah khan dah a ni tawh a, kha kha tih loh kha a ni ta a. Kumin Financial Year chung hian kha kha min tih theih ang em tih kha.....) A Police Station ber phei kha chu PWD-ah kan pe a, tah chuanin an rawn tender ang a, an rawn ti mai turah kan beisei.

Pu K. Lalrinthanga, MLA zahawm tak zawhna kha a pawimawh khawp mai a, hmanah pawh khan kan Police 1st I R te khan khulalah motor ru lo tihdin an tum a, a ding duh lova a tlan lui a, an kap a, a ke an kap keh vek a, tlan thei lova a awm avang khanin an man ta a ni a. Helai hi motor ruk te, zu phurh ruk te, damdawi lam phurh ruk te tam tak a awm a ni tih kan hria a, temporary-in khulalah kan han siam a, chungte pawh chu tihngheh kan duh a, Phaisen Bagha road hi a hnaivai bawh si a, a pawimawh khawp mai a. In duh ang kha kan duh ang a ni a, tih puitlin hunte chu a la awm ang chu.

SPEAKER : Zawhna No. 42-naah kan kal ang a, a zawt turin Member zahawm tak Dr R. Lalthangliana ilo sawm ang.

Dr R. LALTHANGLIANA : Pu Speaker, a changtu Ministerzahawm tak min chhan atan Sazaikawn Jail, Lunglei hi siamthat emaw, cheithat tumna a awm em ? tih ka zawt e.

SPEAKER : A chhang turin a changtu Minister zahawm tak Pu R. Lalzirliana ilo sawm ang.

Pu R. LALZIRLIANA, MINISTER : Pu Speaker, Dr R. Lalthangliana, MLA zahawm takin Lunglei District a Sazaikawn a Jail sak that tumna a awm em ? a tih hi tunah mai chuan tumna kan ngei lova, a hmun saw en ngun a ngai khawp mai a, an lenglo tawh khawp mai a, hmuntha zawkte pawh en a ngai a. Amaherawhchu,

tunah sum kan neih mai loh avangin chutiang chuanin kan ti thei lova, adanga sawn kher loh pawhin sawlai chei that dan chu awm tura beisei a ni.

SPEAKER : Zawhbelhna, Dr R. Lalthangliana, chumi zawhah Pu P.P. Thawla, a dawt lehah Pu Lalduhoma.

Dr R. LALTHANGLIANA : Pu Speaker, 12th Finance Commission pawisa atang khanin nei tur ang deuh hlek khanin tun Financial Year khan kan lo inbeisei kha a ni a, amaherawhchu kan Minister chhannaah khan tunhnai maiah chuan hmalakna awmlo tur khan a kawng kha a bo ta riau a, a pawl viau mai a. Engpawh nisela, Sazai Jail saw tlangchhip deuha awm saw a ni a, Bangladesh lam atanga thlipui lokal saw a na khawp mai a, kumin fur hi a tawrh leh chuan kan mualpho viau mai ang tih hi a hlauhawm khawp mai a, a main building bik ngat phei saw chu. Tin, chubakah chuan staff quarter saw a chhe tak tak lo thei lova kuminah chuan repair emaw, siamthat ngai a awm hrim hrimin ka hria a. Chuvang chuan engemaw ti kawng zawng tala hei district dangah chuan Jail thar te kan nei nual a, la siamthat ngai lemlo, saw saw a upa tawh a, hmalakna a rang deuh hlek a engemaw tia pawisa han pawtkhawm deuhte pawh a tihdan kawng a awm hram lawm ni tih ka zawt duh a, a main building bakah staff quarter hi. Khawngaih takin kan Minister-in min han chhang thei sela, ka duhdan tak phei chuan hmannah kan Member zahawm tak Pu Duha nena kan zawhna intawm kawng min zuk en sak te pawh kha a tha khawp mai a, tiang deuh khanin sawlaih pawh a hmunah sawnin en ve kha a phu ve deuhin ka hria a kawng saw awm thei sela. Helai atangin kan Minister pui puite an kal theih chiahlo anih pawhin saw bik saw chu a bik takin kan ngaihtuah ngaiin ka hre deuh a. Ka bial anih vang pawh ni lovin a upa tawh a, a chhiat em avang sawn ka'n tia ni, min chhan theih chuan ka lawm khawp ang.

SPEAKER : Pu P.P. Thawla, member zahawm tak i lo sawm ang.

Pu P.P. THAWLA : Pu Speaker, tun Financial Year tawp mek a ni emaw a thar kan pass turah kan Jail-te siamthat tumna, eng ang Jail te nge awm tih leh Saiha District Jail hi a hlui tawh lutuk a henge te hi siam that tum zingah a tel em tih ka zawhbelh e.

SPEAKER : Member zahawm tak Pu Lalduhoma.

Pu LALDUHOMA : Pu Speaker, kan Jail neih zingah hian a fencing hi Champhai te, Saiha te hi Barbed wire Fencing mai mai a ni a. Saiha phei saw chu kum 40 vela upa a ni tawh hial ang, a hnuai lampang phei saw chu a chhe deuh vek tawh an ti a. Tin, barbed wire fencing mai hi chu a lang thei vek mai a, a chhung te hi, a chhung atangin a pawn a lang thei bawk a. Mipuiin an zuam a, Saiha-ah sawn mipuiin jail saw vawihnih vawithum an bei tawh a. Tum khat phei chu jail tang 1 in a thih phah hial a ni. Khatiang kha a nih avangin RCC a fencing dan hi a awm hnaivai em, ngaihtuah a ni em tih ka zawt duh a. Tin, jail tang tlangchhuak, a

hungna a lawn liam tih hi a awm leh zauh thin a, a sang tawk lo a niang tih ka ring mai a, khatiang ang lawn liam mai theih te kha a awm anih chuan han tihsan dan te ngaihtuah a tha hlein ka hria a, chung ngaihtuahate chu a awm em tih ka zawt duh a ni.

SPEAKER : Awle, a chhang turin a changtu Minister zahawm tak i lo ko ang.

Pu R. LALZIRLIANA, MINISTER : Pu Speaker, zawhna neitu Dr. R. Lalthangliana kha hmanni khan ZNP lama kan MLA zahawm tak Pu Duhoma bial kha kan Chief Minister-in a zuk fang a, an zawh dunna a ni a, an bial a ni ve lova kan sawm ve ta lo che u a, a pawl khawp mai a. I hman lo kha a ni bawkin ka hria a, i rawn pha zawk a. Min support-na rilru nei ve la chu sawlaiah pawh kan kal ve mai ang chu, tih lam te pawh kha a ngai tel ve bawk a ni.

Hei, kuminah chuan free budget kan ti bawk a, chutiang rilrute i lo pute anih phei chuan tuna pawisaah hianin engemaw tal chu kan la tum ang chu, tuna kan pass turah hian min pass pui that duh chuan.

Pu P.P. Thawla kha Jail siamthat lam kha a nia. Ka lo hriat danin MLA zahawm tak Pu P.P. Thawla hi Jail siamthat lam ai chuan a biala a kalna lamah pawh Pathian hla saa a zai hluah a, a tawngtai mai thin an ti a. Chuvang chuan Jail a lut tur chuan Pu Speaker, khalam zawnga siam that kha a rilrem zawk mai lawm mawni le, khalama siamthat ai chuanin. Ka'n request a ka,n zawh let vena a ni. Tang tur awm lova kan siamthat mai chuan a tha dawnin ka hria a, chutiang atan chuan theihtawp lo chhuah turin kan sawm a. Kan theih tawk chuan engemaw zat tang an awm zel avangin siamthat chu kan tum zel a ni tih kha ka'n hrilh duh a.

Tin, MLA zahawm tak Pu Duhoma thusawi kha a dik chiah a, tunhma deuhhlekk a phuahchawp deuh hlek a jail kan lo siam te kha ti ila, a hunlai chuan barbed wire te pawh hi a tha viau chuan ka hria a, amaherawhchu, tunah erawh chuan thil chin ngai tawh loh tak ni tawhin a lang a, tuna khi Chhingchhip, Chhiahtlang Jail kan han siam te, Kolasib te leh tuna kan hawn mai tur Mamit khawchhunga jail te pawh khu fencing tha tak nei a RCC fencing tih a ni a. Hengte pawh hi a tahtawla tih zel a pawimawh a. Tin, tihsan hi a tir atanga estimate dan anga tih anih loh chuan a sang ringawt anga a chhe mai ang tih kha a hlauhawm bawk si a. Aizawl kan central jail te pawh hi chu chiah chu a ni a.....khuan hemi barbed wire fencing tha tawk a siam a nih loh chuan khungah te khuan an lawn liam fo mai a ni tih te pawh kan hria a, tunah zawhna kha zawhna tha tak a ni a kan lo en zui ang e tih kha ka chhanna a ni e.

SPEAKER : Awle, zawhna dangah kan kal ang a, a zawt turin member zahawm tak Pu K. Liantlinga i lo sawm ang.

Pu K. LIANTLINGA : Pu Speaker ka lawm e. Kan Home Minister zahawm tak ka zawhna starred question no.43-na:-

- (a) Mizoram Police-te Duty, transfer and posting-ah hian an TA/DA pek loh engzatnge awm, 1st March 2013 thlengin ?
- (b) Police -te TA/DA la pek loh a awm a nih chuan enge a chhan min hrilh thei em? tih a ni e.

SPEAKER : A chhang turin a changtu Minister zahawm tak Pu R. Lalzirliana i lo ko ang.

Pu R. LALZIRLIANA, MINISTER : Pu Speaker, MLA zahawm tak Pu K. Liantlinga zawhna kha hei hi a chhanna chu a ni e. Mizoram Police-te Duty, transfer and posting-ah hian an TA/DA 1st March, 2013 thleng a la pek loh chu cheng nuai 1,013/- a ni. Tin, (b)-na chhanna chu Police TA/DA la pek loh chhan chu Budget provision hi kum sawm kal ta atang khan a la ngai reng a nichin a ka sawi tawh kha. Chutih rualin 1st Battalion pathum leh IR Battalion pathum leh BOP hmun tam takah hawn belh a ni a. Sixth Pay Revision 2010 ah TA/DA rate tihsan a nih bawk avangin a hun taka TA bill pek chhoh zelna tur pawisa a awm theilo a ni.

SPEAKER : Zawh belhna, Pu K. Liantlinga, a dawt -ah Pu Hmingdailova Kiangte.

Pu K. LIANTLINGA : Pu Speaker, ka lawm e. Hei cheng vaibelchhe 10.13 lai mai TA/DA bat a ni a, hei hi ka hriat sual loh chuan Pu Speaker, kum 2 kum 3 lai te pawh kha tam tak bat sak niin hriat a ni a. Hei Police hi kan ram venghimtute an ni a, helaiah hian Budget Provision a la pung lo tlat mai kha ngaituah tham a tling a ni, kan ngaihthah deuh a ni. Chuvangin kidnap case te pawh hi a tam a ni mai lo maw tih te kha zawhnaah khan a awm theiin ka hria a. Chutah chuan heng TA/DA tling khawm hi a Battalion wise-in engzat nge tih hi min hrilh thei em? tih ka zawt duh a. Tin, kan Budget hi need base-in kan kal tir nge a then provision ngah em em mai awm a, a then an tam thur thur lai hian ngaituah chianna a awm em? engnge an theih loh chhan lai kha kan Home Minister hi ka zawt Chiang duh a ni. Tin, patrolling te an kal a, emergency thilah te tih thut thut a ni a, an hah em em a, kan Police Force te pawh hi TA/DA kan bat sak tam lutuk avangte pawh hian, an hnaah hian an tui loh phah thei a. Tun aia chak zawk hian a ngaituah sak theih em? tih kha ka'n zawt duh bawk a. Tin, Police hi training pek reng ngai an ni a, thil thar te pawh a lo awm a, kan hriatsual loh chuan IR nen avaiin Police Force hi Battalion 8 vel lai kan nei a,..... heng ang training pek te hi a company wise-in nge an pek thin a, platoon-in tih kha ka zawt duh a? Khatiang ang training kha vawi engzat nge pek an nih tawh? Tin, India rama Police tha ber kan ni kan ti si a, an lei kan ba nasa lutuk te pawh hi a dik lova, chuang chuan kan Finance Department lamte pawhin an hriat a an ngaihpawimawh a ngaiin

ka hria a. Khang angte kha tihlawhtling turin eng tianga hmalak nge a nih, tih kha, Pu Speaker, ka zawhbelhna a ni e.

Pu HMINGDAILOVA KHIANGTE : Pu Speaker, ka lawm e. Vawi-3 ka pharna a ni tawh a, ka sawi tur erawh hi chu Out Post lam kha a ni a. Minister zahawm tak khan min lo chhang thei thoin ka ring a. Ka sawi tur chu Bukpui Out Post a ni a. Hei pawh hi nikuma vawi-2, kumin hi a vawi-3 na tur a ni a. Amaherawhchu, ka zawhna hi a chhuaklo thin a, kuminah hian zawhna 16-naah a awm a. Chuvang chuan zawhbelhnaah hian ka rawn zawt hram hram a, min phalsak avangin ka lawm hle a ni.

Bukpui hi Kawnpui Police Station atanga vil a ni a, kilometer 30 inkarah a tla in ka ring a. Chuvang chuan Crime Investigation emaw, emergency hrim hrimah pawh an kal theilo a ni ber mai a. Kawng laih hma khan kal chi a ni bawk lova, tunah kawng an laia a kal hleih theih bawk si lova. Chuvang chuan a hmuna a awm hi a ngai a. Tin, kan sorkar tirh khan kan han sawi chhuak ve a, lei tha, Silchar atangin, he kawng hi chhe hle mahse a kal theih tawk tawk avangin tawlh ruk nan an hmang thin tih te kan sawi a. Tin, thil phalloh chi hrang hrang, zu leh thil dang dangte pawh tawlh ruk nan an hmang thin tih te kan sawi a. Bukpui hi out post remchang ber ni a kan sawi avangin, kan sawi tawh thin a. Chuvangin kan Home Minister zahawm tak hian Bukpui out post atana an buatsaih lai mek kha a present position min hrih thei em, tih ka zawt a ni. Ka lawm e.

S P E A K E R : A changtu Minister zahawm tak chhang turin ka sawm e.

Pu R.LALZIRLIANA, MINISTER : Pu Speaker, zawhna neitu Pu K. Liantlinga, MLA zahawm tak leh midangte pawh, hei Police Department hi thahnem min ngaihpu hle mai a, chuvangin kan Police te pawh hi an la kal tluang hle a, Law and Order chungchangah pawh khawi maw lai laiah problem awm thin mahse, chungte chu fel taka chin fel zel anih theihna hi MLA zahawm tak te vang a ni a, lawmawm ka ti khawp mai a. Hei TA/DA chungchangah pawh hian kum 2/kum 3 kha a han ti a, Pu C. Ramhluna, kan MLA zahawm tak khan. A PSO phei chu kum 4 TA/DA a hmu tawhlo a ti khan ka hria a, chutiang chu a ni zawk nghe nghe a, an khawngaih thlak khawp mai a, hetiang hi an hmuh theih dan ngaihtuah a tul khawp a. He lam kan ti ve thei tawk chu, a pawisa petu kan ni lova, tunah pawh hian kan salary atang khan nuai sang thum chuang zet kan surrender a, kan Sorkarah Finance ahte kan han dil a, helaiyah min pek tawh sa a ni a, TA/DA ah te workshop bill-ah te a indaih lo em em mai a, heng lama kan hman hi min phalsak mai ula kan ti a, amaherawhchu nuai 1000 chauh kha min pe thei a ni mai a, kan workshop bat pawh a daih lo hrim hrim a. Department dang ang lo a ni hi tih kan MLA ten in hria a, a lawmawm ka ti a, tunah pawh hian min han dilpui, helai House zahawm takah pawh in han sawi chhuak a. Law and Order kengkawhtu an ni a, khawimaw laiah buaina awm hlek sela helaiyah an lo tum lawk ni ve lo khatiangah khan, tlan rawh u, kal rawh u, ti reng ngai an ni a, Petrol-ah te, PLO khatiang zawng zawngah khan Officer dangte nen hi chuan tehkhin theih an ni lo a ni, tih in hriat avangin a thlamuan thlak hlein ka hria a, kan sorkar pawhin min ngaihtuah zel kan beisei a ni.

Tin, TA/DA Batallion wise-in engzat nge tih kha chu, tunah mai hi chuan ka chhang thei lova. Hmun dangah zawhna te kha awmin ka hria a, kha kha a lo chhuah chuan kan chhang turah ngai i la.

Pu Hmingdailova Kiangte, MLA zahawm tak kha, thil awmdan hretu, police officer lian tak atanga lo lut a ni a [Pu K. Liantlinga: Pu Speaker, he ti lai hi min la chhang lova] Battalion hrang hrang Battalion-wise ten engzat nge tih lai kha hei hi session chhung hianrawn pek kan tum dawn nia. Battalion hranga hranga TA/DA neih dan kha. Tichuan Pu Hmingdailova Kiangte MLA zahawm tak kha, kan sawi tawh ang khan Bukpui Out Post kha a pawimawh tih thu vawi tam tak a sawi tawh a. Amaherawhchu, Out Post te, Police State te han din dawn hian, Police a mihring chuan zu daih ringawt mah ila, post create te a ngai ve a, khang zawng zawng kha sorkarah hian tih zung zung hlei theih a ni lova. Vawiih hian sum leh pai post create ringawt a kha chu a harsa lo thei a, mahse kha kha a ken tel a chu sum leh pai a ken tel kha a ngai ve a, an in luahna tur te, engkim khang ang kha a ngaih ve avangin sum leh pai harsatna bawkw avangin kan ti theilo a ni tih kha ka chhanna a ni e.

S P E A K E R : Zawhna dangah kan kal leh ang a. Starred Question No. 44-na, hei hi mi pathum zawhna a ni a, Pu Lalduhoma, Pu Lalrobiaka leh Pu T.T. Zothansanga, heta anrawn ziah hmasak ber hi Pu Lalduhoma a ni a, member zahawm tak Pu Lalduhoma zawt turin i lo ko ang

Pu LALDUHOMA : Pu Speaker, UD & PA Minister zahawm tak chhan atan kan zawhnate chu henge hi a ni e -

- a) Aizawl khawpui chhungah mirethei In khawiah te nge sak a nih? In engzatnge?
- b) Target date of completion engnge?
- c) Contractor te hi tunge?
- d) Tunah hian sum hman tawh percentage leh hna zawh tawh percentage engzatnge?
- e) Mirethei In sak mek kha zawh a ni tawh em? Khawi hmunah nge?
- f) Heng In luahtu turte hi eng tehkhawng hmanga luah tir tur nge?
- g) IHSDP hnuaiah mirethei In sak hi chhungkaw engzat tan nge ruahman a nih?
- h) District hrang hranga sak zat min hrilh thei em? tih te a ni e

SPEAKER : Mi pakhat zawhnaah hi chuan a tlangpui thuin panga (e) na thleng bak kan la lova, mi pathum zawhna kha club a lo ngaih avangin (h) -na thlengin kan la a ni. Kha kha member-te khan min hriatthiampui ula, tunah a chhang turin a changtu Minister zahawm tak Pu Zodintluanga i lo ko ang.

Pu ZODINTLUANGA, MINISTER : Pu Speaker, kan member zahawm tak takte Pu Lalduhoma, Pu Lalrobiaka leh Pu T.T.Zothansanga te zawhna Starred Question No. 44 chhanna hi a thui deuh avangin an zawhna hi ka rawn chhiarchhuak hmasa zel dawn a, a chhan chu a tam deuh a

a) Aizawl khawpui chhungah mirethei In khawiah te nge sak anih? In engzatnge? tih chhan na chu - Aizawl khawpui chhungah mirethei In sakna leh sak tur zat chu hetiang hi a ni.

i) Lawipu Unit 408. Helai hi Pu Speaker, Chite-ah

Project siam a ni a, amaherawhchu hmun a awm loh avangin Lawipui-ah sawn kan combine a, central Sorkar pawhin min phalsak ve tawh a, combine DPR te pawh siam a ni a. Amaherawhchu, kan sakna hmun an sawn avang hian Lawipui ah hian In 408 kan sa a. Nakinah a chhannaah hian Chite tih hi kan la rawn lam zeuh zeuh dawn a. A chhan chu Chite Project anga rawn kal anih avangin, kha lai kha kan member-tena in confuse loh nan ka rawn sawi fiah hmasa a ni.

| | | |
|----------------|---|------|
| ii) Rangvamual | - | 368 |
| iii) Durtlang | - | 320 |
| Total | - | 1096 |

b) Target date of completion engnge? - December 2103 a ni.

c) Contractor te hi tunge? - Lawipui leh Chite combine a mirethei In sak hna hi Hindustan Prefab. Ltd (Central Public Sector Unit) in an enkawl a. An hnuaiyah hian M/S Mesnia Enterprise, Arunachal Pradesh-in a contract hna hi a tirah chuan a thawk a. Mahse a thawh chhunzawm theihloh leh a contractor te sub-contractor te nena an intihbuai thin avangin Sorkarin ban tha kan ti a, an contractor-te hi ban terminate an ni tawh a, tunah hian HPL hian a project hna hi chhunzawm a nih theih nan Sorkar nen ruahmanna thara kalpui mek a ni.

Tin, Rangvamual leh Durtlang a mirethei In sak hna hi

National Project Construction Corporation Ltd., Central Public Sector in a enkawl a, an hnuaiya hnathawktu contractor chu M/s Royal Infraconstru Ltd., Kolkota ami an ni.

d) Tunah hian sum hman tawh percentage leh hna zawh tawh percentage engzatnge? - Sum hman tawh percentage leh hna zawh tawh percentage chu hetiang hi a ni

:-

| Name of Project | Sum hman tawh % (From Total Project Cost) | Sum hman tawh % (From Fund released) | Hna zawh tawh % |
|------------------------|--|---|-----------------|
| EWS Housing Chite | 22% | 45% | 40% |
| EWS Housing Lawipu | 40% | 81% | 40% |
| EWS Housing Rangvamual | 40% | 84% | 26% |
| EWS Housing Durtlang | 40% | 82% | 30% |

e) Mirethei In sak mek kha zawh a ni em ? Khawi hmunah nge ? IHSDP (Integrated Housing & Slum Development Programme) leh BSUP (Basic Services to Urban Poor) Scheme hnuaiya mirethei In sak mek chu zawh a la ni lo. IH SDP Scheme hnuaiya mirethei in

hi beneficiaries-te kal tlangin heng hmunah te hian sak a ni- Serchhip, Champhai, Saiha, Kolasib, Mamit. BSUP Scheme hnuaiiah hian mirethei chenna tur in heng hmunah te hian sak a ni a Lawipu (Chite & Lawipu combined) b) Rangvamual c) Durtlang. Heng In luatu turte hi eng tehkhawng hmanga luah tir tur nge? A chhanna chu Mirethei In sakna IHSDP leh BSUP Scheme hi EWS (Economically Weaker Section) chhungkaw tan a ni a.EWS in a a huam chin tur hi an chhungkaw sum lakluh atanga teh thin a ni a, chu tehna chu Ministry of Housing & Urban Poverty Alleviation-in a siam thin a ni. IHSDP hnuaiiah mirethei In sak hi chhungkaw engzat tan nge ruahman a nih tih chhanna chu, IHSDP hnuaiia mirethei In sak hi chhungkaw 1950 tan ruahman a ni. District hrang hranga sak zat min hrilh thei em tih chhanna chu –District khawpui hrang hranga sak zat chu hetiang hi a ni :- 1. Lunglei chhungkaw 500, Champhai chhungkaw 450, Kolasib chhungkaw 300, Saiha chhungkaw 200, Serchhip chhungkaw 350, Mamit chhungkaw 150, a vaiin chhungkaw 1950 a ni e. Ka lawm e.

SPEAKER : Zawhbelhna, Pu Lalduhoma a ni a, Pu T.T.Zothansanga, chutah Pu Joseph Lalhimpua.

Pu LALDUHOMA : Pu Speaker ka zawhbelh duh chu, hetiang mirethei kan han tih mai te building pakhat a han hnawh khawm vak mai hi, a policy hrim hrim hi a fuh tawklo deuh a ni lawm ni. An va awmna tur vengte pawh khan an lo welcome vak lo thei a. Tin, kha vengah khan engemaw tak Society-ah pawh khan ava thlen ve palh thei bawk a. Tin, khata kal tur khan an awmna veng an chhuah san a ngai a, an kohhran, an society, an thenawm khawveng an chhuah san a ngai a. An chhungte an lo phum tawhna thlanmual thleng khan chhuahsan a lo ngai a. Hetiang ni lo hian a bak zel hi chu anmahni inhmun an neihna zel ah khan IAY ang hian sak sak ni ve mai sela, Social order hi tibuai lo sela tih hmanah khan kan sawi tawh a, chu chu kan House Leader zahawm tak pawh hian chutiang chuan kal nise tih kha assurance, commitment pawh kha min pe tawhin ka hria a. Khatiang khan kal a ni ta em? tih ka'n zawt duh a.

Tin, tuna a zawhna hnunung berah khan Aizawl District kha sawilan a ni ve lovin ka hria a.Chuti a nih chuan Aizawl khawpui chhungah mimal in sak kha District dang angin a awm ve lo em ni? Tin, he hna hi a rei tawh a, sawi neuh neuh te pawh hi a tam viau mai a ni. Eng tak hi nge harsatna awm? Contractor-te leh sub-contractor-te inkara harsatnate chu kan hria a, a ualau viau a, a bakah hian hei, an achievement hi han en ilangin, Rangvamual te hi pawisa 40% an hmang ral tawh a, 80% released a ni tawh a, an hmang mek tihna a ni a. Chuta an achieve chu 20 % chauh a ni, khatiang a nih chan 100% hi pawisa lo hmang ta selangin 50 % pawh an achieve dawn hauh lo a ni, chuti a nih chuan thil diklo lian pui a awm tih na a ni a, Durtlang te pawh kha 40% an hmang zo tawh a 82% an kutah an hmang mek tawh bawk a. Chutichuan an achieve chu 30% chauh ala ni, behind lutukin an kal a ni. Heti anih chuan a project hi a hlawhtling dawn lo lutuk tlat mai a, chuvang chuan heng laiah hian thil fello eng nge awm, engtia tih tur nge ni ang tih hi ka hre Chiang duh a ka'n zawt a ni.

Pu T.T.ZOTHANGSANGA : Pu Speaker ka lawm e. ka zawhbelh duh chu hei hi a ni. IHSDP hnuai mirethei in sak District Headquarter a kan neih mekte hi chhunzawm tumna a awm em? tumna awm nise DPR ruahmanna a awm em?

Pu JOSEPH LALHIMPUA : Zawhna ka siam tho nain ka zawhna a chhuak lo pawlah a tang thin a, remchang ka'n la anga. Pu Speaker, thil pahnih ka zawt duh a. Pakhatnaah chuan kan Minister zahawm tak khan Lunglei District ah chhungkaw 500 tan ruahman a ni tih kha a sawi a tunah sawn an sa nual tawh a, luah pawh a awm teuh tawh a, colour design inangin an hnawih a, khawpui pawh a cheiin a mawi a, a luahtute an lawmpui awm hle in ka hria. 2008 a sorkar thar a lo pian hma khan chhungkaw 200 pek tumna a awm a thlan lailawk pawh an ni tawh a Lunglei Dist. ah sawn. Sorkar thar a lo pian hnuah khan 300 dang pek belh a ni leh ta a. Lunglei khawpuiin 500 a chan tur kha sorkar hmasa ah khan tihtlem (diversion) tura ruahman a lo ni nge tih kha politics ah zawhna leh inbeihna a awm zeuh zeuh a, kan Minister hian he House zahawm takah hian chiang takin min hrilh sela ka duh a.

Pu Speaker, pahnihnaah chuan, In an sa a, contractor angin anmahniin an enkawl a, cheng nuaikhat leh singhni singthum bawrvet man a ni a In pakhat tan, an tha leh zung nen anmahni sum neih te nen thawhin cheng nuai 2 nuai 3 man hu te an sa a, an lawmpui awm hle a. Amaherawhchu, harsatna tam tak an tawh zinga pakhat chu he House zahawm takah hian han tarlan ka duh a, mirethei In sakna tiin a hming kan han phuah a, an In sakna tur thing an han phur dawn a permit neih a lo har angreng khawp mai a, permit an neih pawhin royalty tam tak chawi a lo ngai a. Hei hi EWS Housing scheme ang chi mi harsa leh tlema In leh lo nei chhe deuh te tanpui nana sorkarin a siamah hi chuan Forest Royalty awm mang lo deuh te pawhin emaw awm lo hialin emaw hetiang In sakna tur bik atan hian ruahman theih a ni angem? Tawng mawilo nilo sela, chhungkaw harsa ve tak takin thing an han tan a, thingtlang kilkhawr deuh hlekah te an phurhnaah department-ten dan ang takin Royalty intuk a lo ni a, an royalty intukte hmu chhuak turin tan an lo la bawk si a. An han inman a, an harsatnate a hminga bialtu MLA kan nih venahte an han thlen a, kan hotute hnenah ngen sak te a lo ngai leh thin a. Hralh sum tur leh hlawkna atana hman tur nilo In sakna atan hian an thingzaite hi a thlawna tih dan a awm thei em tih kha he House zahawm takah hian ka han sawi nawn bawk a ni. Ka lawm e.

SPEAKER : Awle a chhang turin a changtu Minister zahawm tak i lo ko ang.

Pu ZODINTLUANGA, MINISTER : Pu Speaker ka lawm e. Zawhna neitu member zahawm tak Pu Lalduhoma rawn sawi kha a dik khawp mai a, helaiah pawh kan sawi tawh a BSUP tuna kan scheme hi. BSUP scheme-ah hi chuan Central sorkar-in a Slum a awm lohna tur atana ruahman a ni a, slum area mirethei tak takte hmunkhatah a chhawngah In leh lo an neih theihna tur atana space te a constrain tawh avangin scheme an siam a ni a. Chutiang chu Mizoramah pawh nichina kan sawi tawh ang khan Lawipu, Chite, Rangvamual leh Durtlang ah te kan han sa a ni a. Helai House ah pawh kan sawi tawh a, scheme avail leh turte pawh a awm a, amaherawhchu he House zahawm takah a that loh zia an sawi avangin hemi BSUP scheme hi chu kan kalpui tawh lova DPR pawh kan thawn tawh lo a ni.

Amaherawhchu, chutih lai chuan Pu Speaker tuna kan sak sa tawhah hian rawn dil hi an tam tawh mai a, mirethei tam tak Aizawl khawpuiah an awm a chungte chuan mahni In leh lo din chu sawi loh ram pawh neilo hi a tam zawk kan ni a. Kan awmna vengah ngei pawh mi inhnuai chep tak tak karah chhungkaw tam tak tuna kan sak aia te-ah te pawh chhungkaw tam tak an awm a ni. Chungte chu mahni In leh lo neihna tur hmun leh ram neilo hi a tam zawk an ni a, chuvang chuan ngaihtuah that leh hi a tha zawk em aw tih te pawh a department ang chuan kan ngaihtuah hial a ni. Mi rethei tam tak In han sak sak kan tum a, sakna tur hmun an nei tlat lo mai a ni, chu chu rilruah pawh lo awm sela.

Tin, Aizawl khawpui chhungah nichina kan member zahawm takin a rawn sawi ang khan Central sorkarin scheme thar a rawn nei a RAY kan ti a, Rajiv Awas Yajona, chumi hnuaiah chuan tuna kan sawi ang chi anmahni rama In sak sakte leh a combine ang chite pawh pilot project kan han siam a, N.E. ah a hmasa ber kan nih avangin min rawn sanction tawh a. Tin, district zawng zawngah Mizoram tan bik chuan he RAY scheme hi min phal sak nghe nghe a ni tih kha ka rawn sawi duh a.

Tin, kan member zahawm tak Pu Duhoma kha a scheme a project kan rawn sawi kha a hriat fuh loh nge ni ka ti a, pawisa 82% entirnan Durtlangah kan hman kan tih kha fund an rawn release tawh 40% atanga 82% kha an hman a ni. 40% a total cost atanga kan hmuhah khan 82% kha 40% atang chauhin a ni kan hman kan tih kha, khalaiah khan memberten ziaka en loh hi chuanin hriatthiam a har deuh pawh a nianga, an pawisa release atanga 82% a ni khalai kha ka rawn sawi duh a. Tin, harsatna kan nei, kan contractor-te Central-ah Internet kaltlangin National tender an ko a, an rawn chhang a, heng company-te hian an hmu ta a. Mizo-in kan inzir ngai em em chu Pu Speaker, he house zahawm taka sawi ka duh chu, sum kan lo nei em em mai a ni. Heng hna lei tur hian cheng nuai sawm tam takte kan Mizo faten khami hnathawk tur khan an lo thap a ni. Khami hna thawk tur khan nuai sawmhnih sawmthumte an lo va dahkham a. Chungah chuan hemi an contractor-te hi rinawm lo tawk te an lo ni a, entirnan Lawipu ah te phei chuan kum thum ngawt mai hna kan chawl a. Heng kan chawlhna chhan pawh hi tuna kan kal ang hian kan sorkar tirh khan kan kalpui thei a ni. An contractor-te hi terminate a contractor dang la leh turin kan nawr thei. Amaherawhchu, kan Mizo Aizawl khawpui chhunga mite, kan Mizo fate an nih avangin pawisa an lo va deposit lawk a kha, an chan kha kan uipui si a, chutiang chuan an chan lohna tur atan kan ti a, a project pawn tuar deuh mahsela kan Mizo puiten an sum tam tak an hloh ai chuan tiin nasa takin kan tang a. Amaherawhchu, a tawp a tawpah chuan contractor chu terminate loh theih loh in vawiinah kan awm ta a. Hei a dawt lehah te pawh department te leh HPL te nen ruahmanna kan siam a, Lawipu leh Chite project te pawh tunah hna a kal tan leh a. Chutiang chiah chuan Rangvamual leh Durtlang-ah hian harsatna kan han nei leh a. Hemi kan sak dawn hian warning te kan inpe a, kan Engineer te leh kei ngei pawn chanchinbu ah te ka sawi a. Hengah hian sub-contractor te hi lakloh kan duh a ni tiin. Chumi kan sawi hre ran chuan mi engemaw zat ten cheng nuai 10, 20 te va deposit in hna kha an lo va lei leh hram a. Chungte pawh chu vawiinah hian kan harsatna chhan te pawh a ni tih kha he House zahawm tak hi ka han hrilh duh a ni.

Kan member zahawm tak Pu TT Zothansanga zawhna kha IHSDP hnuaiiah hian scheme thar siam hi a awm tawh lo a. Amaherawhchu, kan Officer-te, kan Department Officer te heng an hnathawhnaah hian an thawk tha em em a, mirethei in sak District hrang hrangah record time in an zo a. Central atanga monitoring team te pawn tha an ti a, meeting an neihnaah State dang tam takin he IHSDP scheme hnuaiia pawisa an hman hman loh tam tak chuang a kha kan department official-ten meeting-naah te an sawi a, Saitual-ah te, Saiha-ah te scheme rawn siam belh rawh u an ti a an siam belh a. Chu chu Central a HUPA a sanctioning committee chuan an phal a, an sanction tawh a ni. Saitual, Lawngtlai-ah leh Saiha ami turte kan scheme siam thar a te kha. Amaherawhchu, Finance Ministry lam atangin state dang pawisa hi engatinge Mizoram tan state dangah a hman theih loh tiin waviin thleng objection an siam a. Hei kan officer-ten theihtawpin an bei a, meeting an neihna apiangah nawr chhuah an la tum a. Central Sanctioning committee-in a, HUPA Department in a an sanction tawh pawisa a ni a, Finance Ministry lam atang khuan kha pawisa kha State dang pawisa chuang Mizoram-a an thawh that avanga an lo hman ngawt a kha an lo reject deuh lai a ni a, chu chu tuna kan dinhmun chu a ni tih kha ka sawi duh a.

Tin kan member zahawm tak Pu Joseph Lalhlimpua zawhna kha ni e, Lunglei kha kan han sorkar tirh phat khan Lunglei tana unit zanga, chhungkaw zanga awm tur kha khaw hrang hrangah District-ah sem darh tumna a awm a. Amaherawhchu, kha kha sorkar tharah chuan phallovin Lunglei khawpui tan anihna ang anga hman theihna tur atan ruahmanna kan siam a ni tih kha he house zahawm tak hi ka hrilh duh a. Tin a rawn sawi thing harsatna kha a dik khawp mai a. Kolasib-ah bul an han tan a, kan project kalpui dan hi Pu Speaker, sanction kan neih hian 1st instalment te, 2nd Instalment te a rawn kal thin a ni a. Chuvang chuan, beneficiaries zawng zawng hi 1st installment-ah pe vek lo ila, a chhan chu central sorkar atangin 2nd instalment a rawn kal chhung te, monitoring an rawn tih chhung te leh keimahni state sorkarah pawh pawisa min rawn realease chhung te a rei thin si a. Chuvang chuan kan mirethei beneficiaries te hian harsatna an tawh ang tiin mi zawng zawng thlang lovin 1st installment ina pawisa kan hmuhin a complete theih tur angin beneficiaries te kan thlang ta a. Entirnan, 20% min rawn release chuan 20% in a complete theih tur a kha beneficiaries te kan thlang ta a. Chutiang chuan kan pawisa pekte kha an zawh ngei ngei theihna tur atan ruahmanna kan siam a. Chutichung chuan Kolasib-ah te kan zuk thet ta a. Pawisa an dawn kan han release rual khan thingzai man ₹ 250 te kha ₹ 600, ₹ 700 ah te a chho ta dawrh dawrh mai a ni. Chuvang chuan, a Department angin ruahmanna thar kan siam leh a District dangah chuan, khami first installment pawh kha vawikhata release tawp lovin a tahtawlin kan release a. Hei hi hrethiam lo pawh tam tak an awm a. Amaherawhchu, kan beneficiaries-tena harsatna an tawh lohna tur atana kan tih a ni a. Chhungkaw engemaw zat hnenah pawisa hi kan va release phawt a. A mamawhten thingzaita emaw an han lei a, chumi hnu-ah a dang kan release leh a. Chutiang a nih loh chuan a demand kha a sang lutuk a, thingzai-te leh perek engkim mai kha a to ta thin a ni. Chutiang chu kan pumpelh theihna tur atan kan ti a. Pu Speaker, Serchhip-ah phei chuan kan Forest hotute nen kan tang ho tha a. Forest hoten thingzai-te min lo lakkhawm sak a. Chutiang chuan ruahmannate kan siam a.

Kan Member zahawmtak sawi kha a dik khawp mai a. Mi retheitete anmahni insakna tur pawisa kan release a. Pu Speaker, heng kan release dan pawh hi V/C ten Bank

Account an hawn hma chuan pawisa hi kan release lova. Bank Account an han hawng a, chutah pawh a beneficiaries-ten thingzai an lei ngei a ni tih hnu-ah a Local Council emaw, V/C ten emaw hei hi an lei a ni tih an approve hnu-ah chauh an Account-ah pawisa kan thun thin a ni. Chutiang khawp chuan kan Officer-te an tang a, a hlawhtling kan ti a, India ramah pawh titha ber leh thawk chak ber leh thawk tha ber kan ni tih kha ka rawn sawi duh a ni e. Ka lawm e.

S P E A K E R : Zawhna dangah kan kal ang a. Zawhna 45-na zawt turin Member zahawmtak Pu K. Lalrinthanga i lo sawm ang.

PU K. LALRINTHANGA : Pu Speaker, ka lawm e. Minister zahawmtak Fisheries Department changtuin min chhan tur atan ka zawhna chu – NLUP implement a nih hnu hian Mizoramah sangha Dil engzatnge kan neih belh? Kan tharchhuah a pung em? tih a ni e.

S P E A K E R : A chhang turin a changtu Minister zahawmtak Pu R. Lalzirliana i lo ko ang.

Pu R. LALZIRLIANA, MINISTER : Pu Speaker, MLA zahawmtak Pu K. Lalrinthanga zawhna chhanna chu – NLUP implement a nih hnu hian Mizoram-ah sangha dil 1447 siam belh a ni a, kan thar chhuah hi a pung a ni.

S P E A K E R : Zawhbelhna, Pu K. Lalrinthanga. A dawtah Pu K. Liantlinga.

Pu K. LALRINTHANGA : Pu Speaker, ka zawhbelhna chu – sangha hi Phai sangha leh Thingtlang sangha hi a in to hleih ni in ka hria a. Mizoram sangha hi Cachar ho khuan an duh hle a. A lian phei chu a to viau thin niin ka hria a. Mizoramah a then chu Fish Fed kaltlangten Aizawlah an rawn phur chhuak a, Whole sale ten an pe a, an hralh chhawng ve leh a. A then chu Cachar lampangah an phur thla ve thung a. Cachar lampanga an phurh thlak khu Mizoram atanga an lak thlak chu an tito deuh ni tein ka hria a. Chiangkuang taka ka hriat loh avangin, kan Minister hian a hriat takin min hrih thei em ? kan beneficiaries te tan engnge hlawk zawk dawn ? tih kha ka'n zawhbelh a ni e.

Pu K. LIANTLINGA : Pu Speaker, ka lawm e. Ka'n zawhbelhna chu Sangha Dil chungchang hi Sorkar hmasa atang tawh khan, an siam hnem tawh khawp mai a. Mahse, vawiin thleng hian kan indaihlo em em mai a. Sangha dil hi sang engzatnge kan neih Sorkar hmasa leh tun Sorkarah, 2009 – 2013 ah chuan 1447 a ni a. A hma Sorkar-ah khan engzatnge kan neih tih kha ka'n zawt duh a? A vai belhkhawm a nih chu. Tichuan, District wise in min hrih thei em ? Tin, Fish Fed ho khan Centrally Sponsored Scheme kha an hmuin ka hria a. Kha kha engzatnge release a nih tawh ? release duh mang lo lek lek te kha a awm niin ka hria a. Helaiah hianin Private Sector hi kan ngaih pawimawh viau a ngaiin ka hria a. Fund te kha release that a ni tawh em ? Farm dang engzatnge CSS hmu mek tih kha ka'n zawt duh a ni. Farm engzatnge tih leh an hming te.

S P E A K E R : Kan hun a tawp tawh na a, Minister zahawmtak khan han chhang sela.

Pu R.LALZIRLIANA, MINISTER : Pu Speaker, ka lawm e. Zawhna neitu Pu K.Lalrinthanga zawhna chhanna chu a zawhna pawh a mumal chuang lo a, a chhanna pawh a mumal thei lo a ni. Thar chhuah a tam na na chuan Zorama Sangha dil neitute chu an hlawk turah kan ngai mai a, state danga kan hralh theih chuan. Chubak chu ka chhang thiam lova. Tin, Pu K.Liantlinga zawhna pawh kha a statistic tak chu ka hre lova, tunah mai hian tuna kan neih belh ringawt a kha zawhna a ni a, kha kha kan inpuahchah dan a ni a 1447 kha kan neih sa a ni a. A hma khan a tam khawp mai a engzatnge dil lo awm tawh sa tih chu ka chhang thei lova. Tin Zo Fish Fed te pawisa release duh loh lek lek ang a lang kha chu kan release tawhin ka hria. Chu chu ka chhanna a ni e.

Pu K.LIANTLINGA : Farm, Central sponsor scheme hmu kha engzatnge awm? A amount leh hming min hrih thei em? tih kha a ni a.

Pu K.LALRINTHANGA : Pu Speaker, ka zawhna kha a rate kha a ni a, zawhna chianglo ang a han inchhuah kha chu a fuh lo deuh hlekin ka hria, a rate kha a nia ka zawh chu.

SPEAKER : Ni e, Chair atangin ka lo hre reng a nia, Mizoram-a thar chu khuti lamah pawh a to an ti a, khuti lama thar chu Mizoram-ah pawh a tlawm deuh a tih kha a ni i sawi chu. Khatah khan Zoram-a thar kha engzatnge a rate i ti kha a ni a, mahse a tha e, a lawmawm e. Kha kha hetilaiah Minister kha a lo inbuatsaih lo a ni mai thei a, NLUP avanga dil pun zat kha zawh a ni deuh a. Heng dil pungah te hian engzatnge in thar belh tak tih pawh a ni ta bawk si lova, Zoram pum kha in zawt ta daih si a, a thiam awm tho Minister kha. Kan Member-te zingah Pu P.C.Lalthanliana a thianpa thihna chungchangah Lunglei-ah a kal a ngai thut a vawiin hi a lo kal thei lo a ni. Financial Business-ah kan kal hmian Zirtawpni a Demand for Grant 2013 – 2014 kan dawn tawhah khan tihdik ngai a lo awm palh hlauh mai a. Minister zahawmtakin a tihdikna House-ah han lay sela, i lo ko ang.

Pu H.LIANSILOVA, MINISTER : Pu Speaker, ka lawm e. Zirtawpni a Budget kan present-ah khanin Computer a lo lakluh sual palh a awm a phek number 1 leh 2 ah khanin a diklo zawk a kha Computer-ah a lo in thun a. A chhung lamah khan danglamna a awm chuanglo a, phek 1 leh tihna mai te kha a ni a. House zahawmtak hmaah hian thupha ka han chawi a. Tin, kan Demand Bu pawh kha a phek diklo lai hi siam fel vek a, kan MLA zahawmtakte pawh thlak sak thei turin Department-in ruahmanna an siam fel vek tawh a chutiang chu a ni a. Chuvang chuan ngaihdam kan han dil pahin hei hi tihdik ngai anih avangin, paw ti tak chungin, Member zahawmtakte min hriatthiamna beiseiin, he House zahawmtakah hian “A copy of the correction of scheduled of the Demand and appropriation for the year 2013 – 2014 appear in page 1 & 2 in the Demand for Grant 2013 – 2014” hi ka rawn lay e.

SPEAKER : A copy kha Member-te hnenah khan han sem rawh u le, mahni buah khan kan lo tidik mai dawn nia, hautak tham pawh a ni chuang lo. Department kha an rawn inhuam khawp a, amaherawhchu, House a lay tawh a ni a, a dik zawk a kha Member-te kan rawn pe leh mai ang an rawn ti a. Mahse Member hi 40 kan awmlai hian pawn lamah te engemawzat hi tihchhuah loh theih a ni lo va. Khatiangah khan department hrang hrangahte pawh tihchhuah a lo ni a. Tuna Minister ngenna zahawmtak kha hria ilangin member 40 te hi a bu tihdik a kha min rawn pek theih chuan lawmtakin kan pawm ang. Chu chu tunah a awm nghal pheih chuan, a bu tihdik kha min han pe nghal ula, a awm loh pawn a remchan hun hunah recess hunahte pawh (PU H.LIANSILOVA.. Awle an rawn dah tawh turah ka ngaia, Finance department lam atanga min hrilh dan chuan, a nih loh pawhin vawiinah hian recess laiin an rawn thlak thei vek ang) Awle, recess laiin an lo thlak sak dawn cheu a, a bu hlui dik lo deuh zawk kawl hnawh rengte pawh kha in duh lo mai thei a ni e, awle, a lawmawm e. Tikhan kan mam maw?..... aw recess laiin an rawn ti dawn a nih chu. Financial business ah kan lokal ang a. Tunah a pakhatna atan Supplementary Demand for Grants for the year 2012 – 2013 ah kan kal anga, Finance Minister zahawmtakin Supplementary Demand for Grants for the year 2012- 2013 hi rawn submit sela.

Pu H.LIANSILOVA, MINISTER : Pu Speaker, Mizoram Governor recommendation leh i remtihain additional grants for demand No.1, 2, 3, 4, 6, 7, 8, 9, 11, 12, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 44, 45, 46, 47 leh 48 vaibelchhe za 789 nuai 91 leh singhnih kum 2012-2013 atan ka rawn move e.

SPEAKER : A mal te tein kan la thlih thlih dawn a, tun ami kha 2012-2013 atana supplementary demand for grants a ni a. Mahse hei hi chu han sawiho vak chi pawh a ni lova, House khanin hei chu a principle leh a policy matters lampang kha a nih loh kha chuanin fact and figure lam kan lo ei zawh tawh lam thil te kha a rawn ni mai a. Sawiho tul kan ti lo thei mai lawm ni? Tul loah ngai ilangin Minister in pass rawn dil rawh se.

Pu H.LIANSILOVA, MINISTER : Pu Speaker, he House zahawmtak hian 2012-2013 atan a demand hrang hrang kan han chhiar chhuah tak ah te khan vaibelchhe za 789, nuai 91 leh singhnih hi min pass sak turin kan dil e.

SPEAKER : Le, Minister-in pass a rawn dil a, kan remti mai em? Remti a piangin remti ti ru le, remtilo kan awm chuan remtilo ti ula. He House hian lungrual takin supplementary demand for grants for the year 2012-2013 chu a pass ta a ni.

Tunah supplementary deamand dangah kan kal leh anga, hei hi chu regularization ngai tawh deuh a ni a, supplementary demand for regularization of excess expenditure during the year 2008-2009 and 2009-2010 kha Minister zahawmtakin House ah rawn submit sela, i lo ko ang.

Pu H. LIANSILOVA, MINISTER : Pu Speaker, Mizoram Governor recommendation leh i remtihain, Additional Grant for Demand No. 8, 9, 20, 30 leh 29, 33,

vaibelchhe sawmthum pakhat nuai thum singriat sangruk hi kum 2008-2009, 2009-2010 inkara excess expenditure regularise-na turin ka han dil a, House-ah hian ka rawn submit e.

SPEAKER : Le, kan tihdan pangngai bawkin kha kha chu passed nghal mai theih niin a lang a, hei hi chu sawiho a ngailo lehzual. PAC recommendation anga thil lo kal a ni a. Tichuan, passed kha rawn dil mai langin a tha nghal mai a.

Pu H. LIANSILOVA, MINISTER : Pu Speaker, Additional Grant for the no., tuna ka han sawi taka kha, excess expenditure regularisation 2008-2009 leh 2009-2010 hi he House zahawmtak hian min remtihpui turin ka rawn dil e.

SPEAKER : Awle, passed remti apiangin ‘Remti’ ti ru le. (Remti) Remtilo kan awm chuan ‘Remtilo’ ti ula. Awle, “Supplementary Demand for Regularisation of Excess Expenditure during 2008-2009 and 2009-2010” hi House-in lungrual takin a passed ta a ni.

Pu H. LIANSILOVA, MINISTER : Ka lawm e.

SPEAKER : Tin, pakhat kan la nei leh a. Khangte kha ti khan kan han passed na a, Appropriation kha phalna kan neih leh a ngai tlat a ni. Kan pawisa Demand kan passed tak kha Appropriation Bill tello chuan a la hman theih ta lova. Chuvangin kan Minister zahawmtakin “The Mizoram Appropriation (No. 1) Bill, 2013” hi introduce rawn dil phawt rawh se.

Pu H. LIANSILOVA, MINISTER : Pu Speaker, he House zahawmtak hianin, “The Mizoram Appropriation (No. 1) Bill, 2013” hi min ngaihtuhsak turin ka rawn move e.

SPEAKER : Le, rawn introduce kha a rawn dil a, kan phal sak maw? (Phalsak e) Phalsak a, rawn introduce sela, i rawn introduce nghal mai em ni tunah khan? Han introduce rawh le.

Pu H. LIANSILOVA, MINISTER : Pu Speaker, kan tihdan leh dan kalphung angin tuna Supplementary Demand 2013-2014 min passed sak tak a kha a hman phalna Bill ngaihtuah leh a la ngai a, chumi atanah chuan he “The Mizoram Appropriation (No. 1) Bill, 2013” hi kan rawn chhawp chhuak a ni a, min passed sak turin ka’n dil nghal a ni.

SPEAKER : Le, passed a rawn dil a, han sawiho chi pawh kha a ni lova, a mal mal khan khamiin a rawn funte pawh kha kan phal tawh thova. A copy kha la sem loh anih chuan han sem teh u tuna mi Appropriation 2013 kha. A puia kan tih tur hi chu 2014 a ni.

Awle, “The Mizoram Appropriation (No. 1) Bill, 2013” hi passed remti apiangin ‘Remti’ ti rawh u le. (Remti) Remtilo kan awm chuan ‘Remtilo’ ti ula. Awm lo maw “The Mizoram Appropriation (No- 1) Bill 2013” chu House in lungrual takin a Pass ta a ni.

Pu H. LIANSILOVA, MINISTER : Pu Speaker ka lawm e.

Pu C.RAMHLUNA : A diklo deuh tlatin ka hria, hemi schedule kha, 2008-2009 kha en ta ila, Demand No – 30 kha Disaster Management & Rehabilitation kha 409.00 kha voted by the Assembly tih kha alang a, mahse a total-ah khan a chhutna kha 409 kha a dik tlat lo a, ti kha chuan a total kha a tibuai ta vek a, khami kha nichina Minister zahawmtakin a tih ang khan, computer-in a tihsual a ni maithei a, khalai kha correction a ngai dawn tlatin ka hria a, hemi 409.00 ni tur kha 409 kha a rawn lang ta chuah a, tin, chutiang tho chuan schedule hovah khan 2009-2010 ah khan, Soil & Water Conservation-ah khan 55.00 voted by the Legislative Assembly tih kha a ni ta a, a total-ah khanin 55 kha a rawn lannaah khan a dik leh tlat lo a, ti khan chuan a total kha 91.16 a ni thei dawn ta tlat lo a, khalai kha correction kan siam loh chuan, tunah kan siam mai loh chuan Pu Speaker , hetiang kan hawn dawn anih si chuan, kha mi kha a figure diklo kha kan kaw l thup dawn ni hian a langa, helai hi a siam fel theih dan tunah hian a awm mai nghal em? tih kha ka'n zawt duh a ni.

SPEAKER : Minister-in sawitur a nei em?

Pu H. LIANSILOVA, MINISTER : Pu Speaker, computer han chhut a eng emaw lo fello palh hi a awm leh hlauh thin a, tuna a sawi kha chuti mai chuan ka zuk locate mai thei lo lehng hala, a diklo chu siam dik mai tur chu a ni anga.

Pu C. RAMHLUNA : Demand No – 30 kha, Disaster Management & Rehabilitation kha...

Pu H. LIANSILOVA, MINISTER : 2008 -2009 maw ?

SPEAKER : 2008-2009.

Pu C. RAMHLUNA : Column no – 3 kha en ta ila, DM & R kha 409.00 kha a ni ta a, a total-ah khanin a dik ta lo a ni. 409.00 kha lang phei turin an daha, khalai kha siamfel ngai lai chu a ni ta a. Soil & Water Conservation ah chuan 2009-2010 ah pawh khan Demand No – 33 tho kha Soil & Water Conservation kha 55.00 tur kha a nih lai khan a total ah khan 55 kha a rawn lang ta tlat a, a point lamah a rawn kal ta a, khalai kha siamfel mai nise.

Pu H. LIANSILOVA, MINISTER : Pu Speaker, hei hi chu Appropriation Bill a han chhutah khan computer alo sual palh a nih hmela, a awm danah hian, chuang chuan correct nghal mai niselangin kan member zahawmtakten, mahni chan theuhah khan min phalsak chuanin, hetah kan move-naah kha chuanin, heng hi a dik thoin alang a. Chuti a nih chuan Disaster Management 409 kha a total-ah khan, a dahna dah pheia, aw chutianga tih ni selangin. Tin, a chhutah hian alo tawlh phei a, chutiang baw chuan 2009 schedule section-ah pawh khanin Soil & Water Conservation kha, a awmna a kha a point 55 ni awm tak lamah khan a awm hlauh mai a, a column tlakna a dik lova, member zahawmtakten min remtih sak chuan, mahni chanpual theuhah khan han correct selangin, tichuan department-in kan move-naah pawh hian kha kha chu a dikin a awm tho a,

SPEAKER : A total-ah a buai chuang lo a ni lawm ni, a position mai a kha a ni lawm ni.

Pu H. LIANSILOVA, MINISTER : A location te reuh mai a kha a ni, a place a kha.

Pu LAL THANHAWLA, CHIEF MINISTER : Pu Speaker, a pawl zawk chu a diklo hrim hrim hei hi, hetiang hi figure placing awm dan tur a ni lo hrim hrma, hetiang hi an detect tur a ni a, an detect lo hi a pawl em em a ni. Hei hi figure a bik takin rupees placing awm dan tur a ni lo hrim hrim.

SPEAKER : Aw, i ti tha e, kan Chiang e. Tun hnuah chuan a awm tawh lo ang. Ti Khan Appropriation Bill (No 1) kha, (No 1) a ni lawm ni tuna kan tih kha. (No 2) chu nakinah tun thla ni 28 lam daihah a ni, Khang lam pang kha chu kan tih dawn ni. Chuan, ti Khan Member -ten House minrawn var chhuah a, uluk takin, in lo chhiar a, a lawmawm khawp mai. Tichuan, kha kha kan ngaihtuah ber a ni tawh lawm ni? Passrawn dil tawh mai sela, kan pass tawh em ni? Chuti chu a dang kan la nei, (No 2) kan la nei. (No 1) kha 2008 tih lam daih kha a ni a. Hei 2013 lam hi kan la nei leh tawh em maw ni le? Pawisa tam zawk kha. Ngun deuhin kan Member-te Khan lo en leh rawh u. Ti laia chhut tawh dik lote kha.

Pu H LIANSILOVA, MINISTER : Pu Speaker, 2013 kha chu min pass saktawh a, tuna mi hi 2013 Regularisation kha tuna kan han sawi kha a ni a.

SPEAKER : Aw, rice stock tur kha maw? 2008-2009 ami daih zawk kha. Bill 2, 'The Mizoram appropriation (No 2) Bill. 2013' hi Minister zahawm takin introduce rawn dil sela.

Pu H. LIANSILOVA, MINISTER : Pu Speaker, he House zahawm takah hian 'The Mizoram Appropriation (No 2) Bill, 2013' hi ka rawn introduce e.

SPEAKER : A copy kha han sem rawh u le. Bill No 2 zawk kha. Member-te Khan ngun deuh Khan lo en leh ulang. Tikhan a changtu Minister zahawm takin a rawn introduce ta a, tunah pass turin rawn dil nghal se, sawiho pawh a ngai em ni? Dil mai rawh.

Pu H. LIANSILOVA, MINISTER : Pu Speaker, he House zahawm tak hianin 'The Mizoram appropriation (No 2) Bill, 2013' hi min pass sak turin ka han dil e.

SPEAKER : Aw le, 'The Mizoram Appropriation (No 2) Bill, 2013' hi pass remti apiangin "Remti," ti ru le. Remti lo kan awm chuan "Remti lo," ti ula. Kan awm lo maw? Le, "The Mizoram Appropriation (No 2) Bill, 2013" chu House-in lungruah takin a pass ta a ni.

Pu H. LIANSILOVA, MINISTER : Pu Speaker, ka lawm e.

SPEAKER : Tunah chuan, Annual Budget For the Year 2013-2014 General Discussion kan lo nei tawh ang a. Member-te khan sawi theuh kan duhin a rinawm a, eng anginng e hun kan inpek dawn, Minute sawm a tawh em? Ti mai ang u aw, hun dangah pawh minute 10 kan ti thinin ka hria. A group Leader deuh kha chu minute 15 te pawh kan han ti a. Ti khanin kan sawiho tan thei ta a ni mai a. Tunge han sawi hmasa dawn le? Han tan tur kha. General Discussion Annual Budget bu kha, tun tum phei chu a lawmawm khawpin ka hria. Engemaw fuh lo palh thut a lo awm kha chu thudang ni selangin kan Budget a bu kha tun tum phei chu a lawmawm khawp in ka hria a. Eng emaw fuh lo hret a lo awm palh kha chu thu dang ni se, kan budget bu hian a rawn fun kim ta em em mai a. Khatianga Performance Budget kan tih ang chi te, tin kan work plan lo awm leh tur te leh statistic bengvar thlak tak te, thil hrang hrang hi a rawn fun tha tawh khawp mai a. Tunhma kan MLA hmasak ve ber tuma kan budget pharh te nen kha chuan a inanglo tawh khawp a, hei a note beng var thlak tak tak hi a rawn nei teuh tawh mai a, a lawmawm hle a. Kan ngaihtuah let a keini lam hian budget va pharh thuai thuai tur hian kan va nawr a Finance lam hi, anni hian chhut tur a tam khawp mai an rawn ti a. Hei an rawn pharh meuh a, min ah haw tir han en hi chuan chhut tur hi a lo tam hle a lo ni mai a, fact and figure kha a lo tam em em mai si a, mahse tiang hian a hun takah an rawn pharh thei hi a lawmawm hlein ka hria. Tunge sawihona han tan dawn le, ban han phar teh u, han sawi ho map map teh ang. Minute 10 kan pe ang a, minute 8 ah bell kan tiri ang, Pu P.P.Thawla.

Pu P.P.THAWLA : Pu Speaker, ka lawm e. Kan sawi hmasa ber mai ang a. Pathian leh bial mipuite duhsakna avanga tun Mizoram State term 6 na Budget Session hnunung ber sawiho theia ka tel hi lawmawm ka ti a. Chutih rualin kan Finance Minister zahawm takin he kum hnunung berah hian full budget a rawn pharh thei hi lawmthu ka sawi hmasa a ni.

Ka'n sawi hmasak ber duh chu kan budget te mahni phak tawkin kan han thlir kual vel thin a, rilru a awm reng ka hriat thiam loh tarlan hmasak ka duh a. Mizoram hi Govt. of Mizoram kan nihna hi kum 40 a ni tawh a, UT kum 14, State ah kum 26 kan kal tawh a. Sorkar hnathawk Non-plan chhung a mi pension tawh an ni emaw thi ta te leh lo bang ta mai pawh tam tak an awm a, an thawh chhunga an hlawh lo lak thin pawisa kha thingtlang mi te chuan awm reng turah kan ngai a. Chutih laiin post ruak lo inkhawl zelah khanin a then chu dah khah loh pawhin a kal theih mai a. A thenah chuan mamawh ngawih ngawihthe a awm baw si a, hetiang zawng zawngah khan dah khah theih loha a awm tlat mai hi ka hrethiam lo khawp a, hei hi min hrilhfiyah atan tha hlein ka hria. Tehkhin nan pakhat han sawi ta ila, Zawngling Private H/S Headmaster ka nih a clerk atana kan lak kal zel a provincialised anih hnu khan school clerk-ah lak a ni a kum 6 vel a service hnu 2001 ah khan a thi ta a, tun thleng hian kha hmun ruak kha dah khah lohin a awm ta reng mai a. Govt. H/S ve lem clerk nei lo va kal tak reng mai te hi eng nge maw a awmzia ni ta le ? Tiang te hi a bik takin mamawh ngawih ngawih te hi chu dah khah dan a awm mai lo em ni tih kha ka ngaihtuahnaah a cham reng a ni. Tin, a dang dang chu kan sawi kai seng lo mai ang a hun hek lo zawngin, kha kha tehkhinna pakhat ka sawi duh a ni a. Chuvang chuan Non-plan chhung ami ngaihtuah chawp pawh ngai lem lo, sorkar sanction tawh, hlawh pawh an lo lak mek tawh, a thawktu awm

tawh loh vanga a hlawh kha thup bo tak daih mai, zirna school-ah te indaihlo tam tak a awm a. Chutiang chu dah khah theih loh a a awm tlat mai thin hi a pawl ka ti angreng a, hei hi engtia tih chi nge maw ni le tih kha ka sawi hmasa duh a ni.

A dawt leha chuan tunhnai thil thlengah, hmani March ni 7-ah khan kan Mizoram khawpui dai maiah khan hel te, silai 33 lai nuai 118 man hu ang vel kha man a ni ta kha a lawmawm ka ti hle mai a. Tiang thil tha lo, ram tan development pawh ni lo, ram tana thil hlauhawm leh thil tha lo ni thei kan Assam Rifles hote leh Special Narcotic Cell hoin an lo man hlauh mai kha lawmawm ka ti khawp mai a. Assam Rifles lam phei chu kan sawi pha lovang a. Special Narcotic Police lam ho hi an Rank indawt dan ang zel hian promotion hi pek ni hlawm sela a va lawmawm dawn em, tih thahnemngaih thuah ka sawi duh a ni.

Tin, a dawtleha ka sawi duh chu hmani khan rama hnathawk lai mi panga Tripura Hel hovin an rubo ta daih mai a. Tugin chanchinbuah pawh khan himin an awm a, mahse hmuh an la nih loh thu kha tarlanin a awm a. Hei hi kan Sorkar hian chhanchhuah dan tur hi engchen nge ngaihtuahna an sen tawh aw. Home Minister level-ah te, Chief Minister ho tein vawi engzat nge hengho chhanchhuahna tur hi ngaihtuah a nih tawh tih hi House-ah ka sawi lang duh a. Hunthar vanga hmeithai nu phei kha chu a fa, chhungkaw eizawngtu ber pahnih te kha an awmlo ta daih si a. Amah leh an farnute ho kha an mangan dan tur zia te rilruah a cham reng thin a. Kha kha vawiinah kan House zahawm takah hian an nih chin leh Sorkar hmalak tawh dan hi hriat a chakawm hlein ka hria a, ka'n tarlang duh a ni.

Tin, a dawt leha ka sawi duh chu, hriselna lampangah hian eng Sorkar pawh hi kan ramah lo ding ta sela ngaihpawimawh anih phawt chu ka ring a. Tun Sorkar pawn theihtawp chuan a ngaihtuah tho chu ka ring. Chutih lai chuan thingtlang bialtu lo nih takah chuan kan biala thil awmdan te, bial kil ve tho kan nih puite dinhmunte House-ah hian sawi rik nawn fo hi thil tul niin ka hria a.

Saiha Hospital hi Mizoram-ah District pathum chauh kan neih laia 1978 bawr vel lai khan tuna kan building neih lai hi kan hmang tan tawh niin ka hria a. Amaherawhchu, District Hospital -ah hian kan building hi a chhe ber a nih tawh ka ring a. A chhung management te pawh building alo tawp rual rual hianin kan hmanraw neih kan khum te leh thil dang dangte pawh hi a tawp hle tawhin ka hria a. Enggemaw, Saiha District a kan zin nikhua-a damlote kan han kan kual hian thawktute sawirik hi ka hre fo a ni. Lehlamah ram roreltute zinga lo tel ve takah chuan kan Sorkar tan a mualphothlak in ka hria a. Thil zahthlak a niin ka hria a, damlo ho tan pawh a vanduaithlak a. Doctor-te leh Nurse-te, thawktu dang dang tan pawh hetiang hospital tawp taka thawktu nih hi a vanduaithlak ka ti hle a, chu chu ka sawi ri duh a. Chumi rual chuan, thingtlanga PHC kan lo din tawhte, Health Worker post kan lo dah sak tawhte hi kan Sorkar hian uluk taka a thumthat fo va training te pek fo va, tin, an chettlatna hmun te hi uluk taka ngaihtuahpui anih loh

chuan thingtlang mipuite hian an ngaihthahna tuartute kan ni thin a. Chu chu a paw hlein ka hria.

Saiha Hospital bikah hian term hmasa atang tawh khanin Delhi-ah Central Sorkar-ah Doner Ministry-a a project thehluh chu retain a ni, a nung reng tih hi chu kan hre thin. Mahse, Doner Ministry a thehluh tawh nung reng kha State Chief Minister ten priority pek a nih loh chuan ngaih pawimawh bik te anih loh chuan a lo chhuak mai thei thin lova. A kum a liam zel a liam zel a hei ka hriat chin leh tel chinah pawh kum sawm chu a liam mai dawn a. Hei hi engtia thur chhuah chi nge ni ang. District Council sum hmanga va tham chhuah chi nge ni ang ka hre lova. Tunah hian kan Sorkar kal lai hian tunah hian retain-a a awm chuan sorkar term tawp hma ngei hianin tender te ni hman tawh sela. Bul tan thawm ri hi District mipui te hian hre thei tawh ila tih hi kan chak em em mai a. Chu chu vawiinah he House-ah ka sawi nawn leh duh a ni.

A dang leh chuan tun Congress Sorkar kal lai hi Zoram mipuiten tawngtaia kan dil chhuah sorkar a ni tih chu mipuiten kan pawm a. Amaherawhchu, mipuiten kan beisei dan leh he sorkar chak tak tia kan lo thlir dan ang chu a ni chiahlo aniang a tih ngaihtuahna min siam sak a. A chhan chu kum li kalta chhung zawng khan mipui mahni bialte han fang ila, hmun dang dangah han kal kual ila, Aizawl town-ah pawh han vak vel ila, sorkar laka lungawi lohna leh beiseina an neih lohna lam hi sawi ri kei ringawt pawh hian ka hre zing ve tlat a. Buhfai lampanga kan harsatna te, thingtlang hovin chini kan dawn thatloh thu te, tin, chubakah eirawngbawlina hmanraw pawimawh tak mai Gas chungchanga kan harsatna leh kan phunchiarna zawng zawngte ka hre thin a. Tin, chulo lehah chuan electric eng lampanga mipuiten kan tawrh nasat ziate sawirik a zing em em mai a. Tin, kan main road chu Silchar atanga Aizawl, Aizawl atanga Saiha District, district tawp ber inkar kan kawngpui hi mipui vei vak tamna ber anih avangin mipui zin vei vak hote hian kan kalkawng that leh that loh hi tuk leh zanin kan mitin kan hmu a. Hemi chungchang thuah te pawh hian mipui hi tawng a tam hle thin a ni. Hengte zawng zawng han ngaihtuah hianin hun leh nite a lo inher zel a, harsatna tam takte pawh a lo thleng zel te pawh a ni ang a. amaherawhchu, chungte chu kan control phak a ni lova. A mipui hi kan vanduai hrim hrim nge nia a, tin, sorkarna siamtu party hi kan vanduai hrim hrim nge nianga? Tin, sorkarna siamtu party hi an vanduai hrim hrim nge niang? Tun term-ah hian harsatna hi mipui kam titamtu a ni hi paw ka ti a. Beisei dan ang chu nilo hlein ka hria a, minute 7 ka sawi tawh a Pu Speaker, chuvang chuan, helai hi he hun tlemte chhung pawh hian sorkar hian tan kan lak tha hlein ka hria.

Tin, a dawt lehah NLUP chungchang thuah hmannah khan Governor zahawm tak thusawi laiin opposition group pakhat chhuahsan hial alo nih thu tlemte han tarlan leh ka duh a. Hemi policy tha tak nisi hi mipui a dawngtute lamah bial kan fan nikhuaah te hian mi an zawt thin a. Tin, chubakah tha an tih thu leh thalo an tih thute kan lo ngaihtla ve bawh thin a, hemi chungchangah hian bialah chuan sorkarna party a awm ve reng thin, rinawm ve, thahnemngai taka lo nghak ve thin, NLUP dawng ve phu ngawih ngawihte pawh dawnglo

hianin sorkar hnathawk nupui te, an fapa te, an fanu te hnenah NLUP hi pek a ni a. Chungchu an rilru nat thu hi mi an hrilhchhawng leh thin a, eng kan tithei chuang si lova. Chung chu kan sorkar hnenah hian kan hrilhchhawng pawh ni ta mai sela. Chutiang avanga House atang pawh mipui tan avanga chhuahsan hial kha kan ni tih thu kha kan sawi leh duh a. Hei hi tun tuma kum hnuhnung berah hian semzawh nilo hian, thla 7 emaw vel lek a awm a. Hemi chhung hian kan sorkar hian a siamzo hman ange maw? A tawpah tih tawk tih atan sorkar leh beiseiin hmanruaah a hlawm hlawmte hian hmanhmawh taka sem mai hi a ni palh ang tih hi a hlauhawmin ka hria a. Sorkar hun tawpah pawh election te kan nei leh anga, free and fair election hi mipuiin kan mamawh a, party tin ten kan mamawh a, chutiang atan chuan rilruah hlim taka kan neih fiah theih nan ka'n sawi duh a ni. Awle, Pu Speaker, sawitur a tam hle a, mahse hun a tlem si a, kha kha ka rawn sawi theih nimai sela, ka lawm e.

SPEAKER : Demand sawi hunah, tunge sawi leh dawn le ? Pu Hmingdailova Khiangte.

Pu HMINGDAILOVA KHIANGTE : Pu Speaker, ka lawm e. Kumin kan budget hi Central Planning Commission-a min la rawn siamsak loh nimahsela, kan Finance Minister zahawm takin ngaihtuahna hmangin huaisen takin, nikum budget Plan vaibelchhe 2300 a inngatin min rawn pharhsak a, a remhriat thlak hlein ka hria a. A chungah hian lawmthu ka'n sawiduh a. Tin, chumai nilovin, nikum aia 10% aia tlemlo a punna tur hi beisei a ni bawk a ni tih kha ka sawitel duh a. Kan lawr deuh zung zung anga, Planning Commission of India chuan Mizoram hi 2002-2007 Five year plan 10-na ani ang chu, khami chhunga a than dan tur an teh khan 5.1 a ni a. Chu chu kan han thangchho zel a, 2007-2012 ah kha chuanin 8.87 kan kaichho ta daih a. (SPEAKER : Chair kan han inthlak ange aw) chuan hlawhtlinna he hmasawna hi chhuantham leh sawitham tak niin ka hria. Kan ngaihtuah loh zawng a nih pawhin ngaihtuah atan a tha hle mai. Tin, Mizoram hi India rama State hausa a ni hauh lova, state lian pawh a ni lova. Amaherawhchu, a ngaihpawimawh lam a awm a, chu chu investment a ngaihtuah a. Hei hi economy thanzelna atan a tul em em a ni. Chuvangchuan, nikuma India Today khan Mizoram hi state te te zinga investment nei tha ber an ni tih kha a puang a. Chu chu kan Chief Minister zahawm tak kaihhraina he sorkarin a thiltih a hi Mizoram tana thil tha anih avangin lawmawm ka ti a. India Today te pawn chutiang khawpa min lo notice, lawmman hial min lo pek hi kan hotute thiltih that ropui tak a ni tih hi ka sawiduhin a chhuanawm hlein ka hria a.

Tin, nikum leh a hmasa a ni ang chu India ram ropui tak Economy pawh sang tak India three Economic Giant an tih mai USA, China leh India-te nena khawvel ram ropui ber tura an buatsaih Economy kha tlem in a hniam deuh emaw ni, beisei aiin sum lamah harsatna an nei a min rawn nghawng chho va, Gas cylinder-te pawh subsidized a kan lei theih zatte min rawn bithliah a, tin, oil leh thil dang mante pawh a rawn to nghe nghe a. Mahse kan Finance Minister zahawm tak leh kan sorkar department a kan Minister zawng zawngten an department-te uluk taka thlirin kha kum harsa tak tur kha harsa lutuk lovin vawiin hi min thlen a ni tih hi kan hriat theuh atan a thain ka hria. Tichuan Economic Survey of India chuan a ram pum thanna an en a, rampum thanna 2011 – 12 inkarah chuan 5% chauh a ni mai a. He

ram ve thung erawh chu han enin 10.37 in he ram hi a thang tlat mai a ni tih kha kan hriat atan thain ka hria.

Tin Power-a kan harsatnate an sawi a, he House-ah hian Power kan harsatna sawi ringawt hi a tawh lova, Kan Chief Minister zahawm tak Pu Lal Thanhawla sawrkar hmasa khan he Power-a kan harsatna hi hriain Tuirial Hydel Project a lo buatsaih daih tawh a, detail a sawi pawh a chakawm hle. NDA sawrkar lai a ni a Delhi-ah pawisa a hmu zo lova, Japan Overseas company atangin pawisa a hmu a 1996-98 inkarah a buatsaih fel vek a, nuihzatthlak tak leh mak deuh tak chu, tuiin a chim zat turte a awm dawn tih hriain helai ramah hian huan pass neite in awm em tiin an zawng a, 48 an lo awm a, chung chu Lal lal lai hun vel atang daih tawh khan a ni. Heti a nih chuan tuman huan pass pek belh tawh loh tur tiin an dah a ni File-ah, mahse an lo pek belh, a pek belhtute pawh an suspend a nih kha. Amhearawhchu, MNF leh PC sawrkar intawm khan engkim peih, MoU pawh signed tawh, Foundation pawh Laid tawh hna tan mai tur kha zuk tan lo tlat a, kum thum an nghak a, 2001 a an han en a lo lang chu Pass 48 kha 1026 a lo ni tawh a ni. Chu chu Compensation beiseia siam an ni hlawm a ni. Chuta Lal chhungkaw pakhatin Aizawl DC a Compensation a lak ngat chuan a tam lutuk a an zawn chhuak a ni. Ramte an ngah anih chuan lo la rawh se a tha e. Saipum a ram neitute chuan a zau zawng inang rengah pawh sing thum singli an la a, Lal Chhungkuaten nuai 10 aia tam an la si a, hei hi thil mak a ni. Chung Lal chhungkuate leh chhungkaw dangten compensation an lak chu NEEPCO in crore li vela an buatsaih kha a vawi khatnaah crore 12 a ni nghal a. 36 vel lai la tur an la awm leh nghal a, NEEPCO hian tihngaihna an hre tawh lova, an hisapah crore 8 an chawi belh tawh a, heti hrim hrim chu ti khan an chawl ta anih kha. Power harsatna hi kan hria a, kan hotuten an hria a an buat saih a ni. Tuirial Hydel Project-ah khan Mega watts 60 a thar thei a chumi thar tur chu hlau niawm takin an pal darh vek mai a nih kha chuti ni lo se a commission hun kha 2004 a ni tawh a, vawiin hi chuan kan iak kan iak tawh lo tur tih hi kan hriat tlan a thain ka hria. A aia detail leh ngei awm zawk pawhin sawi a chakawm viau a, kha kha tawh rih sela.

Tin, NLUP kha ka hmaa MLA zahawm tak khan a rawn sawi a, hriat fuh loh lai hi thil reng reng chu a awm a. NLUP-in he ram tana hna a thawh that ziate chu Veng tinah hian an sawi huai huai a ni ringawt mai a ni. Tin, NLUP kan han theh atang hian Bawngnhute ringawt pawh hi vawiinah hian 2600 ltrs. in a pung tawh a ni, a man pawh a tlawm sawt tawh a ni. Chu mai pawh a nilo thlai thar leh buh leh bal pawh an thar tam lehzuat a. Buh leh bal pawh hi vawiinah hianin a thar tam entirna chu, tlang ram lo neih kha 2011-2012 inkar leh 2012-2013 inkar han en khan tlang ram lo neih hi 2670 hectares zetin a tlem tawh a ni. Chumi a tlem avang chuan NLUP atanga an lo buatsaih Leilet te leh WRC-II kan tih terracing atangten buh an thar tam em em avangin he ram hian Krisic Karma Award 2011 khan a dawn phah daih tawh bawh a ni. Chuvang chuan thil ropui, ram ropui kan siam dawn a kan hotute zarah hian, kan lawm hle a ni tih kha he House hian lo hria sela.

Pu Deputy Speaker, reference pakhat chauh. NLUP-in a ken leh pakhat chu Agriculture & Allied Activities ah RKVY Central atangin crore 62 zet kan hmu a,

heng hi thingtlangah an buh hmun emaw an huan thlai tha tak tak kawng awm lohna an lai dawn a NLUP link road, RKVY in a laih turte pawh hi thingtlanga kan mi leh sate tan a hlawk dawn a. Amaherawhchu, ngenna kan sawi duh a, kan Minister zahawm tak hian min hriat sak sela, kan mi leh sa te, a khaw neitute erawh chu min hriat sak sela a tha awmin ka hria, chu chu ka sawi theih nise ka lawm e.

DEPUTY SPEAKER : Pu S. Laldingliana.

Pu S. LALDINGLIANA : Pu Dy. Speaker, kan Budget chungchangah hian sawi tur a tam khawp mai a. A hmasa bera ka tarlan duh chu, kan plan, kan annual plan final hmaa regular budget kan Finance Minister zahawm takin a han pharh thei hi lawmawm ka ti a. Annual Plan final hmaa Vote on Account a kan kal khan kan hre vek a, hmasawna hna kan thawk chak thei lova, tin, harsatna tam tak kan nei a, sorkar kumtawp dawnah pawisa tlingkhawm tam tak kha a awm thin a, khang zawng zawngte kha tunah hi chuan Regular Budget kan neih dawn tak avang hian kan pumpelh thei dawn ni hian a lang a, hei hi thil lawmawm tak niin ka hria a, a hmasa ber atana ka tarlan duh a ni a.

Tin, a dawt leh atan chuan Pu Dy. Speaker, kan Budget hi hnathawktute thleng phak budget a ni tih hi a chiangin ka hria a. Kan Finance Minister Budget Speech ah khan Agriculture & Allied Activities atan crores 226.76 ruahman anih bakah NLUP atan crores 370 ruahman a ni a. Hei hian chiang taka a tarlan chu he sorkar hi mirethei, kuthnathawktute hmangaihtu sorkar a nih zia a tarlangin ka hria a, kan Budget hi kuthnathawktute Budget a ni ti pawn sawi ta ila a dik theiin ka hria a ni. NLUP bikah hian kum hnih liam ta khan kan hriat angin chhungkaw 96139 tuam an ni tawh a, tun kum kal mekah hian chhungkaw 29862 dang tuam tum leh mek a ni a, hei bakah pawh hian chhungkaw 15000 dang tuam leh theihna turin Planning Commission-ah hian dil leh mek a ni.

NLUP atan bikah hian crore 1085 hmuh tawh a ni a, Additional Central Assistance atangin lakh 838.82 hmuh niin CSS nena kaihkawp atangin lakh 246.38 hmuh tawh a ni a. Hemi chungchang thuah hian Pu Dy. Speaker, sawi belh ka duh chu, hei NLUP sum kan hmuh hi Prime Minister special package atanga hmuh a nilove kan la ti kan la ti mai a, eng package atang pawn lo kal sela a mamawhtute hnen a thleng anih hi chuan a lawmawm tawh a ni mai a ni lawmawm ni le, hei hi sawi tul pawhin ka hre lova, heti zat sum sawi chhuak thei Sorkar kan nei hi a lawmawmin ka hria a, vawiinah hian ka'n tarlang ve duh hrim hrim a ni.

Tin, hei hmalakna thar hmasak bikah bawng vulh te, ar vulh te leh hmunphiahte NLUP atang hian rah duhawm tak tunah hian kan hmu chho mek a ni a. Bawnghnute ah te phei chuan member zahawm takin a rawn tarlan tak ang khan hei a thar tam lutuk tawh avangin MULCO pawhin harsatna an tawh hial a ni. Hetiang khawp hian NLUP avang hian hlawhtlinna kan hmu chho a hei hi a

lawmawm tak takin ka hria a. Kuthnathawktu hmangaihtu Sorkar kan nei hi a lawmawm a ni. Tin, Kan Chief Minister zahawm tak hmalaknain January 14 kha kuthnathawktute Ni-ah puan a niin, kan hriat theuh angin Aizawl khawpui bakah District Capital zawng zawngah a rualin hman a ni a. Hemi niah hian NLUP a ti thate lawmmante sem a ni a. NLUP dawngtu kuthnathawktute hi an lawm em em mai a, kan hriat angin Sorkar hun hmasaah khan Aizawl, kan khawpuih kuthnathawktute beidawng leh mangang thinrim khan chemtum nen kawng an zawh a, thisente pawh a luang hial a ni. Vawiinah erawh chuan Pu Deputy Speaker, kuthnathawktute hi an lawm a, Mizoram pumpui Chhim leh hmar, Chhak leh thlang han kal pawh hian an lawm tak meuh meuh a ni.

Ka'n belh hram duh chu ka bial chhung bikah ka'n lut ang a, nikum kum tawp dawn ah khan Ruallung khuaah kan sem a, kan Bru unaute leh Chakma unaute an rawn kal khawm a, a then chuan ka keah min pawm a, a thenin ka kawngah hian min kuah a, ka Pu kan khuaah chuan lo kal tawh suh ang che aw kea kal a ngai a, a hahthlak si a, hei NLUP heti zat kan dawng a, in zavaiin kan vote vek dawn che u a ni, in Sorkar leh dawn a ni an ti mawlh mawlh hlawm mai a ni. Chutiang chuan NLUP avang hian Mizoram mipui hi an lawm em em a ni tih kha ka'n tarlang duh a ni.

Tin, 2013 – 2014 Budget Document zingah hian thil thar hmuh belh kan nei zel a Detail Fund released, Detail Fund transfer to Local Bodies tih kan hmu a. Sinlung Development Council tan nuai 300, HPC Lunglei tan nuai 600, District Planning Committee 5 tan nuai 500, Autonomous District Council tan an mamawh tawk sum pek an ni bawh a. Hei hian chiang taka a tihlan chu State thuneihna leh sum leh paite hi sem zai a niin a chuanhnuai ber thleng pawhin ngaihsak an nih zia hi a lang a. Hei hi hmasawna a nih rualin Pu Deputy Speaker, he Sorkar hi langtlang Sorkar a nih zia pawh a tilang hlein ka hria a ni.

Tin, Receipt Budget chungchangah hian he Sorkar hian Receipt Budget a introduce avang hian Department hrang hrang kaltlang a sum lakluh pawh a kum telin a pung chho zel a ni a. Ni kum 2012 – 2013 RE ah pawh revenue receipt leh capital receipt beisei chu nasa takin a pung a, BERE a punna ringawt pawh kha crore 506.65 lai a tling pha a ni. Hei hi thil lawmawm tak leh thil chhinchhiah tlak tak pawh niin ka hria a ni.

Tin, Expenditure Management chungchangah hian Pu Deputy Speaker, nikum Budget-a kan hmuh tawh tun Budget a lo lang leh chu Expenditure Management kawngah Sorkar hmalakna leh a rahchhuah chungchang hi a ni. Plan Fund Expenditure Control turin Sorkarin nasa takin hma a la a, administrative cost ti hniam in a tihnam turin norms hrang hrangte nasa takin a introduce a, chumi avang chuan savings pawh tam takte neiin heng kan savings-te hi tangkai takin kan hman thei a ni.

Tin, Power chungchang thuah hian Pu Deputy Speaker, sawi duh ka nei a. Finance Minister Budget Speech-a lo langah khan Power siam chhuak tura he Sorkarin tan a lak nasat zia kha a chiang hlein ka hria a. Hei hun kal tawh, MNF Sorkar hunah khan kan hre theuh a, Tuirial Hydel Project te pawh mega watt 60 pechhuak thei mai tur, kum 2004 a zawh theih mai tur tawh kha kut tlingloa sum lak duhna avangin, compensation avangin tihchhiat lailet der a ni a, hengte pawh hi vawiinah chuan he Sorkar hian a tharthawh leh tawh a, tuang tea a kal chuan nakum kum tawp lamah emaw a kumleh tir lamah emaw hian kan hawng thei tawh dawn a, engah hi chuan kan intodelh thei tawh dawn a ni tih hi a chiang a ni. Hemi chungchang thuah hian Zoram mipui hnenah pawh he House kaltlanga ka chah duh leh ka hrihl duh chu Eng (light) chungchangah hian inhnial buai inhnial buai ngai lova tute nge vawiin thleng a Eng (light) a kan la harsat chhan, a mawhphurtu hi chu a chiang em em a ni. Tuirial Hydel Project hi lo tihlawhchham lo sela chuan kum 2004 ah khan kan ngaihthlak tawh ang khan hawn a ni tawh ang a, Eng-ah na na na chuan vawiin hian kan intodelh tawh dawn a ni. Mahse vanduai thlak takin Sorkar hmasa khan kut tlinglo a sum lak duh na avang a a tihchhiat vek avangin vawiin thleng hian kan ramah hian Eng-ah hian kan la intodelh lo a ni tih hi Zoram mipuite pawh hian chiang takin hria se ka duh a ni. Tin, hemi chung chang thu ah hian he Sorkar hmalakna hi a ropui khawp mai, Tuivai mega watt 210 pechhuak thei tur hi PPP Mode a thawh theih tur hian tunah hian ruahman fel vek a ni tawh a. Lungreng mega watt 815 pechhuak thei tur te, Chhimtuipei mega watt 635 pechhuak thei tur te leh Mat Mega Watts 76 pechhuak thei tur te, Central Sector hmua thawk thei tur tunah MoU sign theih vek a ni tawh a ni. Hemi bakah pawh hian Kolodyne phase – II Mega Watts 460 pechhuak thei tur MTPC nen MoU sign fel vek tawh a ni. Pu Deputy Speaker, Hydel Project bakah hian Power siam chhuahna chungchang thua he sorkar hmalakna pawh hian tarlan a phu ngawtin ka hria. 132 K.V. Line pekchhuahna Aizawl, Kolasib te, Melriat Sub-Station atanga Luangmual Sub-Station te, Melriat Sub-Station atanga Lunglei, Khawiva Sub-Station te, heng tuna hnathawh laite pawh hi, Zoram tana hmasawna a tling a ni. A bik takin Lunglei chungchang thu hi ka sawi duh a. Lungleiah pawh harsatna kan tawh apiangin Bukpui ah a chhia, an ti thin a. Bukpui kaltlangin pek thin a nih avangin, hei hi chhim lam Lunglei chauh pawh a ni lo, Pu Deputy Speaker, harsatna tam tak kan tawh a, harsatana sutkianna atana Power siamchhuahna tur hetiang a siam a ni ta te hi a lawmawm thlawtin ka hria a.

Kum 2009 thlir kir leh ta ila. Kum 2009 kan Chief Minister zahawm tak Budget Speech-ah khan ti hian a sawi a. ‘Tluang taka kan kal chuan tun tanga kum 7/8 ah chuan kan ramah hian kan intodelh chauh pawh nilovin surplus, hralh chhuah tham kan nei dawn a ni’ tih a rawn sawi tawh kha tunah hian a tak takin a rawn thleng chho mek a ni.

Hriselna bikah Pu Deputy Speaker, Sorkar hmalakna Budget Speech a a lo lang hi a lawmawm thlawtin ka hria. Aizawl Civil Hospital khawpui laili tak maia a awm reng mai hi kan zo tawh si lova, hemi avanga Referral Hospital lama insawn phei kan tum, kan tichhote hi tarlan a ni a, hengte pawh hi thil lawmawm tak a ni a. Tin, Referral Hospital lamah Medical College kan siam dawn a ni, tih ziak kan han hmuh te phei hi chuan Zoram

tan hmasawna ropui tak a tling dawnin ka hria a, a lawmawm thlawti ka hria. Hemi chungchang thu-a thil pawt tak awm a chu, sorkar hmasa MNF sorkar bawkh khan Referral Hospital hi dan dik takin a Main Building te hi lo sak chhonzawm chu ni selang chuan wawinahn hian khum 150 chauh nilovin khum 350 kan dah thei tawh ang a, tichuan Swami Hospital base sawn Medical College kan tan thei tawh mai dawn a ni. Amaherawhchu, vanduai thlak takin sum siam duhna avang bawkin a Main Building sa duh lovin quarter lamah nasa takin an tlan a, tunah sawn khum 150 chauh a awm thei a, tunah hian he sorkar hian nasa takin tan lain Main Building sak lehna tur hian hma an la mek a ni. Hengte pawh hi vanduai thlak tak, kan ram mipui tan pawt khawihna lian tak a tlingin ka hria a, ka tarlang duh bawkh a ni.

Tin, Medical College bakah Cancer Hospital pawh kan neih theihna tur atan 40 bedded atanga 100 bedded Cancer Hospital nei theihna atan tunah hian DPR engkim peih fel vek a ni tawh a, Medical College bik tan pawh hian tunah hian DPR chak taka buaipui mek a ni tih te pawh kha ka sawi duh bawkh a.

Tin, Pu Deputy Speaker, minute khat lekin, Sports chungchang thua pawh hian kan hre vek a, khawvel el phak turin hmanrua leh infiamna sports infra-structure tunah hian nasa taka buaipui chhoh mek a ni a. Sport bika he sorkar hmalaknaah hi chuan Zoram hmun tinah hian kan thalaite hian lawmthu an sawi mawlh mawlh a ni. Tin, 2016 Summer Olympic Brazil-a lo awm tur atana kan thalai te tam tak tlin theihna tur atana ruahmanna Budget lo langte hi a lawmawm thlawtin ka hria a, lawmthu ka sawi duh bawkh a ni. Hemi chungchang thua pakhat chauh ka sawilan duh chu, heti khawpin Sports-ah hian kan thang a, hma kan la chung si hian kan Budget erawhchu a hniam tlat mai hi mak ka ti a, tihthat dante hi a awm em aw ka ti a ni. Thil pakhat chauh ka sawi ang a, Mizoram Sports Council Plan Fund hmuh dan hi promotional fund chauh ka sawi ang. 2009-2010 ah hian nuai 462 hmuh a ni a, 2010-2011 ah hian nuai 437 a ni a, 2011-2012 ah hian nuai 429 a ni a, 2012-2013 ah hian nuai 320 a ni a, tun kum kum thar turah hian nuai 125 chauh a niin a lang tlat mai a, Pu Deputy Speaker, a hmalakna leh a hmalak tum zel han ngaihtuah hian a tlem lutuk dawn a ni. Hei hi chu siam that leh dan hi awm thei se, tih kha rawtna ka siam pah bawkh a ni.

Engpawh nise, sawi tur tam tak a awm a, kan Budget hi Budget tha a ni a, kan sawi tak ang khan kan Finance Minister thahnemngaihna a lian hle a ni tih te pawh a hriat theih a, a lawmawm ka ti a ni. Ka lawm e.

DEPUTY S P E A K E R : Pu John Siamkunga

Pu JOHN SIAMKUNGA : Pu Deputy Speaker, ka lawm e. Hei wawinahn full budget kan Finance Minister zahawm takin a pharh thei hi a lawmawm takzet a, lawmthu ka sawi a. Hei General Discussion anih angin a sum lampang han pharh dan te tlem tlem ka han sawi chho phawt rih ang a. Kan GSDP hi tunah la lang chiah lo mahse nikum lam atanga teh chuan 15% vela thang turin a ngaih theih a. Kumin lamah hian vaibelchhe sangriat leh sawmkua pakhat point pariat paruk kan GSDP a ni a. Chu chu a kum hmasa lam atanga kan teh chuan zaa sawmpanga point pasarih paliin a thang a ni. Kan

Budget pharh tak atanga a lan dan khan sum kan hmuhna lampangah hian kan revenue receipt hi vaibelchhe 5039.42 a ni dawn a. Nikum lam aiin vaibelchhe 242.94 in kan hmu tam hret dawn a ni a. Tin, kan capital receipt hi vaibelchhe 413.01 a ni dawn a, nikum lam ai khan vaibelchhe 29 zet in kan sang dawn a ni. Tin, State sum bawma sum lut tur zawng zawng hi kan budget atanga a landan hian consolidated fund of the state-ah hian vaibelchhe 5452.44 a lut dawn a ni a. Nikum aiin vaibelchhe 272.51 in a lut tam dawn a ni. Kan hmanna tur lamah hian khatiang zat kha pawisa awm mahse hmanna tur lam hi a tam leh thung a. Revenue expenditure lamah hian a development component lamah vaibelchhe 3245.01 hman tum a ni a. Tah hian Non Plan expenditure ah hian vaibelchhe 1414.51 hman tum a ni a. Sorkar hnathawk ringawt hian vaibelchhe 1902.11 an hmang dawn a, Pension atana kan sum sen tur hi vaibelchhe 250.17 dah a ni bawk a ni. Capital expenditure, hmasawna lam pang hnathawhna atan hian vaibelchhe 787.72 lai dah a ni a. Kan budget hi full budget a ni a, kan Finance Minister chak takin hetiang budget tha tak mai arawn pharh thei hi a lawmawm a. A percentage increase dan pawh hi awmzia awm takin a kal niin a hriat a, a lawmawm takzet a.

Tin, heng bakah hian hmasawna tur lang tam tak a awm a, a hlawn lian deuh deuh atang chuan Sinlung Hills Development Council-ah hian cheng nuai 300 dah a ni, Lunglei High Power Committee tan hian cheng nuai 600 kumin hian dah leh a ni a. Nikum lampang khan cheng nuai 600 tho dah a ni a, hei hian District-te hmasawna tur he budget-in a ngaihpawimawh zia a tilangin ka hria a. District chauh ni loin Sinlung Hill Development Council thanna tur pawh hi he budget-ah hian a lang chiang hle a ni.

Tin District Planning Committee panga a din thu helai budget atang hian chiang takin a lo lang a, chumi atan chuan cheng nuai 500 dah a ni. Aizawl District Planning Committee a ding a, chu chuanin Municipal Council huam loh chin zawng zawng a huam dawn a, Champhai District Planning Committee a ding leh bawk a, chu pawh chuan an district huam chhunga Plan leh thildang mipui tana tangkai tur hna thawkin an hman hlel ve tawh dawn a ni tih he budget atang hian a lang bawk a. Tin Kolasib District Planning Committee a ding bawk a, chu chu khulai district chhunga plan pawimawh leh mipuite tana hmasawna tur khawih turin an ding a ni tih he budget ah hian chiang takin arawn lang bawk a. Tin Mamit District ah pawh District Planning dinin chu chuan helaiina ral khat atanga kan tih mai nilovin a hmun ngei a thawktu leh a chenchilhtuten, “planning from the grass root level” kha an khawih dawn niin a lang a. Hei hian hmasawna ropui tak tunhmaa awm ngai lo arawn hring chhuakin a lang a, a tihzia takzetin ka hria. Tin Serchhip planning board a ding dawn bawkin ka hria a, chu chuanin District huam chhunga plan tihtakzetin kha planning committee khan arawn ngaihtuah dawn niin a lang a. Chung ho atan chuan sum hi cheng nuai 500 zet dah a ni a. Hei hi thil thar he budget a lo lang ropui tak niin ka hria a, hei hianin District hrang hrangte thanna tur he budget hian arawn duang chhuak ta a ni tih kha he budget atang hian arawn lang a, chu chu lawmthu sawi chungin karawn sawi a ni.

Tin, sawrkar hi a that leh that loh kan teh dawn chuan a pawimawh hmasa berah chuan mipui hrut zawngin nge a kal hrut lo zawngin tih hi kan tehna thin a ni. Hemi ah

chuan mipui that tlanna turin engtiang zawngin nge education-ah sum a kalpui a, engtiang angin nge budget hi a her kawitih hi kan en a pawimawh a. Chumi atanga he budget-a alo lan danah chuan Education Sector-ah hian cheng nuai 26927.92 lai dah a ni. Hei hian mipui nawlpuite mamawh, an thanna tur, an nitin mamawh, an kal zelna tur atana loh theih loh thil te kha a rawn huam dawn a. General Education Higher & Technical Education te; Tin, Naupang te Scholarship an lak Post Matric emaw khang ho zawng zawng te kha a huam kim vek dawn a. Tin, chubakah Art & Culture te hei hian a khawih tel dawn a ni, hnam zia rang thlengin chu chuan he budget hi budget tha a ni tih a entirin ka hria a. General Education Sector-a a rawn dah hetiang nuai 20000 chuang lai mai a rawn dah atang hian helama hma sawnna tur chu thui tak chu a hmuh theihin ka hria a. Chuvang chuan he Budget hi han thlir hian a tha thawkhat hlein ka hria. Tin, chu chu mipui hmakhua lo ni sela, an hriseinate kan vawnpui loh chuan sawrkarin kan khua leh tuite kha hrise lo tak an nih chuan a pawidawn a, chumi a nih avang chuan he budget hian a rawn take care hlein ka hria. Health care lamah Medical & Public Health lamah hian Rs 300297 lai an dah a. Hospital and Medical Education lamah hian cheng nuai 3588 lai dah a ni bawka ni. Chuvangin Health Care hi a pawimawh em em a, hei tunah pawh Health Care Scheme lam kan kalpui a, mirethei tam takin an u leh nau, an nu leh pate na ngawih ngawih phai lama an kalpui theihte emaw an kalpui theih loh emaw chungte pawh an mahni sum chauh nilova Health Care Scheme facility an enjoy theihna tura sawrkarin a buatsaih hi a ropui a, tuna ka rawn sawi takah khan thil tam tak a tel a ni. Tin, mipuite hriseina sawrkarin a ngaihtuah zia chu ASHA atang pawhin a hria a, 978 zet chu tunah hian ASHA Worker hi an awm a ni. Khang khan Thingtlang lam a huap a, Thingtlang lam mite Damdawi Ina nau neihna chang hre lo te an hriseina tur atana Damdawi In pan nachang hre lote puiin thil tha hetiang hian an ti a ni. Khatiang khan Health Care lamah pawh nasa takin he sawrkar hi a kal a ni tih a chianga.

Tin, chulo leha chuan NLUP lamah mipuite ta tur he Budget hi ka ta a ni ti a an lo sawi ve theihna turin tunah hian cheng vaibelchhe 370 lai a lo lang leh a ni. Hemiina a entir chu Education lamah te, an hriseina lamah te, an veivah leh thil engkimah khan kan mite lo tha tlang mah sela an eizawanna lam kha sawrkar in a buaipui ve a tha e tiin he sawrkar hian hma a lakpui a ni, waviina kuthnathawktuten tunhma a theihtawp a lo bei thin ten waviinah chuan Budget-ah hian ka ta a ni tih tur an rawn nei ta a, Vaibelchhe 370 hi kan ta tur a ni tih an sawi theihna hi a ropui takzet a ni. Chuvangin mipui huapzo Budget niin ka hria a, he NLUP atang ringawt pawh hian mi tam tak an inkhai chhuak a, private resolution ah te kan la sawi dawn avangin ka sawi thui lo ang a. Tin, social service lamah pawh cheng vaibelchhe 557.36 lai an dah te hi he budget hi a tha hlein ka hria. Chuvangin he budget hi ka fak a, mipui leh ram tana thanna ngaihtuah chung leh ram economy ngaihtuah chung ranin a rawn ti a ni tih kha a lang a. Tin, waviina kan per capita income hi a ropui ta khawp mai, 2008-2009 ah khan cheng 38582 mimal tin sum lakluh a nih laiin waviinah chuan mimal tin sum lakluh chu a lo sang ta daih mai a, cheng 61731 lai kan per capita income a lo nita a ni. Chuvangin he sorkar hian a hmasawn zawngin, sum dekchhuak zawngin, mipui thang zawngin, ram thang zawngin, budget hi a pharh thin a ni tih a tilang chiang hlein ka hria a. Pu Dy. Speaker ka lawm e.

DEPUTY SPEAKER : Tunge sawi leh ang le, sawi tur in awm tawh nange, awle Lt.Col. Z.S.Zuala.

Lt.Col. Z.S. ZUALA : Pu Dy. Speaker, ka lawm e. Chutia sawi tur an awm tak lovah chuan kan tlawmngai mai ange. Hei tunkum budget hi full budget ka'n nei thei a, Finance Minister leh department te pawhin an titha hlein ka hria a, a lawmawm ka ti a. Tin, hei best performing state on investment among small state tih lawmman te kha India Today khan min han pe a, khang te kha kan hotute hard work leh an thahnem ngaihna a ni tih a Chiang hle a.

Tin, Agriculture Department bikah Krishi Karman Award 2011 te an lo la a. Kan hriat loh hlanin kan pute hian home work an lo bei nasa hle mai tihte kan han hre chhuak a, a lawmawm hle in ka hria. Tin, hei a speech ah khan Bamboo development atan hian pawisa engemaw zat dah a ni a, bamboo development hi Mizoram ah hianin mau leh thing tha tak tak kan nei a, a native species hi pawnlam atanga lakluh kan tum a hetia kan tih kan tih hian kan ram leilungte nen hian a inrem em tih te kan en hmasa em, kan pi leh putena tangkai taka an lo hman theih chi ho hi tha tak in enkawl ila kan hlawkpui ber lawm ni tih hi ka ngaihtuah dan a ni a. Tin, chutih rual chuan heng a tichhe zawnga kangmei te leh a hun loa mau sah te pawh hi phal lo ila, mau sah hunbi te hi tuk ila rawtuai khawrh te pawh hi restrict ila, a chang neilo import tum te pawh hi a tul bikin ka ring lo a ni.

Tin, sorkar hnathawk hlawh hi kan expenditure a 35 leh a chanve percent dawn a ni a, kan sorkar hnathawkte hi kan Industry lian ber an ni tih hi inhria se, an hlawhte pawh hi pumbilh vek tum bik lo hian mirethei tana, a zai zawnga an hlawhte an hman a Mizoram chhunga an expenditure te pawh hi an hman hram hram theihna tur hian hmalak dan hi zawng ila. Pawnlama thawnchhuah chingte, pawnlam mi dawr te hi a theih ang ang hian in restrict thei ila.

Tin, hei budget speech-ah khanin development council hrang hrangte, entirman, Chhinlung Development Council, Lunglei High Power leh District Planning Committee ah te pawisa allotment direct a an siam hi a tha hlein ka hria a. Power to the people tih a ni a kha kha kan sorkar laipui pawhin a duh dan a ni a. Hetiang zawnga kan sorkarin hma a la thei hi a tha hlein ka hria a, a democracy hle bawkin a lang a. Tin, hei Civil Hospital, Falkawn a zawi zawi a, stage by stage a insawn hi, hei hi kan hotute vision neih that zia hi a lawmawm in ka hria a. Hetilaiah hian kan hriat angin kan leng tawh lo a, sawtah Falkawn hmun remchang takah Hospital siamna tur hmun kan hotuten an lo hmu a. Kan sorkar hmasa khan an han sa tan a. Amaherawhchu, an sa zo hlei thei lo a, tihral hial pawh an lo tum a. Mahse vanneihthlak takin an lo tiral lo a. Sorkar hmasa khan an lo tihral hman loh avangin lawmthu ka hrilh bawk a ni.

Tin, hei SIPMIU in sewage leh sanitation system JNNURM atanga pawisa an hmuh hi a tangkai dawn hlein ka hria a. Aizawl khua hi drainage system that loh avang hian leimin leh in tlu hi a tam khawp mai a. Drainage system-te hi uluk taka kan tih chuan disaster tamtak hi kan avoid thei dawnin a lang niin ka hria. Tin, hei NLUP-ah hianin nimin

chanchinbuah hianin ka bula thu hian min hrilh a, Governor address laia kan opposition member-te an chhuah avang khan Kolasib-a NLUP a award dawng pakhat chu MNF a ni a. Khatia an walk out a hmuh khan a rilru a na khawp mai a, a awmna party a chhuahsan a, Congress Party a zawm tih thawmte ka lo hria a. Chuvangin NLUP hi chu khawngaih takin min study pui se kan opposition te hian. Tin, a funding lo kaldan te pawh hi kan sawi kan sawi a, hei kan MP, Rajya Sabha hian unstarred question-a a zawhna chhannaah khannin a funding pattern kha chianguang takin MOS for Planning khan a rawn sawi a. Khangte pawh kha an MP, Rajya Sabha hi anmahni party lam a ni a. Hengte pawh hi an inhrilh thin lo emawni chu aw. Inhrilh fing tlang se a funding pattern ah te hi chuan problem an nei lo turah ka ngai. Tin NLUP, kan hotuten a pawisa Grant an haichhuah dan te hi han sawi nawn leh hi a thain ka hria. Opposition kan nih laia kan hotuten hemi scheme hi, he project hi an lo ruahman chhoh char char a ni a. Tin kan han sorkar khan he project hi central-ah an tlanthlakpui a, an discussed a, vawi engzat nge Cabinet Secretary level ah committee an neih, vawi engzat nge Prime Minister leh Planning Commission Vice Chairman-te an hmuh, an sweat out kan tih ang tak tak khan he grant hi kan hmu chauh a ni a. Entirnan, sorkar hmasa a BAFFACOS, hei mau a tam dawn a, in mau tam turte hi engtin nge in lo preserve dawn, engtin nge in hman tangkai dawn, engtin nge mau hi in regenerate ang. Tin, in lo neih leh sazu puangte hi engtin nge in lo handle dawn tih plan rawn siam rawh u. 566 crore chuang hian an rawn ti, a lawmawm a, sorkar hian plan chu a siam a, a thehthla a. Amaherawhchu, a nodal Department, Ministry of Environment and Forest kha an hmang lo a, an thehthla tawp a, a plan kha an rawn approve nge approve lo tih pawh an umzui leh tawh chuang lo. Amaherawhchu, kumtin budget a ACA leh Finance Commission atanga pawisa crore 125 kha an hmang a. Khami an hman dan pawh kha CAG report-ah chuanin audit hleih theih loh a tam mai. Chumi ka han sawilanna chhan chu tuna kan sorkar hruaitute leh sorkar hmasa hruaitute thahnemngaih dan level hi a inang lo. Tuna kan sorkar hruaitute, kan Chief Minister te leh kan Minister te leh Party a kan hotute thahnemngaih dan, ram an kaihhruai tum dan level hi han khaikhin hianin a insanhleih hlein ka hria. Chuvangin NLUP kan hotuten nasa taka an beih hnu-a an hai chhuah te hi chu thahnemngai tak hian Opposition Party te pawh hian min support se. Mizorama kan kuthnathawktute tana kan hmalakna hi tumah hian an theihngihl thei lo, an ignore dawn lo. Chuvangin, hemi hlawhtlinna hi kan hman a, tunah hian NLUP hi kan han sem ang a, i veilama thusawitu hmasa khan hengte hi sem thuai thuai ula a ti a. Kan sem dawn khawp mai. Kan hmanhmawh vak dawn lo. Election hnaih dawnah hi chuan kan sem zo vek dawn tih kha ka'n sawi duh a ni e. Pu Dy. Speaker, ka lawm e.

DEPUTY SPEAKER : Dar 12 : 55 a ni a, dar 1 : 00 khi kan ban hun a ni a, minute 5 chauh a awm tawh a. Han inko ila, an kham lo tawk vel chiah a ni dawn si a. Minute 5 a ban hma mai hi rem kan ti em ? Anih leh chawhma kan chawl ang a, chawhnu Dar 2:00 ah kan thukhawm leh dawn nia.

2 : 00 PM

DEPUTY SPEAKER : Chawhmaah khan member 5-in in sawi tawh a, tunge sawi leh dawn, sawi tur in awm tawh lo em ni, kan bang mai dawn em ni. Pu Lalthansanga.

Pu LALTHANSANGA : Pu Deputy Speaker, kha ban mai pawh a hlauhawm a, ban aia chuan ka han ding ang a. Ka hmaah khan an rawn sawi nual tawh a, kan Budget sawi hnuhnun tur a han ni ta mai hi engemaw zawng tak phei chuan a lunglen thlak angreng hle mai a. Tun tum kan Budget Speed hi a Mizo tawngin an rawn dah a, a lawmawm hlein ka hria a, Mizo tawng khan a present dawn emaw ni chu aw kan ti a. Kan hriat angin India ramah Budget an han tih hianin rickshaw puten radio nen an ngaithla a, khawi sector hi nge ni chutiang khatiang chuan tax te sanna tur tiin India mipuite an lo inralring thin a ni a. Budget mahni hnam tawng ngeia ngaihthlak tur a han awm kha a ropui hlein ka hria a, tunah hian Mizo tawngin min han pe a hei hi a lawmawmin ka hre hle mai a. Tin, chumi rual chuan hetilaia Budget pek laite hian Translator te hian Mizo tawngin running commentry pe thei ta se chu Thingtlang kilkhawr berah pawh kan Budget-te hi an lo ngaithlain an lo hre ve turah ngai ila. Chutiang chuan thahnemngaihnaah hetilai hi ka han sawi tel duh a, a lawmawm hlein ka hria a.

Kan sawrkar hianin Budget Speech han en hianin kawng hrang hrangin hma a la nasa a. Kan sum hman dan te pawh dik zawka kalna tur atana Central-in min demand angin kan kal thei tih te a rawn tarlang a, hengte hi a lawmawm hlein ka hria a. Heng hi hetia kan han kal a Central sawrkarin min phut ang han tihhlawhtlin hian lehlamah chuanin Newspaper-ah te fakna kan han hmu chho nghal zel a ni mai a, kan pawisa hman danah te. Tin, hei kan hriat angin nichin khan Member zawhawmtak pakhat khanin Bafacos pawisa hman dan chungchang tih te i dinglam miten Opposition an nih lai hianin an sawi nasa a, financial management leh administration ah hi chuan fail an ni tih te an ti nasa a. He House-ah hian hetiang ang tak hi sawi hi a la tam lo angreng hle mai a, hetilai chhung amite chuan hria hi kan awm a ni mai thei a, chiang zawkin nakinah wind up naah te pawh han telh sela tha hlein ka hria a. Tin, a tlangpuiin hetilaia inziakah hi chuan han sawisel tur em em hi a awm lemin ka hre lova. A tha thawkhat tlangpuiin ka hria a, vote on account a kan kal lo hi a lawmawm a. Kan develop te pawh a kal chak ange tih lampang hi ngaihtuahnaah a awm a, Vote on account ni lova wawiinah Planning Commission-in kan Budget tur pawh a la rawn fix hma si a, hetia kan kal hi a tha a ni kan han tih rual hianin vote on account a kan kal avanga kan development a thuanawpna laite hi min han hrilh se tih hi kan Finance Minister zahawmtak hi ka han phut duh bawk a. Vote on account kha chen kan kal a kha, khang khan engtingge keimahni hmasawna turah hian eng angin nge harsatna a thlen tih hi ka hre duh deuh bawk a.

Tin, Agriculture and Allied Sector-ah hianin pawisa hi kan dah hnem viau mai a, kuminah pawh hian kan dah leh viau mai a. Hemiah ringawt pawh hian Nuai 500 leh tih kan dah a ni a. Hemi atanga han en hianin wawiinah kan GSDP hi han en leh hianin, kan GSDP ah hian Service sector-ah hianin 60 percent vel an awma, chutah chuan allied sector-ah hian 20 vel, agriculture-ah tak phei chi chuan 18 point something vel a awm a ni. Hma kan sawna,NLUP avang pawhin wawiinah chuan kan ram hi nasa takin hma kan sawn a ni kan han tih thin te pawh hi lehlam pangah chuan production te pawh hi agriculture-ah hi chuan kan nei lo hle a ni ang tih hi kan budget atang hian a hriat theih a. Hei chen kan kalah hian agriculture hi a ngaiin a la ding ngar ngar mai hi hriatthiam har ka ti a, hei hi engnge a chhan ni ang, hei hi turu viau tawh awm, hei term khat kumnga chhung hian vaibelchhia, nuai

sangtel chuang kan han hmu tawh a ni a. Chutihlai chuan a ngai hian kan la dinga, Agriculture ah bik pheih chuan 20 pawh kan la pha mang lo a ni a. Chuvangin kan hmasawna hian awmzia hi a nei thuk vak lo emaw ni chu aw tih tur hian a awma. Sorkarin heti lai hi engtinng e a rawn thir dan, kan budget hi a tha a, nichin khan award te pawh kan han dawng a ni a. CRISPA a engnge ni a lam hi a har viau mai a, in lawmman lak te kha, a mizo danin ka'n sawi mai ang e, khatilam kha in Mizo viau a, helam hi an vai a, Mizo deuhin in lawmman lak farmer's award-te pawh kha, khatiang ang tak a nih lai si khan hemi agriculture sector bik a kan dinhmun a tha mawh em em mai hi hriatthiam har ka ti a.

He House zahawmtakah Pathian leh bial mipuite zarah hei chen kan lo thut veah hianin helai hi ka'n hre chiang duh bawka. Tin, kuminah pheih chuan hemi scholarship-ah pheih chuan pre-matric angte pawh tel an ni hi a lawmawm a, nikum lamah khan theihngihl a ni a, kha kha a lawmawm pawh ka ti a. Tin, RFB kan han hmang chho turte pawh hi a lawmawm dawnin ka hria a, hengte pawh kuminah kan han ti chho tana, heta tang hian kan efficiency te pawh hi a tha turah kan ngai deuh hlek a. A chhan chu work culture te pawh hi vawiinah hian a tlahniam/chhe tawh hlein ka hria a, kan ramah hian thawk mang lova engkim mai hi hmuh kan tum nasa a. A hmute pawh hian an hmuh dan hi mite tana entawn tlak lem loh hi a tam hle mai tih te kan mit ngei te pawhin kan hmu ve a.

Tin, NLUP bik te pawh hian kan rilru ngaihtuahna thui tak hi a kaihruai khawlo thei a ngem aw? tih hi ka rilruah a awm a. NLUP hi thil tha a ni a, hetilai ah pawh hian a pass-tu zingah kan awma, a tha em em a. Amaherawhchu, selection an han tih dan vel erawh hi chu kan han sawisel thin a ni a. Vawiinah Zoram mipui tan hetiang hi kan han ti a ni kan tihlai hian mipui hi party member nih loh chuan mipui nih lohna emaw chu aw tih tur hianin rilruah a rawn awm thin a, chuvangin kan budget kalpui dan hrim hrim pawh hi ngaihtuah chian hle a tulin ka hria a. Heng hian kan ram hi eng angin nge a nghawng dawn tih hi nasa takin kan ngaihtuah a ngaiin ka hria. A chhan chu kan ram dinhmun, vawiina kan mipuite dinhmun han en hian kan lung a awilo niin a lang a ni. Chu kan lungawilohna chu hetia han sawi chhuah maia lang mang silo riltak maiah hian a awm niin ka hria a, eng emaw hlekah chuan sorkar thil tihchhiat rum rum te, band han neih emaw, eng emaw kan duh loh zawng deuh a nih chuan khawih rum rum duhna thinlungte hi a lo lian em em mai a. Chuvang chuan kan ram kan inenkawl na leh vawiinah kan ram kan kalpuinaah hian nasa zawka kan rilru ngaihtuahna kan hman nasat ngaiin ka hria a. Hei kan ram hi ram ral muang kan ti a, a ral muang pawh a ral muang a nia nge. Mahse, politics-ah hi chuan a ralmuang lo hle a ni tih hi vawiinah hian ka'n sawi tel duh bawka. Politics-a kan ralmuan loh dan hi chu a thuk hlein ka hria a. Political party kan zuk nihnaah keimahniah beiseina neihna tur a awm loh pheih hi chuanin, chumi awmna tur chuan chhungkua hi kan inngirngho ni hian a lang tawh a. Chhungkuaah hian demand a nasa angreng viau mai a, engemaw hmuhna tur hi. Chutiang tak chuan kan ram hi vawiinah ram ralmuang kan nihnaah hianin, Politics-ah pawh hian ralmuang se tih hi Pu Deputy Speaker, ka'n sawi lang tel duh a. Sawi tur tam tak a awm a, hun a tam loh avangin ka sawi tam lo mai a nga, ka lawm e.

DEPUTY SPEAKER : Le, tunge sawi leh ang le? In va han phar tha duh lo angreng ve. Sawi tur kan la awm em? Vawiina kan business chu general discussion kha a ni

a. Hemi bak chu tih tur kan nei tawh lova, in sawi duh lo anih si kha chuan ban mai kha a ni mai a. Pu Lal Thanzara.

Pu LAL THANZARA : Pu Deputy Speaker, ka lawm e. Hei, kan Budget, Finance Minister zahawmtak speech atang hianin lawmthu sawina tur tam tak a awm a. Amaherawchu, minute 10 chung hian chung zawng zawng chu kan sawi hman dawn lo tih a Chiang a. A hmasa bera ka sawi duh chu kan sum leh pai dehchhuah dan, kan economy dinhmun lo than chhoh dan nasat zia hi fak tlak awmin ka hria a, he Sorkar hmalakna hi. Kum 2008 leh 2009 inkara kan leiba kha vaibelchhe 85 leh point panga pariat a ni. Tichuan kan Sorkarin hma an la chho a, 2009 leh 2010-ah khan 57.55% a tla thla a. Tichuan 2010 leh 2011-ah 61.15-ah a chho leh a, 2011 leh 2012-ah 57.21%-ah a tla thla leh a. Tichuan tunah chuan 2012 leh 2013-ah hian 54.40 an hlangkai chho thei ta te hi a ropui em em a ni. Chutih lai chuan hei kan hria a, vawiin chanchinbuahte pawh kan hmuh ang khan mipui mimir hrim hrim sum lakluh te a tam chho em em a. Lirthei pung nasa lutukte hian kan economy that zia a ti lang Chiang a, mi 9-in lirthei 1 intawm anga chhut chhuah te hial niin vawiin chanchinbuahte khan hmuh a ni. Hengte hianin sum management-ah hian kan Sorkar, kan Finance Minister kaihhraina hi a rinawm tawk a ni tih a hria a. Tin, chutihrial chuan hei kan Sorkar flagship programme NLUP hi a sawi loh theih loh a. Hemi avang hian vawiinah mi tam takin eizawna rahbi an tuk thar a. NLUP puakrang hmang hian vawiinah Sorkarin hma a lak chhoh zelnaah hian, Mizoram mipui chhungkua hi chhungkaw nuai 2 leh tlem vela in chhut an ni a. Chutah chuan NLUP hnuaiah hian nuai 1 leh singnih vel cover turah khan, singthum min pek belh nen, nuai 1 leh singnga cover tur a ni a. Hemi chhungkaw zingah hian party dang, i veilam amite khan tel ve a an inggaih loh chuanin, engtingge maw politics pawh an la khelh ngam le tih hi ka ngahtuah a ni. Heti zat chhungkaw zingah hian an telve miah loh chuan, khawi ami nge maw voters an neih ang le tih hi ngaihtuah tham a tling a ni. Chuvang chuan NLUP hianin an duh emaw, duh lo emaw, a cover hrim hrim dawn. Tin, Synod Social Front-ina an zir chiannaah khan 80 something P.C. laiin Congress in an dawng a, a bak tlemte chauh kha party dang a ni tihte kha an hmuh chhuah dan a ni tihte kha an rawn sawi a. Kha kha a first phase-ah, a bul kan tanna a an endikna, a zir chianna atanga a result a ni. A bul kan tannaah kan party manifesto, kan Sorkarina flagship programme a bul kan tanah pawh, zaa zain pe lova, zaa sawmriat leh tih lek chauh ruling party-in a inpe te kha chu an fakawm thlawtin ka hria, kan fakawm thlawt ti mai teh zawk ang. Tunah hianin han zir Chiang leh sela Synod Social Front hianin, nasa takin party dang party dang hmuh percentage kha chu a sang chho tawh dawn a ni, tih hi a Chiang em em a ni.

Tin hei tunlaiin kan sawrkar sawiselna tur an la zawn talh awmchhun chu power hi a ni a, power chungchangah hian Pu Dy.Speaker, i hmalaknain MLA ho hi min zin kual tir la, hemi North East-ah ringawt pawh hianin, Assam, Shillong, Manipur-ah te kal ta ilangin engmah hai chhuah nei ve silo, thawhchhuah nei ve silo State hianin power kan neih that zia hi chu a Chiang maiin ka ring a ni. Hmanni lawkah Mizo chanchinbu nilo, hnamdang chanchinbu te pawhin Nagaland-ah te an harsat zia te Chiang takin an rawn ziaka, chutihrialin, Assam, Guwahati atanga chanchin bu rawn chhuak pawhin Arunachal-ah te, Tripura-ah te leh Mizoramah te hi chuan power a tha a, Assam-ah te leh Manipur-ah te hi chuan power hi a harsa em em a ni, tih te kha a rawn ziaka. Vawiinah he sawrkar an sawisel

thinna ber power chungchangah pawh hianin thawhchhuah nei si lo ah chuan power nei tha ber pawl zinga mi kan ni te hi, a lawmawm takzet zet a, chumi piah lampangah, power lampang tan lakna tur, he kan budget-ah hian nasa taka rawn tarlan a ni te kha, member pui zahawm takten an sawi tawh a, sawi nawn leh ngaiin ka hrelo a.

Tin, Serlui 'B' hydel project hi, House pawnah hian MNF Party leh an hotupa hmingthatna tur kan hlah avanga Congress sawrkar hian hawng ngam lovah hian min puh thin a. Pu Dy.Speaker, hemi chungchangah hian, House chhungah thudik ngei sawina tur hmunah hian, thudik sawi ngaiin ka hria a, hawn theih niselangin, hawn hi he sawrkar hianin a hnial lo a ni. Mahse hawn mai theihlohna lian tak min daltu chanchinbuahte pawh an ziah kur ngiai nguai te pawh a awm a, tin,he mega watt 12 pechhuak tura ngaih hianin tunah hian mega watt 8 te megawatt 7 te chauh a pechuak a, mega watt 4 dang pechhuak thei tur khawl hi waviinah hian hman theih in ala awm lo hrim hrim. Tin, he project tan hianin he sawrkar kallai mek hianin vaibelchhe tam tak sum a seng tawh a, vaibelchhe 100 chuang a pe tawh a ni,hemi atan hianin. Chuvangchuan, an duh chuan lo han hauh bik viau mahselangin sum leh pai erawh chu kan tum sak hnem tawh hle a ni, tih kha lo hria sela ka duh a. Tin, chutih rual chuanin, mega watt 60 pechhuakthei siam puitlin mai theih, siam puitling lo a tichhe veka, mega watt 12 pechhuak thei siam ve che che a inchhuan viau hianin awmzia a neilo a ni tih hi Mizoram mipui hian hria sela, tih hi ka duh a ni.

Tin,hei Sports lamah te he sawrkar hmalaknaah nasa takin hma kan sawn chho a, waviinah chuan Mizo tlangvalte kan zu tel vena ngai mang loh I-league qualification tur chungchangahte pawh hei Aizawl atangin club hnih laite kan Mizo tlangvalten zuk khel theiin club lartak te pawh waviinah an hneh thute chanchinbuahte kan zu hmu a, Aizawl Football Club-in Royal Wahingdoh an zuk hneh chungchang te kan hmu a. Tiang khanin India rama hmun tam zawka an la neih loh Phul lem phah kan han nei ringawt te hi a vanneihthlaka, hemi avangin FIFA pawhin Mizoram an rawn hriat phah vena angte hi a ropui tak zet zet a. Naupang zawk kum 6 – 16 inkar football zirtirna hmun tur FIFA in All India Football Federation kaltlanga min han thlang ta te hi kan sawrkarin a ngaihna hriain, Phul lemte Assam Rifle Ground-ah te leh Rajiv Gandhi Stadium-ah te min phah sak avang a ni tih hi a Chiang em em a ni. Tin, chumi piah lampangah chuan hei thalaite hmakhua ngaiin waviinah chuan kan sawrkarin zirilaite tan pre-matric, minority scholarship atan cheng nuai 116.42 an dah mai piah lam pangah foreign-a zir turte tana overseas Scholarship atana Rs 35 lakhs an dah te hi a lawmawm takzet zet a ni.

Pu Deputy Speaker, a tawp nan chuan hei, sorkar hmasa lamahte kan hmuh ngai loh, sum leh pai enkawlna chungchangah hian, felfai taka enkawl a ngai a ni tih hriain, he sorkar hianin sum leh pai dinhmun a ngelnghehna atan sum hman dan mumal leh, sum sem dan felfai leh, sum enkawl dan tur mumal zawk a awm theihna atana ruahmannna siamtu tur Mizoram State Finance Commission an din angte hi a lawmawm tak et zet a, heng hmalakna atangte hianin kan hun lokal leh zel turah kan sum lehpai hman dante, enkawl dante pawh felfai zawk a beisei awm a ni. Ka lawm e.

DEPUTY SPEAKER : Tunah chuan Pu K. Lianzuala.

Pu K.LIANZUALA : Pu Deputy Speaker, ka lawm e. Kan Finance Minister zahawm takin a budget pharh hi a ropui ka ti a. A kimchang a, hetiang taka changtlung leh tha a pe thei hi a ngaihtuahna a hmang nasa hle ang tih ka ring a. Tin, kan hriatpui loh hian a hah hle ang tih ka ring a ni. Chuvang chuan a chhuanawm ka ti a, amah mimal tak pawh ka fak a ni.

Tin, kan budget hi kum dangah chuan Vote on Account-in kan pharh thin a. Budget puitling a, Full Budget tura min han pharh sak thei hi a ropui ka ti a. Finance Minister hian hma thlir chiang tak a nei niin ka hria a. Nakina lo awm leh tur, lokal leh tur thlirin, nikuma kan budget Annual Plan-a kha chu a ngai nimahsela, za zelah sawm pung chho tura ngaih a'n nite hi a ropui a, hei hi fak tlak ka tihna em em a ni a. Sorkar tha, langtlang sorkar leh rinawm, mipui sorkar a ni tih tichiangtuah ka ngai bawh a ni.

Tichuan Pu Deputy Speaker, i vei lama mite khan, kan thar chhuah loh thil buhfai te, gas te, Central zar kan zona lamah tlema harsatna a awmin namen loin kan han indem thin a. Mahse, vawiinah hian an hnena zawhna ka pek duh a awm a, vawiinah harsatna sawi tur a awm ta lo a ni, sorkar hmalakna avangin LPG leh buhfaiah te. Hei kan veng hi Electriect veng a awm kan ni a, zing leh thim hlim a, Mike, Information-a kan hriat hnem ber chu, "LPG Gas, la duh in awm em? a duh tan duh zat zat a lak theih," tih a ni. Chu lo leh chu, "Ration buhfai, BPL a awm e," tih hi ninawm khawpin an au tak tak a ni. Venglai au kan hre pha a, Chanmari, Ramthar, Chhinga veng, Armed Veng nen. A beng chheng khawp mai, "Gas la duh in awm em tih hi," Chutiang dinhmunah chuan vawiinah kan awm chho va, amaherawahchu, ram roreltua thlante theuh kan inang khat vek a, engati nge khati khawpa sorkar min sawisel thin si leh min dem thin khan engati nge vawiinah hian he House kaltlangte pawh hian lawmthute pawh hi sawi ve se tih hi ka zawhna a ni. Chu chu an ti ngei turah pawh ka ngai a ni. Tichuan, hei kan Budget kha a changtlung tha a, kan Finance Minister inbuatsaihna a ropui hlein ka hria a, kum danga la awm ngai lo Inter-State Boundary chungchang hi resolution-te pawh a lo lut thin a, Party-ten inbeih nan kan hmang fo va, Budget Speech kan en chuan he kan sorkar hian vawiina kan sorkar hian Inter-State Boundary hi chinfel a duh a, hma a la a ni, tih a chiang em em a ni. A bul tan nan cheng nuai nga leh 84 an dah thei te hi Inter-State Boundary chingfel turin Commission a din tawh a, chu chuan chak zawka hma la turin a buatsaih a ni tih a lo lang tel hi lawmawm ka ti a, thil tha tak ni pawhin hei hi ka hria a, ka'n sawi tel duh a.

Tin, nichina ka hma ami sawi ang khan he sorkar hnuaiah hian mipuiten an chanvo NLUP leh thil dang kal tlangin an hmu a ni tih a hriatna chu thil pakhat chiang tak awm a awm a, Motor pun chak dan nichina a sawi kha a ni. Nimin lawka Chanchinbua kan hmuh dan chuan nitin hian motor 37 velin a pung a ni. Mipui hnenah rual khaiin pawisa sorkar atangin thleng lo ni se motor leina a awm ka ring lo a ni. Thildang tam tak sawi tur a awm ang, kan economy dinhmun a ngel nghet chho mek a, a thang mek a ni tih hi heta tang pawh hian a chiangin kan hria a, chu chu han sawi rik ka duh a ni. Tin, NLUP hi a tha thlawt a, mipuiin an chhawr a, ramin a chhawr a, kan opposition member zahawm takte pawn a policy hi chu thalo kan ti lova, mahse an han ti tak na a, tha an tih luat avangin ram a la chak a, thil tak tak anih avangin hei hi inthlan lo hnai nen an huphurhna au thawm a ni tih hi kan pawm a tha. A chiang em em a ni, tunah hian NLUP avangin kan thlai tharte a lo pung chho

a, nichinah kan ngaithla a, bawnghnute pawh kan duh bak kan nei tep a ni ti ila a sual lo vang. Chu vang chuan bawnghnute sawngbawlna te a thar a changkang zawka bun tum a ni a, sawi a chakawm, ka'n sawi ang a, a hminga kan bial ve Chhingchhip-ah bawnghnute sawngbawlna ruahman tum a nih thu kan House Leader zahawm tak pawn a sawi ri a. Chuta tan chuan cheng nuai 350 lai te pawh ruahman tawh a nih te kha a lawmawm hlein ka hria a, han sawi rik loh phal chi a niin ka hre lo a ni. Tin, NLUP-ah hian Pu Deputy Speaker, Zokhaw lama bawng leh sial vulhten vawiina harsatna an neih hi sorkar hian min hriat sak se ka duh a ni. Kan bial veah khian NLUP hmasaah pawh bawng leh sial vulh an hlawhtlinpui em em a, vawiin thlenga sial vulhna hmun tha Hmawngkawn-ah a la awm a ni. An harsatna chu ran tlatna hmun grazing ground kha ram a tibuai chak a, a lehlamah chuan sialte chu an kal hla si a, a pung chak bawk si a, a hungna fencing an nei lo a ni. Chu chu NLUP atang tho hian ruahman theih a ni dawn lawm ni? Chuvang chuan infrastructure component lam atangten ngaihtuahna lo hmang se tha ka ti khawp mai. Bawng leh sial-ah hian NLUP hlawhtlinna vawiinah hian a lang nasa em em mai a, chu an harsatna chu min hriat sak se tul ka ti khawp mai a, chu chu kan sawi tel duh a.

Ka hmaa mite sawi ang khan Power chungchang hi a ni. Tihian sawi ta ila , vawiina kan hotu, kan House leader zahawm takte leh kan hotute hian Power an buaipui chu 'eng' kawlpetha power hi a ni an vei a an thawh ni. Mi thenkhat hi chuan thuneihna power an buaipui mai niin kei chuan ka ngai a. Kan hre vek a 1998 a Tuirial Hydel Project, kan House Leader zahawm takte leh Central Minister-ten bul an lo tan tawh kum 10 chhunga an sawi sak dan hi chu a lungawi thlak ngang loh a ni, hre duh tan chuan hriat loh rual pawh a ni lo va. Chutiang zelin Serlui 'B' pawh vawiin thlengin eng emaw zat power han pechhuak mah sela Pu Deputy Speaker, environment clearance pawh a awm der lo va. A nihna takah chuan nichinah kan ngaithla a, khutah khuan sum a lut hnem lutuk tawh, tute hun lai khan nge khatiing taka an lo sawisak tih pawh hi chhut tham a awmin ka hria a. Kan Finance Minister thusawiah kan hmu a 210 mega watt pechhuak thei Tuivai te, Hlunreng mega watt 815 lai pechhuak theite leh a tam mai sawi sen a ni lo, power chungchanga kan sorkar leh kan hotute hmalakna hi. Kum hnih klhat chhung a heng ang project lian hi tih theih a ni lo a ni tih chu kan hre vek a, mahse mipui kan zirtir dan zawk hi a fuh lo thin erawh hi chu a pawl khawp mai. A thal a, tui a tlem a, phai lama kan lak te duh angin kan hmu thei lova. Duh duh lei theih tur anga han sawi te pheih kha chu kha mi sawitu party leh a mimal-te khan mipui an hmusit ka ti khawp mai. Bazar-a pawisa kan neih avanga duh zat zat kan lei thei ang a sawi kha chu Mizoram mipui an va hmusit e, hei hi chu thil dik hi sawi thin sela chuan an mahni pawl tan pawh a that ka ring a ni. Hetiang ang zawng hian mipui hi kan sawipui tawh loh a thain ka ring a. Ram hian hmasawn sela, changkang tak tak se kan ti a nih chuan tu policy pawh ni sela, a tha a nih chuan a thatna lai in hmuhsak hi a puitlin thlak khawpin ka ring a ni.

Tin, Pu Dy. Speaker, kan MLA Fund ve hi maw le. Fund-ah hian a hmang tha. Member zahawm takten an hmang tha tlangin ka hria a. Han pung deuh thei sela tih kha kan lo beisei dan a ni a. Kan pawisa dinhmunte leh kan economy dinhmunte a lo tha deuh bawk a. Mahse an pung lo ta hi kei ka ui deuh va, kan duhthawh deuh va. Amaherawhchu, nakin lamah te chuan a pung thei turah te pawh han ngai ila a tha ang e, chu chu a ni a.

Tin, kan Budget pum pui atanga kan han thlir khan hei a hlawm lian a, a kalna hi kan sorkar hnathawkte a ni tlat mai a ni. A tam hle mai a, a hlawm a lian a ni. Zaa 35. 4 lai mai kha salary-ah khan an kal leh dawn a ni a. Amaherawhchu, sorkarin a tih dan a thiam tur ah ngai ila, mipui chan tur a bo dawn chuang lova. Mizoram mipui hi nuai 10 vel awrh kan ni a, wawiina kan Budget en hian a tlem lem lo a ni. Amaherawhchu, a pawimawh ta zawk chu a hmanna dik a pawimawh mai a, he sorkar hian a hmang dik a, kan sawi tak ang khan ei leh bar intodelhna kawngah te, infrastructure lamah te zawi zawiin hmasawna kan neih avangin heng angah hian hman tangkai zel a ni tih a chiang a.

Pu Dy. Speaker, khawngaih takin tlemte minute 1 lek, NLUP baw kha han sawi rik leh ka duh chu, NLUP avang a wawiina kan thlai neih kan buh leh bal thar hi a pung nasa takzet a. Pangpar khawitute thleng hian a chiang a ni. Hei Finance Minister Speech-ah pawh hian a lo lang a, Zopar pawhin kum 1 chhunga nuai 3 han thawnehhuah chu avang laiin a ni. Tin, tlema an chul deuh hnu nge ka hre lova 30000 an ni leh a, Zopar a nih chu. Horticulture Department ringawta NLUP a kan hmasawna te, miin eizawna ngelnghet an lo nei a, an dehchhuah a lo pung a, an chhungkaw nun a lo changkan dan te hi thlir chian duh chuan hmuh tur hi a va tam em aw. Chuvang chuan, wawiinah hian NLUP hi Mizoram din chhuahna tak tak tura pawimawh ber a ni tih hi he House zahawm tak kaltlang hian Mizoram mipui pawn an hriat chian ka duh a. An zir chiang thawkhat tawh baw k a, kumin kum tawp inthlan turah hian hei hian hna a thawh nasat avangin tute emawni hi chu a rum thawm hian a rum thaih tawh ni in ka hria a, a ti zauthau mai niin ka hre tlat a ni. Kan bialah khian khaw pakhat ah chuan Pu Dy. Speaker, MNF chhungkaw pakhat chu NLUP an beisei loh deuh khan kan hotuten an pe ve a, a reaction kha ngaihthak a nuam ngawt mai. An nupa khan zankhuain kan mu lova kan thova mei kan chhem a kan zung leh ringawt thin a an ti. Chutiang khawp chuan an lawm a ni. Chumite chuan lawmthu sawi kan va ba em NLUP atanga lawmthu sawi tur hian a ni wawiinah hian he party dinhmun hi a that dawn ni. Chu chu lo hria a lo zam kan awm anih pawhin a awm reng a ni. A zamawm a sin an tan hian, chu chu ka sawi tel duh tlat a. Engpawh ni sela, hunte min pek belh a Pu Dy. Speaker, ka lawm a. A tawpa ka sawi leh duh chu House Leader zahawm tak rem hria leh khawthlir nei hnuaiah kan Finance Minister-in Mizoram Budget awm tawha Budget tha ber leh changtlung ber a pharh thei hi a hnenah lawmthu ka sawi a. Nichina kan ngaihthlak angin Mizo tawng ngeiin Budget hi pharh ni ve tawh se kan ti a, question-ah pawh ka pe a ni kei pawhin. Chu chu wawiinah a takin alo thleng a, English ami ang chiah Mizo tawng a member ten a bu kan nei pawh hi an thawhrimnaah lawmthu ka sawi baw k a ni, Ka lawm e.

DEPUTY SPEAKER : Sawi ngaihnawm baw k a kan khilai nasa hle mai. Le, tunge ni han sawi leh ang le? Engti zia ngeni wawiin chu in va phurlo ve? Aw, Pu Robiaka.

Pu LALROBIKA : Pu Deputy Speaker, ka lawm e. Veilam amite hi enge an nghah thin ni? ngawi leh duk thin a, lehlamah chuan kan ngaihthiam deuchte pawh an ngai a ni. Pathum laiin an sawi kha chuan party an zo der zel mai si a. Chuvang chuanin, kan hriatthiam ve deuchte pawh kha an ngai a ni tih kha kan sawi hmasa duh a. Hei wawiinah Budget tha tak mai discussion kan han nei hi a lawmawm ka ti a, vannei ka inti hle a ni. A bik takin kan Finance Minister zahawm tak hnenah pawh lawmthu ka sawi duh a, Budget tha tak

mai a rawn tichhuak a, chumai piahlamah chuan Mizo tawngte hian kan ti ve thei tawh lawm ni tia ngenna leh a tha lawm ni kan han tihate ngaipawimawhin tha tak maiin an rawn siam a, a lawmawm hlein ka hria a. Tute hunlai emaw chu nise uar takin tuilet hnuah pawh la awm ngailo an tih chhoh ka ring. Chutiang chu kan dinhmun a ni a, a lawmawm ka ti a, sawitur a tam khawp a, kan sawi seng lovang a.

A hmasa berin NLUP chungchangah han sawi hmasa ila, kan Annual Budget te chu kan hria a, NLUP kan sawi hmain khati zat kha kan nei a ni a. Tin, a pangngai ngawr ngawr tih zawngte pawhin kan lo sit a ni thei e, sit loh chi a ni ang. A lokal zel dawn ani, khulalah tute tihdan takah emaw a fun tam tak kha min la dahsak a ni tih kha veilam amite pawh khan lo hria se a thain ka ring a, chutiang chu a ni a. Tin, kan Budget hrim hrim kha nikum lamah te, a hmasa lamah te, kan hmu a. Nikumah a jump ta dawrh a, chuvang chuan, khati zat kha kan nei a ni tih kha kan sawi duh a ni. Tichuan, NLUP-ah hian kan sawitam khawp a, sawitam loh theih pawh a ni lova, NLUP hi a that miau avangin he NLUP avang hian tun inthlan by-election te pawh khan NLUP puakrangin min kap a ni, chuvang chuan kan hneh theilo a ni tihte pawh kha a awm a ni awm e. Chuvang chuan, a tha a ni. Tin, Governor Speech Motion of Thanks kan sawi chungchangah pawh khan NLUP chungchang kan han sawi a. Tin, khatah pawh khan MNF group Leader khan kei ngei pawhin ka rawn sawichhuah kha Lunglei lamah chuan ni 13 ni tain ka hria, a thusawiah chuan NLUP hi a tha a ni. Kan sorkar hunah chuan kan chhonzawm ve ang a va ti a ni, a lawmawm ngawt mai. Heti khawpa min hlutsak hi a lawmawm ka ti a. Chutihlai erawh chuan, Pu Deputy Speaker, i phalnain hetilai hi kan MNF hotute leh kan MNF party-ina an sorkar huna an tih tur tlemte kan chhiarchhuak lawk anga, Sum lakluhna bung14 an lehkhabuah chuan Mau chungchang an sawi a, 'Miin a tuai an ruk tur ven hi a enkawl ngai awmchhun chu a ni mai. Chuvangin, kan rama leilung malsawmna ropui ber pakhat rangkachak hring (green gold) ti turin Pathianin min ruatsak niin alang a ni.' a tia ni. Green gold chu Rua bandisin Rua, kha niawm tak a ni, an sorkar hmasak khan sapthei a hmingte hi an han phuah mawi thin khawp a, Pu Dy Speaker, Blue Diamond, vawiinah chuan Green Gold an ti leh tawh a nih chu ropui deuh a ni. Engpawhnise, NLUP an ngaihsan avang te, tin, MIP ah khan NLUP hmasa an chhonzawmna niawm fahrana an han tih chhoah pawh khan hma an han la a mahse tihngaihna an hre lo, Pastor pension te, kan miropui tak tak te Mizo zingah an la khawm mahse a leader ber leh a sawrkar lu berin Policy dang a lo nei zel a, kal ngaihna an hre lova an pamtul a, an bang tawp ringawt mai a ni. Chutiang te chu kan sawrkar hmasa kha a ni, a ropui vak lo. Vawiinah erawh chuan kan sawrkarin heng mite ber chungah in tih hi ka chungah ti in ni tih Lal Isuan he leia a lo kal laia a sawi ang zulzui leh khami hrereng chung leh tawngtai chungin NLUP tha tak mai an din chho a, vawiinah pawh hian chhungkaw 96139 lai mai tuam an han ni tawh hi a lawmawm a, Aizawl khaw chhungah pawh hian ka beng hriata an sawi pakhat ka rilru min hneh deuh a awm, hmeithai pakhatin NLUP a dawng ve a, Congress, MNF tih pawh ngaihtuah lem lo, a intunnun vena atan mirethei a nih miau avangin hotuten an pe a, chu chuan zankhuain ka mu lo, Pathian hnenah lawmthu ka sawi a a pe tute pawhin min lo ngaidam sela, min pek atang hian sawma pakhat chu ka pe ve hrim hrim, kohhran pawhin min lo dawn sak teh u a tia ni, a ropui a ni. MIP ah khan hetiang thu hi a awm kan hre ngai lo, hetiang taka tha sawrkarin a kalpui te leh kumthara hmalakna turte a rawn chhawp chhuak hi a ropuiin a lawmawm ka ti takzet a ni.

Tin Power chungchang han sawi ve ka duh a, vawiiinah hian power chungchangah MNF leh sawrkar dang hian sawi tur an nei em aw? tih lai hi ka sawi duh a. Vawiiinah hian Tuivai Hydel Electric Project ang chi te PPP mode a tih chhoh turte chumi piah lam ah Lungreng Mega Watts 815 pechhuak thei te, chhimtupui 635 tih te Mat NEEPCO nen a MoU signed tawh te, Serlui B chu pawh Environmental Clearance pawh nei lo, tin, a surge gate pawh siam lova kan chhiat pah rup ang tih hlauhawm khawpa sawrkar laia hawn an tum avanga kan tih chhiat viau te kha sawi tur tam tak a awm a ni. Mizo mipuite hian an hria a ni. Chuvang chuan helaiyah hian a tichhetu tak chu sum kan duhna avangte, a huan neitu dik takte ni lem lo pawh ni ila, hlawkpui lo tumna rilru kan neih avang leh Mizoram aia mahni pumpui hma kan ngaih avangin khatih laia Lal chhungkua-ten an tihchhiat kan ti lo thei lo a ni. Chuvang chuan, vawiiinah hian engvanga chhia nge tih hi kan ngaihtuah a ngai a ni tih ka'n sawi duh a.

Tin Scholarship chungchang hi a lawmawm khawpin ka hria, naupang lehkhazirchho zel atan a tihziaawm nan kan sawrkarin a pangai bakah nuai 34.46 lai mai an dah belh te, tin Pre-Matric Scholarship atante, tin Overseas Foreign-ah te an kal theih nan nuai 35 lai mai an dah te leh technical atante kan sorkar hi chuan a hawl kim a ni, chuvang chuan, a lawmawm hlein ka hria a. Helaiyah pawh hian nasa takin kan naupangten an hlawkpuiin ka ring a ni.

Tin, Health lamah kan Minister zahawm takin hneh takin a enkawl chho a, NRHM kan tihte lah chu India ramah a tha bera puan kan han ni chho mek zel a, chumai piah lamah chuan mi harsate cancer vei enkawlna tur atan te, tin, Referral Hospital atan te, Aizawl Hospital-a hmanraw leina tur atante sum tam tak dah a ni chhote hi a ropui hlein ka hria.

Tin, Budget-a rawn lang lawmawm em em mai ka tih chu Local Area Development Programme-ah te heti zozai mai nuai 1200 lai mai dah a ni chho te hi state chawmhlawm ni chung si in hetiang zat kan han nei thei te hi lawmawm hlein ka hria a. Tin, kan sawi hmaih hauh loh tur pawimawh tak Special Area Programme chungchangah hian kan Sorkar-in District te te te anmahnia nasa zawka an ro inrelna tur leh an inenkawl theihna tur atana pawisa tam tak an dah mai te hi a lawmawm khawpin ka hria a. Chutih lai chuan District Planning Committee hrang hrangte an duang chho a, Aizawl, Champhai, Mamit, Kolasib, Serchhip nuai 500 lai mai heng District atana an dah te hi a lawmawm ka ti a, lawmthu sawi ngawih ngawih tur kan ni a ni tih hi ka sawi duh a. Chutih rual erawh chuan sawi hmaih hauh loh tur chu nikum lamah khan kan lo nei tawh a Sialkal tlangdung Development Committee atana dah a ni ve lo hi kan hmaih palh nge ni, enge ni harsatna kan neih deuh tih lai kha ka sawichhuak duh a. Engpawhnise, heng zawng zawng hi kan hotuten an hria ang tih ka ring a, nasa zawka he Sorkar hi kan Sorkar a ni ti thei khawpa a neitua tan theihna tur atana hma kan lak theuh hi kan tih tur anih bakah Sorkar pawhin kan duty a ni tih laia hi kan hriat a ngai a ni tih ka sawilang duh a. He Budget hi a tha ka ti a, a lawmawm ka ti a, kan dinhmun kan hre theuh a, kan Minister zahawm

takin a rawn present thei hi a lawmawm ka ti a, chungte chu kan sawi ve duh a ni e. Ka lawm e.

DEPUTY SPEAKER : Khaile, tunge han sawi lehang le. Pu R.L. Pianmawia.

Pu R.L. PIANMAWIA : Pu Deputy Speaker, ka lawm e. Vawiinah hian a hmasain lawmthu ka sawi duh a. Kan House Leader Pu Lal Thanhawla'n Finance Minister tha tak mai, rintlak tak mai Budget tha siam thei tur leh ngaihtuah chhuak thei tur a chherchhuak thei hi lawmthu ka hrih duh a. Tin, kan Finance Minister zahawm tak heng hna hautak tak mai Budget tha chungchuan min han chhawpchuah sak thei hi lawmthu ka hrih duh bawk a. A hautak em em a chuang chuan a huphurh hianin Revival Speaker-ah te min kalsan mai ang tih hi ka hlau thin a. Chutiang ni lova vawiinah Budget tha tak mai min han phuah chhuah sak thei hi a ropui ka ti a. Vawiinah hian kan sawina turah hian han changthlan neih te pawh hi tha ve riain ka hria a, Bible chang thlan an neih ang deuh hlek khan helai thu hi a mawi em a, chuang chuan hemi hriat hi chuan a dang hi sawi leh tawh lo mah ila a taw mai lawm ni ka ti hial a "Kan annual plan zat tur tihfel anih hunah chuan hengte pawh hi engemaw zahah tihpun a ni bawk ang" a ti a. Helai Budget bu a ala daihlo tur leh engemaw zawng zawng pawh kha Sports Department-a Budget tlemte lo langte pawh kha, kha khan a huam tel vek dawn a ni tih ka hriatin he chang hi a mawi ka ti em a, chang thlanah ka'n hman hmasa a ni.

Pu Dy. Speaker, hei a lawmawm hlein ka hria a, Budget puitling Planning Commission-in final min la neihpui hmaa ruahmanna an awm thei hi a lawmawm hlein ka hria a. A lehlama thu tan pawh han sawisel tur a awm tawh lova, hetiang Budget puitling anih takah hianin sawi tur pawh an hre vak tawh lo anih ka ring a. An ding duh lo em a, chuang chuan an chungah lawmthu kan sawi duh bawk a. India ram chungah kan awm a, power chungchangah te hianin thudiklo inhrilh te hianin kan intlansiak vel mai mai a. Kan ram chungah, a hmawr kil bera awm kan ni a, India rampuma power indaihlohna hi mega watt 12500 vel anih lain keinin duh thala lo hman ve kan tum thin a. Amaherawhchu, chumi tur chuan he sorkar hian nasa takin tan a la mek a, kan thenawm State te han chhut chuan Nagaland-ah pawh an dinhmun a harsa ve hle anih a rinawm a. Seven Sister Post chanchinbuah chuan Nagaland Minister-in power chungchang a sawiah pawh an indaihloh thu a sawi a, nikhatah load shedding pawh dar 8 leh dar 10 inkarah hian an nei ngei ngei thin a ni.

Tin, Assam-ah pheih chuan an harsa leh zual lutuk a, an Power Minister an inchhuahchhalhpui pawhin ani pawhin ruahsur turin Pathian hnenah kan dil a Anin beng a chhu ngawng tlat mai si a, chuangin tihngaihna kan hre lo a ni e a ti thlawt mai a ni. An Pathian hnenah ruahsur turin an dil nasa a niang, an Assembly a sawi chhuak hial ta chu power lamah pawh an harsa anih a rinawm a, chutiang ang dinhmunah chuan mi State-te an ding a, keini kan bial angah chuan sorkar hmasa aiin power lamah chuan kan ziaawm a, a chhan chu Sawleng bula Sub-Station

kan neih tur kha tunhma atanga Congress sorkar hmasa atanga kan lo ruahman fel tawh kha sorkar hmasa khan an ti ve a. Amaherawhchu, a tihdan phung an thiam tawh lo a niang kum 2000 kum atanga bul an tan kha Congress sorkar a rawn din thleng khan engmah tihpuitlin ala ni lova, tun sorkarah hian kan sorkarin min tihpuitlin sak a, tunah chuan power lamah chuan kan ziaawm ta khawp mai a, a lawmawm hle a ni. Chuvangin, he kan Budget-a lo lang tam tak hi sawi kim seng lo mah ila thil lawmawm tak tak tlem te han thailang ta ila. India Today-in pawisa enkawl na chungchanga State te te zinga investment ti tha bera min han thlang te kha a ropui em em a, hei hi tunhma hunah India Today hian he State sorkar ah hetiang ang thlanna hi ala nei lo a ni tih pawh kan hre vekin ka ring a. Chuvang chuan a lawmawm hle a ni tih ka sawi duh a.

Tin, lirthei pun chungchange kha kan sawi a. Lirthei pung mai hi a nilova tunah hian ka sawi duh chu, ka bial Sakawrdai-ah khian MNF sorkarah khan bial kohhran khian ramthima enkawl mi 3 an nei a, khawmpuiah tih tlem, sum leh pai an harsat avangin an rawt hial a. Amaherawhchu, he sorkar thar lo pian thlengin an chawm hram hram a, tunah chuan 23 zuk chawm tawh a mawle, a mak ti rawh u. Chutiang khawp chu a ni, he sorkarah hian kan kalphung han thlir han thlir hianin khawvel thil mai lovah pawh thlarau lam thilah pawh hmasawna hi a lo va ropui ve mawle tih kha chumi chuan a hrih hlein ka hria a. Tin, kan sorkar hmalak that vangin NLUP kan tih mai bakah RKVY atang pawn sum tam tak kan hmu a. Chu chuan MIFCO natna neia tawm ngawlh ngawlh tawh kha an chhanchhuak a. Tin, KVI Board lampangte pawh sum tam takin an tanpui a, ZOHANDCO kan tih te pawh hi khatiang khan henga eizawn nana lo hmanga lo inghat tawhte manganna kha an khai chhuak leh a, nung damin min han siam sak

leh a ni a. Chuvang chuan a ropui hlein ka hria a, he kan budget pharh hi chhuanawm tak tak niin ka hria a.

Tin, buh leh bal tharchhuahna lama hmasawna chungchangah pawh Khrishi Karman Awards, 2011 kan han dawng thei a. Hei kan bul tanna NLUP ah pawh hian han sawi ta ila, ala rei lo hle a, thil puitling tur chuanin hun rei tak a duh thina, doctor-te pawh puitling tur chuan kum 6 an zir thin tih kan hria a, kum 6 an zir hnuah khan an lo puitling ve chauh kha a ni a, kum 5 pawh kan la kal lova, kan hmasawna hetiang anih chuan term leha kan sorkar leh hunah pheh chuan hmasawna hmuh tham khawvelah pawh entawn tlak tura tar chhuah tham tak tak a tling thei dawnin ka hria a, chuvang chuan a lawmawm ka ti a. Kan budget pharhah, nidanga tawngkaa kan la dawn ngai miah loh, Education department-ah pawh hian han chhut ta ila, kan House Leader, Kan Chief Minister ni bawh leh kan Finance Minister-te tawngkam pawh hi a ropui ka ti a, 'in hlawh daih tur rawn ti rawh u', an ti a. An hlawh daih tur kha engamah hmain budget tih dawnah kan hotuten an han cho em em mai hi a lawmawm ka ti a. Hlawh lak tur nei lova nawrh leh engemaw vel kha hei hian a tireh thei dawn a ni tih chiang takin a hriat a. Chuvangin kan hnathawktute tana he budget a sum leh pai tamtak kan nei pawh hi a lawmawm ka ti a. He tiang ang budget pharh thei Finance Minister kan nei hi a lawmawm ka ti a, hnathawktute chuan hlawh an hmu tur a ni. Tin,

Pathianin a ngaih pawimawh ber, mirethei te, mi harsa te, mi hnuaihngte tana budget atana sum tam tawk, he financial year kum 5 term hman mekah hian kan hmang zo seng dawn ami tih khawp pawisa miretheite puala an awm mai hi chhuanawm ka tiin a ropui tak meuh meuhin ka hria a.

Tin, Lunglei High Power Committee atan te, Sinlung Development Council atan te, leh District Planning atan te, District Council hrang hrang atante pawh pawisa kan mamawh phuhruk thei tawh min han pe a, a lawmawm hle in ka hria a. Sinlung Development Council te pawh hi sorkar duhthusamin kan kal lohna tamtak a awm maithei, amaherawhchu, chutichung chuan budget-ah pawh duat takin hetiang ang zat hi min han pe a, tin, hmanni session kan neihah pawh dil belh leh ila tih kha a ni a, dil belh leh hunah pawh min pek belh leh dawn ni khan a lang baw a. Ka chang thlan thu mawi tak atanga han thlir pawh khan a thlamuan thlak in ka hria a, a lawmawm takmeuh meuh a.

Tin, NLUP-ah hian tuna kan kal chinah hian kan tawp mai dawn lova, a kal that theihna turin state level te, district te leh village level anga kan tih mai bakah kal zelna tur atan hian ruahmanna thui tak, exit protocol pawh ruahmanna kan la nei zel a. Chuvangin miretheite puala budget alo lang hi tawpin tai awm lovin khawvel awm chhung hian min chahtu berin 'heng mi te ber te chung a in tih hi ka chung a ti in ni' a tih kha kan chang vawn reng dawn a ni tih kan sawi duh a ni e. Ka lawm e, Pu Deputy Speaker.

DEPUTY SPEAKER : Khai le, tunge sawi leh ang le ? Sawi tur kan la awm em ? Sawi tur kan awm tawh lo maw ? Aw, Pu K.Liantlinga i lo sawm ang.

Pu K.LIANTLINGA : Pu Deputy Speaker, ka lawm e. Ka'n sawi mai ange, chuan hun min pek belh la, sawi duh an awm chuang lova, dar 4 thleng ka sawi ang aw, kan sawi tak tak anga chuan a thain ka ring. An sawi duh chuang lova, sawi tur kha i ko leh dawn tho thova; hei vawiinah kan budget general discussion kan nei hi a lawmawm em em rualin infakna ringawt maiin hun a kal tam deuha, technical deuhten emaw han chhuia chutilai, khatilai han tihte pawh hi a tulna lai te pawh hi a awma, han kher pawr duhna lai te pawh hi a awm thei a, amaherawhchu, a tlangpui thu chuan, chuti em ema zuk luhkhung chu ka tum lem lova. Hei kan member zahawm tak, Pu John'an 3T formula tih kha sawi rawh a ti a, tawi te han sawi ngaiin ka hria a. Inrinniah Press Conference ah ka sawi tawh a, an chhuah tho a. Amaherawhchu, hei NLUP te hi in fak em em a, kum 5 chhungin cheng nuai 1, 1st installment ah sing 3, 2nd ah sing 3, 3rd ah sing 3 vel ten an hmu a, kum 5 chhung chuan, kumtin cheng sing 2 ang vel a ni mai a, khatiang ang kha a ni lo a, kha kha chu a thlawna dawn a ni a. Kan Speaker-in tukina Bible chang a chhiar ang khan 'Engmah lo mai maia sum dehchhuah chu a ral ang a, rim taka thawh chhuah erawh chu a pung ang' tih kha kan Speaker-in a sawi chhuak tawh a. Cheng nuai 1 hi a tha e, a lawmawm khawp mai, mipui tan pawh lawmawm ka ti a, amaherawhchu, kan Mizo thawnthu ang deuh hlekin; Chhura thawnthuah chuan sekibuhchhuak an tih ang kha a ni mai a. Amaherawhchu, Chhura khan a duh loh chu hreipui khuai tu thei kha a duh lo a ni. Chuvangin vawiinah hi chuan 3 Tiers formula-ah hi chuan,

kan thalai zawng zawng a sing telin hna an thawh bakah unskilled labour, kuthnathawktute khan hlim taka hna an thawh tlan a, kum khata cheng nuai 2/3 an hmuh theihna tur formula a ni. Chu chu nakinah Bill-ah kan la sawi dawn a; ni 22/4/2013 ah emaw, April ni-1 ah emaw 'The Mizoram Ceiling on Government Guarantee (Amendment Bill) – 2013' ah khan chianguang zawkin kan larawn sawi dawn a, kha kha ka'n sawi hawn sak lawk a ni, Pu John-a hian a hre duh deuh hlek a. Kha kha hreipui khuai tu thei a ni, pawimawh tak a ni.

Hei Budget-ah hian full Budget kan pharh kan ti a, amaherawhchu, kan Speaker khan hmanah khan a sawisel deuh a, full Budget-a kan pharh kan tih khan a lawmawm a, tiin lawmthu kan sawi vak mai a kan Plan Budget size pawh kan la hre silo a, central assistant size pawh kan la hre bawk silo a chutih lai a full budget a lawmawm han tih ngawt mai hi a dik chiah em aw? ka ti a. Amaherawhchu, inthlan kumte a ni a, pawisa hman chak zawkna atan full budget pharh hi rem chiah lo mahsela, han nuai rem chu a tha ka ti tho a. Amaherawhchu, fak em em turah chuan ka zuk ngai lem lo a, her rem chawpah ngai ta ila a tha awm e.

Tichuan, in han sawi leh thin a, India Today hian Best performing State on investment among all States a ti a. India Today hi Budget pharhna atana tihlan chi hi a ni em ni? Assessment a siam te leh tlawhchhan atan a statistic hi a dik tawk em? ngaihtuah chian a ngaiin ka hria. State khat Budget pharhna em a, chanchinbu pakhatin a chhuah ringawt mai kan tarlan hi chu a dik lo a. A chhan chu, investment-ah a rawn tarlanah khan Tuivai Hydrel Project tih te, Bairabi-to-Aizawl railway project tih te a rawn telh a, investment han tiha kan sanna tur anga a rawn tih vak mai kha, a dik ber lovin ka hria a ni. Chuvang chuan kan inenchian pawh a ngai ka ti a. Khang assessment te, kan economic growth te leh infrastructure lamah te khan investment tha ber anga min rawn tarlang erawh hi chu, nuihpui mai mai atan chuan a tha viau na a, mahse chaw tak bawl a bawl tlakah chuan kei chuan ka ngai lem lo a. A chhan chu nia, chanchinbu pakhat ringawt hi chu, amaherawhchu, a ram pum pui huap a Govt. of India in assessment (Planning Commission) ten emaw ti ta sela, uluk takin ruahman ta sela chu, a ngaihthiam awm deuh in ka hria a. Engpawh nisela, khalai kha chu ka'n sawi lang chho a ni mai a, vote on account a kan ti lo hi chu a thaah ngai phawt ila.

Education chungchang thuah hian rawn ka duh pakhat chuan, Education Sector lamah hian hma sorkar-in a rawn la chho a, scholarship chungchangte in han fak vak mai a, kan Chief Minister kaihhraina niin ka hria a. Scholarship Board kha Department puitlingah hlankai tur a ni a, tin, Scholarship stipend, Book Grant te kha centralized tur a ni a. Kha kha Department dang zawng zawngin an zawm duh lo a, tunah Scholarship Board chu a ding chawr chawr a, sum chu tlem an dah a ni. Department-te pawh hi kan control zo lo em ni? kan Chief Minister ho meuh a siam kha a ni a, a rules-te pawh kha, kha vang khan Scholarship-te pawh hi an indaih em/daih lo em? tih lam ai mahin khatianga centralization scheme kha

Book Grant te, stipend te an pek tur ang chi zawng zawng te, tin, kei ngei pawhin vawi-2/vawi-3 House-ah ka sawi tawh a, Planning atangin Budgetary Transfer te hi ni hial sela, chutiang a nih loh chuanin Scholarship Board hi a kal thei lo ang e, tih te pawh kan sawi tawh a ni. Tunah hian cheng nuai 350 vel chu dah a ni a, lawmawm thawkhatah pawh ngai ta ila. Heti laia ka sawi duh pakhat chu, Pu Chitambaram-a khan 2004 a Finance Minister a nih lai khan Education Loan chungchang hi sawi her rem hret a ni ang a ti a. Tuna kan Technical Student zawng zawng sang tel hian Educational loan hi an enjoy thei a ni. Amaherawhchu, tunah hian enjoy theih miah lovin kan Education Department hian a siama monitor a ni lova, heng avang hian mirethei fa kan thalai lehkha zir tam tak pawh hian an harsat phah a ni.

Tin, India ramah hian Mizote hi chu han sang lutuk thei pawh kan ni lo. A chhan chu plain area a awm kan ni lova, Industrial production kan nei lova, churang chuan zirna hi kan industry pakhat a nih avangin. Pu Chitambaram hian tun tumah pawh a sawi leh a ni. Tunah a sawite kha ngaihtuah chiang leh ula a thain ka hria. Churang chuan kan Education Department te pawh hian uluk zawka tih tur niin ka hria a, ngaihtuahna hman a tulin ka hria. Scholarship Board te, Education Loan chungchang thuah te, Bank hoin loan an pe duh si lova, an dil nuaih nuaih a, mi mangang an tam a. Churangin Cell din ila, Officer pakhat leh staff pali/panga in, hei hi tihpui sela, kan zir lai zawng zawng hi awlsam tein an zir thei dawn a ni. Dahkham pawh a ngai lo, guarantor pawh a ngai lo, nuai nga hnuai lamah, nuai sarh hnuai lamah guarantor chauh a ngai, dahkham a ngai lo. Kan thalaite hmasawna turin tha taka kalpui a ngaiin ka hria a ni.

Tin, Pu Deputy Speaker, ka sawi leh duh chu dt.3.7.2013 pawh khan Council of Ministers-te an thukhawm niin ka lo hria a. Chutah chuan Mizoram Education Service Rules te kha a principle a passed niin ka hria a. Kan sawrkar hian Mizoram Education Service hi a siam dawn tak tak a nih chuan, tin, Rules te a siam dawn a nih chuan Consultative Committee-te pawh hian thlir ve ila, a tha viau lawm maw ni le. A chhan chu party tinin kan awm khawm a, kan in advise-in kan inrawn tawn thei a ni. Sorkar chu a hmasawn zawngin kan tanpui tur a ni, opposition pawh ni ila, kan tanpui a ngai tlat a ni. Chungah te chuan zau zawka thlir dante pawh hi a awm thei lawm ni. Education Reform Commission recommend-na, Chapter 13(7)-na No.2-ah chuanin 'Minimum qualification, Post-Graduate with three years experienced' te a ti a, tin research experience neite a ti a ni. Tin, tuna thawk lai mekte adopt dan tur te, 50% kha adopt a ni ang a, tun tumah chuan, a hnuah chuan 100% kha MPSC in a tih tur tih kha a awm a ni. Tin, group of experts te pawh khanin an recommend a, ERC Recommendation ang tho khan a kal a. Hengte hi en a, uluk taka kan Education Rules te pawh hi siam a tulin ka hria a.

Tin, Education sector thoah khan Sports & Youths Services-te pawh a awm ta a, Sports Council-ah hian sum an dah tlem lutuk a, tun tumah hian nuai 125 an dah a ni. Hei hi promotional ah te, Sports goods ah te, infra-Structure maintenance-ah te, District Sports Committee atante State level atan te dah a ni a. Hengte pawh hi anihna takah chuan Pu Deputy Speaker, a tir, sorkar tharah kha chuan kan hlim a, kan phur tlang viau, Sports

Council-ah hian 2009 – 2010 ah khan nuai 887 dah a ni a. A dawt lehhah 2010-2011-ah 887 dah leh a ni a, kum 2011-2012 ah 680 lakh dah a ni a, kum 2012-2013 ah nuai 400, tunah (2013-2014) ah nuai 125, 2016-ah, Rio-de-Zeneiro ah, chutah khatah kan kaltir dawn, kan training tir dawn an ti a, khawia sumin nge an tirh dawn? Heng infra-structure an siam zawnz zawnz hi chu ka sawisel lo, a tha. Rajiv Gandhi Stadium te, lammual te leh hmun dang dang an tih te leh Sports Complex te a tha lutuk. Amaherawhchu, a kheltu tur, a mihring develop-na tur a awm si lo. Tunah sum a awm leh siloh chuan engmah kan ni chuang lovang. Sports-a hmasawn tur chuan ei leh in tha a ngai a ni. Chutiang zawnz zawnz chuan physical fitness-ah kan that a ngai a, heng zawnz zawnz training leh kal tur khan cheng nuai 125 chuan khawiah mah kan tir dawn lo reng reng. Dik tak chuan Planning Department te pawh hianin ngaihtuah chian a ngaiin ka hria, a sawi chak chak pek mai chi pawh a ni chuang lovin ka hria. Pu Deputy Speaker, Planning Department-in allocation an han siam hian Sports Department a ni emaw, nilo emaw, Department hrang hranga Board-ah te, Council ah te, Youth Commission kan tih te, Department hrang hrangin sum an dah hi a tlem thei lutuk a, grass root level atangin Plan rawn siam sela, chu chu lo approve sak sela. High level atanga heti hi a tawk ti ringawt lovin, chuvangin kan Board te, kan Council zawnz zawnz sum an mamawh ang an hmu lo reng reng a ni, Youth Commission te hian entirman, cheng Nuai 50 in kum tinin a kal ringawt mai a ni. Tunah pawh nuai 50 chu a ni, khawiah nge Youth Development hi a thawh ang, thawh ngaihna a awm lo reng reng. Chuvangin High Level atanga pawng dah ngawt chi a ni lo. Tih tak taka ngaihtuah a ngai a, kan ram leh hnam dinchhuahna tur a ni a, Pu Dy. Speaker chutiang zawnz chuan hma kan la tur niin ka hria.

NLUP hi ka'n fak ve lawk anga, hun min pek belh deuh hlek nan. Pu Dy.Speaker, NLUP-ah hian production a rawn awm tan a, a lawmawm ka ti, a bik tak a ka khel duh chu Hmunphiah chungchang hi a ni; hmunphiah an han thar chhuak ve dek dek a, royalty ₹ 7 an lak sak a, a ram tla leh private farm product nen, Royalty an la, hengte hi 1955 Mizoram Forest Act a ni. District Council Act kha a ni a. Hemiah hianin an in ziak vek a, Act No. 6 a Section 2 ah hian in Royalty lak theihna dan a inziak a, Royalty a lak theihna zawnz zawnz Forest Product kha lung hmul thlengin a ni vek a ni. Tunah hian example a kan pek duh chu Sand chungchang thu h Mizoram Forest Act-ah hian a awm tho a ni. Amaherawh chu Zoology and Mineral Resources Dept. in a khawih tawh a, Royalty engkim a collect a, mumal takin a kalpui a ni, NLUP Product pawh hi Royalty chungchangah an buai a ni. Forest Department leh NLUP Marketing Cell te kha an inbei an inbei a; hengte pawh hi chinfelna turin tan lak a ngai. Kan Sawrkar hotuten Technical thil hi an solve a ngai a ni, he dan Mizoram Forest Act Appendix-II A Clause-17 a mi sand te, gravel leh boulder te pawh hi Mizoram Minerals Resources Department kutah a awm tawh a, a lut vek tawh a, chutiang bawh chuan ka sawi duh chu Pu Dy. Speaker, a pawimawh em em a ni. NLUP tuna hmunphiah Royalty a an buai an buaina tax an lakna tur chungchangah hian, Marketing Cell leh Forest Department an inchuh buai a ni. Heng Act te hi kan thlir lo em ni ka ti a, Dt. 24. 4. 2008 Govt. Notification ah chuan, hmunphiah hi Trade & Commrce Department Act, Mizoram Agriculture Marketing produce (Development & Regulation) Act 2008-ah khan a lo awm reng tawh si a. Chuvang chuan a nih dan turah chuan Trade & Commerce kutah pek a ngai tawh a ni. Sand leh gravel te leh thil dang Royalty hi Forest-in dan mumal lo deuhva a lo en kawh thin kha Geology & Mineral Resources Department ah tunah hian he dan hmang hian

pek a ngai tawh a ni, sumdawna thil anih tawh avangin Trade & Commerce Department kutah awm tawh tur niin ka hria. Agriculture Product ah a lut tawh a ni tih kha kan hriat a pawimawh in ka hria a. Pu Deputy Speaker, khatiang ang chi kha chin fel ngai a tam khawp mai a. Tin, Village Council Boundary chungchanga he Gazette pawh hi ngun takin en ula, 7th May, 2008 a Mizoram Gazette chhuakah khan, chu Gazette-ah chuan ; (1) Inter District Boundary pelin Hortoki Village Boundary rin a ni a, Kolasib District a Hortoki Village Boundary chuan Mamit District a West Serzawl ram zawng zawng kha rin luh a ni a, enfiah a tul hle a ni. Hengte hi a document pawh ka dil mek a, i bial chhung ngei pawh chinfel a ngai a ni. He mi ram huam chhungah hian rubber chingtu mi 29 periodic Patta nei vek an awm a ni. Hengte pawh hi chinfel a pawimawh em em a ni. Pu Dy. Speaker, hengte pawh hi Gazette ah a chhuak vek tawh a, Gazette hmasa a awm a District boundary a pel em? tih hi enfiah a ngai a ni. Thil pawimawh deuh mai pakhat ka sawi loh theih loh chu Tlawng lui thlanglamah hian periodic patta nei 29 an awm a, Rail kawng a kal dawn avangin kan officer thenkhatten an rawn it ta a, V.C. pass te an lei a, ram lo nei tawh sate cancel sakah te an vau a. Hei pawh hi ennawn a ngai a ni, kan Revenue department-te pawh inennawn a ngai, rubber plantation nei ho an ni a, an hming kha ramnuam, lailung Farmer Society ram 29, bigha 25 vel theuha an neih kha cancel sakah te an invau tawh a ni. Chuvang chuan NLUP kal mek hi tibuai thei khawp thildangte pawh a awm thei a ni tihte pawh kha ka sawi duh a.

A tawp berah chuan kan Finance Minister ka zawh duh chu, Bank kan deposit ratio hi a total deposit hi 2011 thleng chauh a ni a. Hetah hian Mizoram Bank 17 an operate mek a, heng Bank ho C.D ratio leh deposit ratio hi amount hi a wind up-naah min hrilh thei se ka duh khawp mai a, chu chu ka'n sawi ve a ni e, Pu Dy. Speaker, ka lawm e.

DEPUTY SPEAKER : A sawi kha nia, khutilai boundary chungchang Bairabi hetah Serlui a rawn rin chho a, Serzawl ram thlengin an rawn lak lai kha nakinah kan Revenue lam pawhin a hrim hrimin en tha in ka hria a. Tin, kan hmunphiah chungchang te pawh kha Trade & Commerce lama awm tawh a nih kha chuanin tuna a awm dan a diklo a nih chuan enchian te pawh a tha ve khawp mai tih kha kan hotute pawhin lo chhinchhiah ula a tha awm e. Le, tunah tunge sawi leh ang le, awle Pu K. Lalrinthanga.

Pu K. LALRINTHANGA : Pu Dy. Speaker, ka lawm e. Ka tawng muang bawk a, tuna mi ang zat vel kha min pe ve la a tha awm mange aw ka ti a. Boundary chu mi awm loh lai zing dar 3:00 vela kal lo hian, vai ho awm laia man theih laiin zuk kal mai ila, Police te hruai ila zuk man mai ila a thain ka hria. A tibuaitu tur awmlah laia darthum vela han kal kha chu a huaisen thlak loh em mai kan ti deuh hlek a. Tatang khan ngaihtuahna siam ta mai ila a thain ka hria.

Pu Dy. Speaker, kan budget chungchangah hian thil kal tawh tlemah hian lawmthu han sawi tha in ka hria a. A hmasa berah chuan no. 3-naah khan Planning Commission-in 11th Five year plan 10 na 2002 atang 2007 ah khanin Mizoram thanna chu 5.1-ah a dah a. Amaherawhchu, 2007-2012 ah khanin 8.87 ah a dah ve thung a ni. Chu chuan a entir chu sorkar hmasa chhunga thanna kha 5.1 a ni a, tuna sorkar kal lai mek thanna chu

8.87 a ni a. Hei hi a lawmawm tawkin ka hria a, kan Finance Minister hian a thawk tha hlein ka hria. Tin, 7-naah khan thil lawmawm deuh dang a rawn inziak leh a, Economic survey 2011-2013-ah India ram pumpui thanna 5 a nih laiin Mizoram chu 10.7 a ni leh dawrh a ni. Chutiang a nih avang chuan kan Finance Minister hi lawmpui tlak ni te pawh in ka hria.

33-na en leh ta ila Consolidated Fund of the state sum hmuh tur beisei cheng vaibelchhe 5452.44 a ni a. 2012-2013 a kan hmuh kha chu vaibelchhe 5179 Crore 51.93 a ni a, chu chu za zelah 5.26 in a lo tam leh ta a, a lawmawm khawpin ka hria. 38-na kha en leh ta ila. Pension sum tihltlem nan Mizoram-ah sum indaih loh te a lo awm thin a. Tin nakinah chuan mihring kan hrisei a kan lo damrei a, pension ho pawhin pension sum an la rei ta a. Chumi atana inbuatsaih nan kan sorkarin pension senso tihltlem nan September ni 1, 2010 hnu lama sorkar hna lak tharte tanah Defined Contributory Pension Scheme a siam hi ropui ka ti. Inhmakhuana tha tak niin ka hria. Mizoram sorkarin harsatna tawk thei mai dinhmuna kan din reng laia inhmakhuana tha tak a lo siam hi a ropui ka ti a chu chu ka han tarlang leh duh a ni.

Thildang pakhat ka sawi leh duh chu 52-naah khanin kum 2012-2013 atangin Civil Hospital chu Referral Hospital-ah sawn phei zai a rel a tiin kan hmu a ni. Tin chubaka kan hmuh leh chu Medical College din tum anih thu kan hmu bawk a ni, hei hi a ropui hlein ka hria. Hei, thingtlang bialtute ho chuanin kan mi leh sate harsatna, natna chungchangah kan hre theuhin ka ring a. Civil Hospital Aizawl ah hianin indah a han tum ve thin a. Mahse a te lutuk a, khum te a tlem a kan indah leng lova. Chutiang anih avang chuanin harsa chung chung leh sum nei lo chung chungin Private Hospital-ah te an indah a. Private Hospital a nih chuan Bill te a lo sang a, sensote a lo tam a, bialtu MLA ah te bill pekna turin pawisa an mamawh thute an rawn sawi thin a. Chutiang chuan anni pawh inthlahrung takin an rawn sawi a. Tin a bialtu MLA tan pawh harsatna namen lo kan tawk thin a ni. Chuvang chuan, helaia Referral Hospital leh Medical College anga ruahmanna lo awm hi ropui ka ti a, hun kal leh turah chuan thingtlang mi, kan mi harsa damlote tana awlsamna tam tak a rawn thleng dawn niin ka hria a, lawmawm ka ti.

NLUP chungchangah hian rawn luh ve ka duh a. Pu Chairman, hei number 6-na ah te, 16-naah leh 55 atanga 62-naah te khanin NLUP chungchang hi kan hmu a. Chuta thil lawmawm deuh mai chu Mizoram thanmawhbawk, kum tin lo neihna hmun, eizawna hmun, lo vat chawpa kan vat leh thin, a rehna tur atana hmalakna, lo neih dan tha zawk, changkang zawk kan han nei thei hi ropui ka ti a. Mi tamtakin lo nghet an neih phah ta a, serthlum-te an ching a, kuhva te an ching a, rubber-te an ching a. Kha kha hun kal leh turah an chhungkua inrochun chhawng zelin chutiang chuan lo vah ngai tawh lovin a awm thei tur hi lawmawm ka ti a. A kaihnhawih tam tak kha sawi tur a awm anga, amaherawhchu, kan sawi seng awm lo e. Hei hi NLUP hmanga lungphum Mizoram-in kan neih hmasak ber niin ka hria a, kan ram tan a tangkai hlein ka ring. 16-naah khan NLUP kan han introduce takah hianin kan ram thlai dehchhuah a lo pung chho ta hi lawmawm ka ti. Tunhma chuan kan thlai tharte hi, State dangah te kan kal ve a midangte nena kan han ti ti hianin, Mizoramin engnge ni in thar chhuah? engnge ni in thawn chhuah ve ? ti a min zawh hian chhan hi a nuam lo angreng a ni. Dehchhuah kan nei mumal si lova, kan dehchhuah, kan thlai thar kan thawn

chhuah tam ber kha chu sawthing te, iskut te kha a ni deuh mai a. Tunhma khan thildang tharchhuah kan nei mumal lovin ka hria. Amaherawhchu, tun hunah chuan tharchhuah kan nei tam ta. NLUP Serthlum-te pawh a lo thar hman der tawh mai a lo ni a. Tin, hmunphiahah namen lovin kan mipuite an buai tawh a ni. Keini Bialah-te chuanin January leh February thla-ah contract hna thawkin kal dawn ta la, hlawhfa tur in hmu mumal lovang. NLUP hmunphiah buaipui ringawtin an awm a ni. Zingah an chhuak a, tlaiah an rawn hawng a.

Pu Chairman, min lo hrethiam la, nichina i hlauhthawn kha ka han hrilhfiah ang che. Mizoramah hian mi 2,00,000 vel kan awm a. Sorkar hnathawk hi 20,000 vel an awm a ni. Tichuan, NLUP ah hian kan pek tum hi 1,35,000 a awm a, a bang zawng chu 45,000 chauh an awm ta a ni. Chu chu ni kalta a kan Member thenkhatte han sawiah khan, “Congress chauh NLUP in pe a” an han ti leh bawk si a. Congress kha 1,35,000 vel kha an awm a, a bak Sorkar hnathawk bak, a 45,000 kha P.C., ZNP, MNF te khan an insem ta a, thlaphan awm reng chu a ni ka ti. Inthlan leh hunah khan chak a rinawm tawh lo em a ni. Chuvang chuan, in thlaphang hi kan hrethiam che u tih kha ka’n sawi duh a nih chu.

Pu Chairman, Hydel Project chungchang hi ka’n sawi leh lawk teh ang. Hydel Project-ah hianin Tuivai te, Lungrang te, Chhimtuipui, Mat tih velah hianin tuna hma lak mek leh MoU signed tawhah hian 2120 MW a awm a. Tuna Tuirial Hydel Project khuah lai mekah hian 60 MW a lo awm bawk a. Chutiang a nih chuan 2180 MW tihchhuah mai tur tun Sorkar hian a buatsaih mek a ni, thil lawmawm tak a ni. Chutih ruala thil mawi lo deuh mai he House in a hriat tura ka sawi duh chu Tuirial Hydel Project khuah tantirh lai khan Congress Party Sorkar a tawp tak hnu khan compensation duh avangin, khatih lai Sorkar dinglai mi leh sa te khanin Hydel Project kha ni 72 zet Total Bandh an buaipui avanga lo tawp ta a ni. Chutichuan, an titawp ta te te a, tunah chuan Mizo mipuite hriatah TV-ah te an tilang a. Millennium kawtah te, Vanapa Hall kawtah te meihawl leh mombati an sem ta a nih chu. Mi concrete in neih that lai thiat chhe vek a, a bang dap, a chung mau hnah inpe ang vel kan niin ka hria. Chutah pawh chuanin mombati leh meihawl an pek te kha an mahni Party kalkhawm chauh an pe lehngal. Mizo mipui hi an zah lo ka ti a ni. Mizo mipuiten Hydel Project kaltlang a, electric current 60 MW zet kum 2006 a kan neih theih tawh tur kha an tihchhiat vek hnu-ah meihawl leh mombati min pe ta a nih chu, min zah lo hle mai. Pu Chairman, khatiang kha Mizorama thil awmdan a ni a, a pawt takzet a ni. Kan Member puite, i veilam ami te hi khatiang kha chu ti tawh lo turin hrilh se a thain ka hria tih ka sawi duh a ni.

Pu Chairman, thil pakhat ka han sawi leh duh chu Special Area Programme (Pu LALTHANSANGA, CHAIRMAN : Minute 4 ka pek belh tawh che a nia.) hei chauh hi anih leh ka han sawi leh ang e.hnuaiyah hian thil lawmawm deuh tunhma sawrkar hmasa lama la awm ngai reng reng lo awm ta chu Lunglei High Power Committee hnuaiyah hian sum leh pai hman tur, tunhma chuan a awm ngai reng reng lo. Tunah chuan Lunglei High Power Committee hnuaiyah hian kumin chhungin nuai 600 an lo nei thei ta hi a ropui ka ti a. Chu mai bakah chuan kan Budget Finance Minister Speech-ah khan a landanah chuan nuai 3000 a pel ang tiin an tarlang bawk a ni, nuai 600 pek tawh bakah khan nuai 3000 a pel ang tiin a rawn tarlang a. Tin, chubakah chuan SHDC hnuaiyah hian nuai 300 kan han dah

thei ta a, chumai bakah chuan District Planning Committee, District 5 te tan Nuai 500 kan lo nei thei ta te hi a ropui ka ti. Chumai bakah chuan nuai 1000 in a pel ang tiin arawn tarlang leh ta a, ropui ka ti hle mai. Tichuan, helaia thil lo lang leh ta paw ka tih em em mai pakhat chu, kan Chief Minister-in tun sawrkar kallai Sawrkar hnathawkin an Budget tur an buatsaih lai khan Department zawng zawngin an hlawh daih tur pawisa an rawn siam vek tur a ni tiin order a chhuah a. Amaherawhchu, kan han kal chho kan han kal chho a, Kamalanagar College zirtirtute leh Aizawl Law College zirtirtute hlawh tur an lo siam daih lova, band te hial siam an tum niin ka hria, a paw hle mai. Chumi pawisa puhrukna tur atan Education Department a hlawh siamtuten an tihsual avangin, i ti ang keini District 5 a kan pawisa hman tur kha min pawhhek sak ta niin ka hria, a ui awm hle a ni. Chuvang chuan tun Budget-ah pawh hianin Department hrang hrangte hianin uluk takin an siam turah ngai ila, khatiang thil kha thleng tawh lo se ka duh takzet a ni. Pu Chairman ka lawm e.

Pu LALTHANSANGA AT THE CHAIR : Tunge sawi leh ang, Chairman in a han wind up mai dawn em ni, pahnih te chuan sawi theih zan a la ni, Pu Zothangliana.

Pu H. ZOTHANGLIANA : Pu Chairman, ka lawm e. Rate kha establish thar a awmin ka hria a, chutiang han ngaihtuah chuan midang han kohna hun i nei tawh dawn lo vel niin ka hria a tih kha ka ngaihtuah dan deuh a ni a, chutianga rilru min put sak chu ka han ngen law law a ni. Ka la intiam chiah lo chungin Chair a thu tan pawh hian a hrilhai ve theih ange tih ngaihtuahna avangin ka rawn ding chhuak a ni a. Pu Chairman, sawitur hi kan ngah theuh avanga insum deuh zawk hi kan ni mah mah a. Sawi tur hi a tam lutuk a, sawitur hriatloh lam ni lo in, sawitur hi thlit fim a, thianten eng hi nge an sawi tawh a, eng hi nge sawi ngai tawh lo ang tih te hi kan buk deuh zawk a ni tih ka han sawi hmasa duh a ni.

Pakhatnaa ka sawi duh chu kan budget hi a tha a ni tih hi ka sawi duha. Finance Minister tling tak mai ni satliah lo, fakawm piah lama chhuanawm, chhuan tlak tak mai kan neih zia tun kan budget presentation-ah hian a lang leh tih chiang takin kan hmuh theih avang hian a lawmawm ka ti takmeuh a. Kan Finance Minister zahawmtak Pu H.Liansailova leh a team-te hnenah lawmthu ka sawi hmasa duh a. Chutiang thil lo thlen theihna tur atan chuan kan Chief Minister zahawmtak Pu Lal Thanhawla, he House Leader ni baw a pawimawhzia sawi nawn a ngai lova, heng zawng zawng hian tuna ruling party, congress party hi chuan hruaitu rintlak, hruaitu rinawm kan nei a, anmahni hruaina hnuaiiah chuan ram hi tha takin kan phak ang tawkin Pathian tanpuinain kan enkawl mek a ni tih hi Zoram mipuite hriatah Pu Chairman nangmah kaltlangin kan sawi hmasa duh baw a ni.

Ram dinhmun a that leh that loh te, ram enkawltuin a ram enkawl chu a that leh that loh te, tehkhawng (criteria) hrang hrang tam tak mithiamten an lo nei tawh thin a, chung zinga vawiin thlenga hman lar ber, rinrawl pakhat chu sum leh pai deuhchhuah tamlam engzatnge a nih tih hi a ni. GSDP state bikah chuan an ti a, India ram pum angah chuan GDP (Gross Domestic Product) tih a ni. Tehkhawng tlingber leh tlakber, famkimber a ni e chu an ti hauh lova, amaherawhchu, hei hi tehfung hman atanga hman tangkai ber vawiin thleng hian a ni fan a. Chumi hmang chuan tun sorkar performance hi kan teh tur pawh a niin ka hria, tunhnai kum 2/1 chhungin khawvel pumpuiah recession a thleng a, sum lama harsatna a

thlenga, chuvang chuan ram ropui bera kan ngaih USA, ram thangchak ber ni mek China te meuh pawhin harsatna tam tak an tawk a, an ram tunhmaa a than chak ang khan tun kum 2/3 chhung hian a thang chak hlei thei lo a ni. Chung harsatnate chu India ramropui tak hian a siper engemaw zat chu a lo tawng ve lo thei lova, chumi avang chuan Prime Minister mithiam, khawvel pawhin entawn tlak an tih, Economist ropuitak mai Dr.Manmohan Singh meuhin min kaihruai mahsela India ram pawh hian tunhnai kum 4/5 kal ta a kan than chak ang kha chu tunhnaiah hian kan thleng phak lo a ni.

Nikum lamahte khan kum hmasate nena khai khinin India rampumpui than chhohna sum leh pai dinhmuna than chhohna chu five percent vel chauh a ni. Chutih mek laiin Mizoram-ah ve thung (ram rethei chawmhlawm ram inti ramah hian kan hotuten min enkawl thiam vang a nih ngei pawh ka ring) kan GSDP than chhohna chu India ram pumpuiaah 5% a nih laiin Mizoramah chuan 10.37% a ni. Chu pawh chu current prices a chhut a ni lova, real terms a chhut a ni a. Chumi awmzia chu real terms kan han tih chuan inflation avanga thilman pungte pawh chhut telin, chumi avanga pawisa hlutna paihin tihna a ni awm e Mizo tawng chuan. Chutiang chuan, a thanna tak tak ti te pawhin sawi ila a dik awm e. A thanna tak tak chu 10.37% a han ni phak maite hi a ropui a. Kan hotute hruaina hnuaiiah hian Zoram mipuite hi kan him a ni. Thlamuang takin kan awm thei a ni tih hi a chiang em em a ni.

Tin, kum 2008 kum tawp lama tun Ministry a lo din tirh khan Vaibelchhe sangkhat atanga hman bang tlem kha kan chhawm chho a ni a. A hnu kum hnih thum lekah kum 2012 – 13 ah chuan kan Plan Fund pawh hi ` 2300 crore ah a han pung chho mai te pawh hi Central Sorkar pawhin tun Ministry hi a rintlak a, duhsak tlak pawh an ni bawk a ni tih a hriatchian vang a ni. Chutiang ni lo se, hetiang tak hian kum 2/3 lek chhungin a let ai pawha tam hian plan fund-te hi min pek belh tawp lovang tih hi a chiang em em a ni. Ministry hmasa hunah khan kan sum leh pai dinhmun a chhe em em a, an Sorkar a, an lal rei tulh tulh a, kan leiba a pung chak tulh tulh a. Mizorama nausen piang hlim pawhin a leibat zat kha a pung tulh tulh mai a ni tih kan hria a ni. Nimahsela, tun Sorkar a lo din khan kan hotuten thahnemngai takin Central Sorkar-ina fiscal norms and rules, regulations a siam dung zuiin mipuite min kaihruai a. Thi leh thau pawlh takmeuhin tan an la a, chumi avang chuan kan leibate pawh nasa taka suthniam a lo ni a. Kumin Budget-ah pawh hian kan hotuten an ruahman ang chuan kan leiba rulhna tur hi crore zahnih leh sawmli leh a zat chiah ka hre ta lova, pariat vel niin ka hria, dah a ni a. Chu chuan leiba neih belh zel ringawt hi ram tan a him lo a ni tih hriatna avanga thahnemngaiin fiscal correction path hi Central Sorkar-ina min duh angin zawh a ngai a ni tih hriain, a nachang hre takin an ruahman a ni tihte a tichiang a. Chutiang chuan nikum lama interest, kan leiba pung zel (Lawkin, kha a hun hi a tawp a, dar 4:10 P.M. a ni tawh a) Pu Chairman, (Engtingge niang kan han....) midang kha an din chuanin ... (Interruption.....)

Aw, nichin khan Pu Speaker ka din chhuah tan chiah sawi pawh ka la sawi ve hma khan sana ka en a, kan Chairman kal chhuak ta zah tak chungin, a hriatsual palh em ni aw ka din tan hun kha tih ka'n sawi ri tel zawk duh a ni. Engpawhnisela, tun kan Sorkar hi chuan sum enkawl dan hi chu a thiam a ni tih nichina kan han sawi tak thuak thuak atang

ngawt pawh khan a lang chiangin ka hria a ni. Mizoramah leh India ram pumpuiaah pawh kan buaipui em em thil pakhat chu nasa taka subsidy-a thil sem leh inpek hi a ni. Kan subsidy avang hian Central Sorkar pawh a buai, Mizoram pheih chu kan buai leh zual tih kan hria a ni. Chu chu harsatna lian tak mai siam that ngai, siam rem ngai a ni tih kan hotuten an hriatchian avangin, Mizorama public distribution system pawh hi a tul angin ennawn mek a ni a, siam rem dan kawng zawn mek a ni a, kan siam tha dawn a ni tih Budget bua tarlan a lo ni te hi a thlamuan thlak a ni. Tin, chumiina a ken tel pakhat chu Mizoramah ration card inang vek, a hausa ber atanga a rethei ber pawhina kan nei te hi kan economy tan hian a tha ber lem lova, a tul hauh baw lo a ni tihte pawh hi kan hotuten an hrechiang thar ta a. Chumi zul zui chuan ruahmanna tha tak mai pawh an kal chhoh puite hi Mizoramina nakin lawkah chuan rah tha kan sengna tur kawng an buatsaih a ni tih hi Zoram mipuite hriatah sawi ve ka duh baw a ni. Keimah hi autonomous district council area atanga rawn tel ve ka nihna angin autonomous district council pathum te, tun Ministry Pu Lal Thanhawla Ministry-ina min duhsakzia hi sawi nawn ve leh ka duh a ni. Sorkar hmasa kum 10 vel zet chung khan autonomous district council te hi nasa taka hrek leh awpbek kan ni thin a, min vau pah baw a, an kut lehlamin carrot min pe a, min tawktarh a, an kut lehlamin tiang lianpui an hum a, tiang vel khan min enkawl thin a, churangin hrehawm kan ti ngawih ngawih thin a ni. Nimahsela, wawiih chuan “khua a lo var ta” kan ti a. Pu Lal Thanhawla Ministry hian plan fund min pekah te leh kawng dang dangah duhsak takin min enkawl a, chumi piah lamah hmalam zel kan pan ve theihna tur atana kawng tha, kawng dang dangte pawh, wawiih sawi chhuah vek tullo te pawh hi min ngaihtuahpui a, min duhsak a, min hmangaih a ni tih hi kan hrechiang a, chungte avang chuan sawlai mipuite aiawh pawhin wawiih hian kan lawmthu hi he House zahawmtakah hian ka han sawi lang thuak duh a ni. Kan Minister zahawmtak, Health changtu hian hma ala tha khawpin ka hria a. Pu Speaker khawngaihtakin Chair midang i luahtir lai khan unspoken agreement kan lo siam a, hun a laklawh avangin dar 4:00 PM thlang law law khi nimai rawh se min tihpui deuh a, kha kha khawngaih taka min kaltlangpui theih chuan ka lawm ngawt ang, midang hi din tum em em an awm tawh chuang lo a ni tih hi i hmuh thiam reng mai kha.

SPEAKER : Ka lo thir ve reng tho a, chu chu kan chairman-in a sawi lo in ka hria.

Pu H.ZOTHANGLIANA : A sawilo, ni e, unspoken agreement a ni ka tih kha. Engpawh nise Pu zahawmtak, Pu Speaker, kan Minister Health changtu hmalaknate hi Zoram mipuite tan hian a tha a ni. Thil tam tak sawitur a awm laiin kan thianten engemaw zat an sawi tawh a, ka sawi nawn lo anga, kan sawi nawn ve loh theih loh thil pakhat erawh chu Health Care Scheme tha tak maia an han siam danglam ta, mipui nawlpui tana banphak leh chhawr tangkai awlsam zawka an siamrem ta te hi an va han fakawmtak em! ka ti a ni. Chutih rual chuan kan mipuite hian a bikin thingtlang lama miten RSBY scheme that zia te hi an la hrechiang taw lo hi a paw ka ti a, hemi kawngah hian keini a hminga MLA hote pawh hian kan bial theuhah kan sawi tam leh zualte pawh a ngai hle mai tih hi tun hnaiah ka rilruah a lut lian em em a, kan bial lam atangte pawhin han ti ve ngial ila, mi harsa tak tak te, tanpui ngai tak tak te an lo kala, Health Care Scheme-ah i in register em? an lo in register lo tlangpui a, nachang an lo hrelo tlangpui maia, a paw khawp maia, RSBY hnuai tanpuina awm thei ang angtang tangkai zawka kan mipuiten an chhawr theih dan tur kawng hi kan dap tlan a

pawimawh hlein ka hria a. Tih theihna nei leh mawhphurhna changtuten mipui nawlpuiin hriatna zau zawk an neiha an chhawr tangkai theih dan tur kawng hi dap theih hram hram nisela Pu Speaker, a lawmawm dawn mang e, ka ti a ni. Hei, mi tihtawp luih tak tak i tum dawn niin ka hria a, chuvangin Pu Speaker, ka'n kaitawi anga, a hmawr ka'n bawk a ang e, khawngaihinh...

SPEAKER : House ka zawt duh a, khi a hun chu a hmang zo a, midang han tlak zepna chi a ni lo a, pek belh a ngen ngun bawk si a, engtin nge kan tih dawn? Sawi zel se kan ti nge, bang mai ang u kan ti, sawi zel phawt mai rawh aw.

Pu H.ZOTHANGLIANA : Ka lawm e, Pu Speaker, nangmah kaltlangin member zahawmtakte hnenah lawmthu ka sawi e. Urban Development Minister-te tak hi a fakawm a ni. Sports changtu a ni nghal bawk a, a fakawm zia kan hre nual tawh. Chutih rual chuan Ministry hmasa hi sawitel loh chuan vawiin picture hi a Chiang taw lo thin a paw ka ti a, ka'n sawi tel leh lawk anga. Ministry hmasa hunah khan Lawngtlai te saw Mizorama khawpui lian pawl tak a ni reng chungin town-ah min han telh duh tlat lo mai a, chumi avangchuan Urban Ministry hmanga EWS Scheme mirethei insak tanpuina kan tih ang chi te pawh kha district dang zawng zawngin an dawn lai hian Lawngtlai khawpui bik chuan kan han dawng thei lo maite kha, vawiina ka ngaihtuah let hian a lungchhiat thlak mang e aw, ka ti. Chutih rual chuan tuna kan hotute'n min enkawlnaah hi chuan lungawina hmuh tur ava tam em! sawitur ava tam em! ka ti bawk a ni. EWS scheme-ah hian ka lut hman ta si lo a, Lawngtlai chu engtin nge ni ang? Engtin nge kawng min dapsak thei em? tiin ka zawt tawh thin a, kan Minister hian 'RAY a awm alawm, RAY ah kan cover ve dawn che u a ni,' tiin assurance min pe a, ka lawm em em a, vawiinah hian kan biala mipui te pawhin min lo hriatpui atan, ka han sawi nawn ve leh zawk duh a ni.

NLUP chungchang kan sawi teuh tawh rualin, han sawi nawn ve leh thuak ka duh chu, kan thawhpui veilama thute pawhin an sawi uar ve em em, an ngaihsan leh keini pawhin kan ngaihsan ve bawk khawvela organization ropui ber pakhat UNO hnuia FAO (Food & Agricultural Organisation) in min han tuipui a, theihtawpa tan min han lak chhohpui turte hi a thlamuanpuiawm em em a ni, tih ka sawi duh a. Chutih rualin kan hotuten, kum 5 hnuah pawh NLUP tha taka chhawm chhoh zel a nih theihna turin 'exit protocol' an han buatsaih lehzel te hi a lawmawm takmeuh meuhin ka hria a ni. Heti hian ka'n khaikhawm mai anga Pu Speaker, kum 2013 kum tawp lamah kan inthlang dawn a MLA inthlan pui, chutah chuan Zoram mipuite hian tuna Zoram economy tha tak leh chak taka a thanchhoh zel theihna tur atan hian tu hi nge ni tha ? tu hian nge ni hma min sawnpui tih an hriat a pawimawh mang e ka ti. Chutiangan, NLUP that zia hi opposition party zawng zawng pawhin an pha ngam tawh bik lova tunah hi chuan. Tun hma kha chuan a thalo satliah pawh a ni lova, mipui bumna hmanrua mai mai a ni, an ti thin a. Vawiinah erawh hi chuan mipui nawlpuiin a that zia min hmuhpui tak avangin anni pawhin a tha lo tih hawi zawng chuan an sawi ngam tawh bik lova. A that chu a tha mahse kalpui danah a fair lo ti tein an han sawi deuh va. A fair zia chu nichinah khan kan thianten an sawi tawh a, ka sawi nawn lovang a. Engpawh ni sela, NLUP hi nichina kan han sawi tak ang khan exit protocol leh kawng dangte hmanga tha tak a, nakumah te kum lehah te, kum lo la kal leh zel turah te hian chhawm chhoh anih theihna tur

atante hian tu party hi nge rin ngam awm ber tih hi Zoram mipuiin an lo chhinchhiah khiau hi a pawimawhin ka hria.

Sports and Youth Services lama Mizoramin nasa taka hma kan sawn zia te chu sawi nawn sawi nawn a ngailo; kan hre reng. A chian zia tarlan nan chuan Ministry hmasa hunah khan Lawngtlaia kan playground neih that ve ber saw a khawlo tawk chiahin, a hman theihloh tawk chiah chiahin min rawn laih sak a. Gallery - thut theih loh tawk vel chiah chiah in min rawn siam thar sak a. Chutiang chuan Zobawk daiah te pawh playground cheng nuai tam tak sengin kan lai e an ti a, engmah tak tak chu an lai chhuak lem lo va. Chutiang ang chuan Lawngtlaia an Indoor Stadium sakte chu a ruhrel thiauvin min kal san a, a sak zawhna tur tak tak min lo dah sak reng reng lova. Chutiang vela min enkawl lai karah erawh chuan, tun Ministry-ah chuan kan Sports Minister chak tak leh kan hotu dangte hian thahnemngaiin kan thalaite khawvel thar kan siam dawn a ni tih Party Election manifesto a an lo tarlan tawh ang ngei khan theihtawpa hma an lakna zarah khawvel standard nena khaikhin pawha zahpuiawmlo khelmual tha leh hmun tha hrang hrang te, sports infrastructure kan lo nei ta te hi a lawmawm takmeuh meuh a ni. Heng zawng zawngte hi kal chhohpui a nih a, Rio de Jenairo 2016 , Summer Olympics-ah te Mizo thalaite hi kan tel tak tak theihna tur hi chuan Congress Party lo hi chu kum 2013 election-ah hian vote tlak an awm lo a ni tih hi Zoram mipuite leh Zoram thalaite leh Zoram thalaite pawimawhna hre phak zawng zawng hi chuan an hriat nawn hi a pawimawh takzetin ka hria a ni. Pu Speaker, ka lawm e.

SPEAKER : Aw le, kan hun a lo tawp mek ta a. Sawihona-ah 13 in an sawi tawh a, ka vei lama mite hi la sawi chak tur leh sawi tur ngah tak tak tur pali an la thu a. Ka dinglamah hian pasarih emaw an ni a, Minister-te chu sawilo turah ngai ta deuh ila chu chu kan dinhmun a ni a. Mahse chair atanga kan sawi lawk duh chu naktuk lamah hian sawihona kan chhonzawm leh ang a, vawiin ang kha chuanin hun kha kan in pe tam thei dawnlo a ni. A vang chu a bawkna kha mi pahnih pawimawh tak takin an neih a ngai a. Finance Minister, hemi speech neituin a tih a ngai a, tin House Leader-in a sawi a ngai bawk a. Chuvang chuan naktukah kha chuan dar 3 velah chuan chair atangin tihtawp deuh kha kan rawt kan rawt a tul dawn a. Vawiinah in vannei khawpin ka hria a, kan Member-te minute 10 kan inpe a minute 20 te in sawi a ni a. In han vanneih zia kha, chair atanga an han boksis nasat zia che u kha, kha kha a ni a. Engpawh ni sela, kan hun a lo tawp ta a, naktuk dar 10:30-ah kan thu khawm leh dawn nia.

Sitting adjourned at 4:00 p.m